

ТӨРӨЛНӨХ ЭЭССҮҮЛГИЙН МААЛЫГААНЫ САЛБАР

6



Л.Х. Ооржак
М.А. Күжүгет
Е.Т. Чамзырын
Н.Ш. Куулар
А.С. Шаалы

Төрээн чогаал

Нийти өөредилге организацияларынга
өөредилгэ номуу

6 класс

Федералдыг күрүнениң өөредилгэ
стандартының негелдөлөрингэ дүүштүр
тургускан шенелделиг ийиги үндүрүлгези

Тыва Республиканың өөредилгэ болгаш
эртем яамызы сүмөлээн

Кызыл — 2016

ББК 83.3 Тув

О 58

Рецензентилери *К.Б. Доржу*, филология эртемнериниң кандидады, доцент; *М.Н. Ооржак*, дээди категорияның тыва дыл, чогаал башкызы.

Чурук каасталгазы *Владимир Донгакты*

Номнуң даштыкы каасталгазы *Май-оол Чоодуннуу*

Өөредилгэ номуунуң I-ги кезээн *М.А. Күжүгет*; II-ги кезээн *А.С. Шаалы*; кирилде, V-ки кезээн *Н.Ш. Куулар*; III-ку кезээн *Е.Т. Чамзырын*; IV-ку, VI-гы кезектерин *Л.Х. Ооржак*; эртем-методиктиг утказын *Л.Х. Ооржак*, *М.А. Күжүгет* кылган.

Тускай демдеглелдер:



— номчаан чогаалывысты сайгараалы;



— бодуң бодалың илерет;



— улуг улус-билие демнежип ажылдаалы;



— немелде медээлерни дилээли;



— шинчилел ажылын чорудаалы;



— чогаадыкчы номчулга;



— литература болгаш уран чүүлдүң өске хевирлери;



— чугаавысты сайзырадылы;



— бот-тускайлаң онаалга.

Ооржак Л.Х. болгаш өскелер-даа.

О 58 Төрээн чогаал, 6 класс. Ниити өөредилгэ организацияларынга өөредилгэ ному. Ийиги үндүрүлгэ. — Кызыл: Национал школа хөгжүүдөр институт, 2016. — 176 ар.

Өөредилгэ ному РФ-тиң ФКӨС-түң негелдөлөрингэ дүүштүр ортумак ниити өөредилгэ организацияларының 5–11 класстарынга тыва аас чогаалы болгаш литературада чижек программага даянып кылдынган.

ББК 83.3 Тув

ISBN 978-5-904864-63-7

© Авторы-составители Л.Х.Ооржак, М.А. Күжүгети др., 2014, 2016

© Обложка художника Май-оола Чооду, 2014, 2016

© Рисунки художника Владимира Донгака, 2014, 2016

© Институт развития национальной школы, 2014, 2016

Все права защищены

Литература — сөстүң уран чүүлү

Чечен чогаалды азы литератураны кайы-даа чоннуң уран чүүлүнүң чугула кезээ, сөстүң уран чүүлү деп санап турар. Сөстүң уран чүүлүн аас чогаалы болгаш бижимел чогаал деп аңгылап турар. Эрте-бурунгу үелерде-ле тывылган байлак, чечен-мерген улустуң аас чогаалының чамдык хевирлерин боөөредилге номундан номчуп таныжар силер. Ынчаарга, тыва бижимел чечен чогаал чээрбиги чүс чылдың үжен чылдарында үндезилеттинип тургустунган. Степан Сарыг-оол, Сергей Пюрбю, Виктор Көк-оол дээн ышкаш баштайгы чогаалчыларыvyс тыва чогаалдың үндезинин салган. Оларның соонда чогаалчыларның элээн каш салгалы солчуп, тыва чонга боттарының чогаалдарын бараалгадып, бижимел чечен чогаалды сайзырадып, делегейге нептередип, өске чоннаар улузунга тыва чоннуң сеткил-сагыжын, угаан-бодалын, күзел-соруун таныштырган.

Чогаалчы кижииниң кол чепсээ, даяныр күжү, аргазы — төрээн дылы. Уран сөстүң дузазы-бile амыдыралды чуруп көргүзүп, кижилерниң сеткил-сагыжын сергедип, иштики делегейин байыдып, хей-аъдын көдүрүп, сүмелекчи, деткикчи болуп шыдаар чогаалчының ажыл-ижи ачы-буянныг. Кижи номчуп билбес чаш тургаш-ла, баштайгы шүлүктөрни дыңрап, шээжилеп аптар. А соонда номнаар делегейинче бирги базымнарын кылышп, тыва чогаалды шингээдип ап эгелээр.

Уран сөс-бile харылзаа, ацаа хандыкшыл кижиини бүгү назынында үдел кээр. Чогаал дээрge чүгле кичээлдерге өөренир, утказын билип алганы дээш демдектөр алыр эртем эвses дээрзин билип каар силер. Чогаал бистиң амыдыралывыстың бир чугула кезээн тургузуп турар.

Хүндүлүг өөреникчилер!

Бо өөредилгэ чылышында силер чаа чогаалдар-бile таныжып, тыва чогаалга хамаарышкан чаа билиглерни шингээдип алыр силер. Төрээн чогаал бодунуң солун делегейинче чалап, сонуургалыцарны хаара тудуп, амыдыралче бот-тускайлаң көрүжүцерни делгемчидер.

И кезээ. ЭГЭЭРТИНМЕС ЭРТИНЕ-БАЙЛАК — ААС ЧОГААЛЫ

Тоолчургу болгаш төөгү чугаалар

Тыва улустуң аас чогаалының биче жанрларынга тоолчургу болгаш төөгү чугаалар хамааржыр. Олар салгалдан салгал дамчып сайзырап келген. Чоннуң амыдырал дугайында күзелбодалдары ында бир янзы илереттингени онзагай. Тоолчургу чугаа биле төөгү чугааның аразында кандыг ылгалдар барын билири чугула.

Тоолчургу чугаа дээрge улустуң октаргай болгаш делегей дугайында бурунгу бодалдарынга үндезилеттинген биче хемчээлдиг чечен чугаа болур. Олар “чер, делегей болгаш кижиниң тывылганының база ол ышкаш, бурганнар, маадырларның ажыл-херектериниң дугайында шаандагы кижилерниң эрте-бурунгу билиишкеннериин илереткен эрте-бурунгу чугаалар” болур¹. Оларда херек кырында төөгүде болган барымдаалыг чүүлдер барык-ла чок. Тоолчургу чугааларны *хей-чугаалар, торулгалар* (М. Кенин-Лопсан), *бурун-чугаалар* (З. Самдан) деп база адап тураг.

Тыва тоолчургу чугааларны тема (чүнү илередип туарының) аайы-бile бөлүктеп болур: оран-делегей болгаш октаргай дугайында («Чеди-Хаан», «Үш мыйгак», «Үгер сылдыс»), аңмец болгаш мал-маган дугайында («Альт биле Теве», «Дилги чүге кыскыл апарганыл?»), төөгүлүг болуушкуннар дугайында, сураглыг кижилер, төрөл-бөлүктөрниң, черлер аттарының тывылганының дугайында дээш, оон-даа өске.

Төөгү чугаалар херек кырында болган онза болуушкуннардан база чонга суражаан кижилерниң амыдыралындан укталган, бижиттинмээн-даа болза, амыдыралга болганы чигзиниг чок, биче хемчээлдиг чогаалдар болур. Оларны чон чамдыкта *солун чугаалар* деп база адап тураг.

¹ З.Б. Самдан. Тывалар октаргайны канчаар билип чорааныл? /Чылбыга айны канчап сыйрыпканыл? – Кызыл, 2004. – Ар.4.

Тоолчургу болгаш төөгү чугаалар тускай тургузулуг. Олар кыска кирилделиг болур. Ында бооп турага болуушкуннарың үезин болгаш черин айыткан болур. Чижээ: «Чеди хаан чурттап чораан» азы «Биеэ шагда Угер черге турган чүве-дир». Оон улаштыр тоолчургу азы төөгү чугааларның кол кезээ эгелээр. Ацаа болуушкуннарың утказы чугаалап турага кижиниң сөзү-били илереттинер. Төөгү чугааларга гипербола (хөөредиг) ук чугааларның кол бодалын, оларның маадырларын болгаш эрсэ-дидим чоруктарын улам тода илередиинге дузалаар. Чижээлээргэ, Амыр-Санааның күш-шыдалын, ооң мунган альдын дендии хөөреткен.

Тоолчургу болгаш төөгү чугаалар бүрүзү-ле бодунуң шагдан бээр туруп келгенин бадыткавышаан, ында бооп турага болуушкуннарың доозулганын херечилеп турага төнчүлүг болур. Чижээ: «Инек оон бээр-ле кастынып оъттавас мал болган чүве-дир».

Тоолчургу болгаш төөгү чугааларны чон чогааткан. Чоннуң долгандыр турага өртемчейни, бойдусту көрүп, сонуургап, ханы билип алырын оралдажып чорааны, нийтилел болгаш үе дугайында бодаашкыннары ында илереттинген.

-
-  1. Төөгү болгаш тоолчургу чугааларның аразында ылгалын тодарадыңар.
 -  2. Тоолчургу чугааларның темаларының бөлүктөрөн чижек-тер-били бадыткаңар.
 -  3. Ава-ачаңар, төрелдериңдерден азы өске-даа улустан тоолчургу, төөгү чугаалардан айтырыңар. Сонуургаан чогаалдарыңарны бижип алыңар.
 -  4. Мөөң мурнунда класстарга тоолчургу болгаш төөгү чугаалар номчаан-дыр силер бе, сактып чугаалаңар.
 -  5. Өске чоннарда нептерээн тоолчургу, төөгү чугаалар билир силер бе? Интернет четкизин ажыглап, ындыг чогаалдар-били таныжып номчуңар.

Ай, Хүн

Хүн, Ай черни долганып турар дижир. Ай — хөрөэжжөн дириг амытан-дыр, Хүн — эр амытан чүве-дир. Хүн изиг, Ай соок.

Хүн үжэн хаалгалыг, үжэн хаалгазын ажыткаш, үнүп кээргэ, бүдүү болур. Ай он беш хаалгалыг, оларны хаарга, Ай каарып турар, ажыдарга, агарып, улгадып турар.

Хүн чеден беш казак тергелиг. Хүндүс Хүн чоруптарга, дааш-шимээн эвээш болур, ажа бээргэ, дааш-шимээн дүне улгады бээр. Хүн бодунуц херелин черле боогдап шыдавас, ынчангаш Ай ышкаш чартыкталып турбас.

Чеди-Хаан сылдыс

Чеди хаан чурттап чораан. Айбылажып чадап каан чүве-дир. Бирээзин бирээзи айбылаарга, хаан кижи мен, чүве кылбас мен дээр; бирээзин бирээзи айбылаарга, база-ла хаан мен, барбас мен дээр, ындыг болганнар-дыр. Ол шагдан бээр-ле ужуражып чугаалашпас, чеди башка «чеди-хаан» болуп, дээрде олуруп бергеннер иргин.

Үгер канчап дээрже үне бергенил?

Биеэ шагда Үгер² черге турган чүве-дир. Бир-ле катап дээрже ол үнүп, ажыг соок дүжүрер деп барган. Ону билгеш, Үгерни дээрже үндүрбес дээш, Альт биле Инек маргышкан.

Альт тургаш:

— Адыр дуюглуг амытан ону черге чыпшыр базып шыдавас сен, муңгаш дуюглуг мен базып көрейн — деп дилээн.

Инек адааргап, хорадааш:

— Адыр дуюглуг-даа болза, аар амытан мен, черже киир базыптайн — дээш, базар орта, Үгер:

— Чай-кыш дивейн, чаашпан баштап, хаайыц-бите хар чулгүп оъттап чоруур сен, Инек — дээш, дээрде барып, соок дүжүрүп олуруп берген иргин.

Инек оон бээр-ле кастынып оъттавас мал болган чүве-дир.

² Мөол дылда “үгөр” деп сөс инек, бода мал дээн уткалыг.

-
-  1. Номчаан чогаалдарыңарның уткаларын эдерти чугаалап, сөзүглелдерге айтырыглардан тургузуп өөреницер.
2. Чеди хаанның аразында маргыштың өөскәэн чылдагааны чүдел? Оларның аажы-чаңнарында четпес талазын сайгарып чугаалажыңар.
3. Хааннарның кайызының-даа «Хаан кижи мен, чүве кылбас мен» дээн чугаазының алыс утказын канчаар билдинер?
4. Альт биле Инек чуге маргышка бергенил? Ук маргыштың түнели кандыг болганыл?
-  5. Тайылбырлыг словарьдан Ай, Хүн дугайында медээлерни ушта бижээш, чогаалда кирген утказы-биле деңнеп тайылбырлаңар.
-  6. Ай, Хүн дугайында кандыг шүлүк, ыры билир силер, сактып чугаалаңар, оларның даңзызын кыдыраашка бижип алышар.
-  7. Чеди-Хаан сылдыста кижи бурузу сылдыстыг болур дээр. Үндэс бодуунуң сылдызының тодарат, оон ады кандыгыл, чугаала. Билбес болзуңза, улуг улустан айтырып ал.
-

Кижи канчап эң-не күштүг амытан болганыл?

Шаг-дүп будүп турар эрте-бурунгу үеде чүве иргин. Бүгүле дириг амыттаннарның амыдыралы болур арга-ыяш деп чүвени үлжери-биле улуг чыыш бооп-тур. Ол орта кижи тургаш, арга-ыяшты апкаш, бурт-ла дээн чүвең иргин. Үнчаарда кижи амытан дүктүг, дөрт-даяктап маңнаар, кедергей-даа чүгүрүк турган.

Сыын ол чыышка чорааш, кел чоруй, мезилге таваржы берип-тир.

Мезил тургаш:

— Арга-ыяш үлжир чүве дээрge, ынаар бар чыдыр мен, чүнү билдин? — деп-тир.

Сыын тургаш:

— Арганы кижи алгаш, арлы берди, хөй амытан кайгап туруп калдывыс, — деп бажын чайгылааш, — мээн дазылданган агжагар чаагай мыйызым тайга кырынга дүжүп чоруур, оран-чуртум база ол болур-дур. Сээн малбыйган бажың малгаш

адаанга чыдар болду, суг дүвүнден ам үнмес-тир сен, ону дыңнадым ийин — дээш, ак баштыг тайгазынче халып үне берип-тир.

Мезил ону дыңнааш, кезек боданып туруп-туруп, даңзазын ызырып алгаш, бир хырын саржаан хойлап алгаш, суг ишти-ниң озаңынче кулбуруп кире берген.

Ынчангаш кижи делегейде бүгү-ле дириг амытаннарның эң-не күштүү, эң-не угаанныы болган чүве-дир. Ол-ла хевээр кижиден чүү-даа амытан коргар, сестир, дезер болгандыр оо!

-
- 📘 1. Сөзүглелдиң планын тургузуңар, ол план-бile чогаалдың утказын чугаалаңар.
 - 📘 2. Арга-ыяшты үлемжириниң чылдагааны чүдел?
 - 📘 3. Арга-ыяшты кижиниң алгаш барганын шын деп бодаар сiler бe? Амгы ye-бile, амыдырал-бile холбап тургаш, бодалың илерет.
-

Күскениң чылга киргени

Теве биле Күске маргыжча берип-тир.

Теве тура:

— Мен эң улуг амытан мен, мен чылга кирер мен — дээн.

Күске тура:

— Мен эң биче амытан мен, мен чылга кирер мен — дээн.

Теве тура:

— Үндиг болза, хүн кайы чүктен үнүп келирил, ону мурнай көргенивис чылга кирзин — деп-тир.

Күске тура:

— Үндиг-дыр — деп чөпшээрешкен.

Теве хүн үнер чүкче көргеш, чыдып алган. Күске тевениң мөгенинче үне халааш, соңгаар тайга бажынче көргеш, олуруп алган. Үнчап турда, үнген хүннүң херели соңгу тайга бажынга дээп кээп-тир.

— Хүннү мен мурнай көрүп кагдым! — деп, Күске алгыра-ла берген.

Ыңчангаш Теве ол орта аштырган. Құске чылга кирген чүвейдир. Теве чылда кирбәэн-даа болза, «Он ийи чыл» теведе шупту бар дижир: Теве Құске-бile маргышкан; дуюу Инектии дег ийи адыр; бажы тейинде дүктүг Пар бажы хевирлиг; думчуу Тоолай думчуу дег; үпчү боду ыргак-аргак Улу хевирлиг; кудуруу Чылан ышкаш; караа Альттыынга дөмей; дүгү Хойнуу ышкаш; мөгени Сарбашкын хевирлиг; кулаа Дагаа шинчилиг; алғызы ыттыынга дөмейзимээр азы Хаванныы ышкаш.

-
-  **1.** Чогаалдың планын тургускаш, утказын чугаалаңар.
 - 2.** Құскениң маргылдаага тиилеп алганының чылдагаанын тодарат.
 - 3.** “Теве он ийи чылга кирбәэн-даа болза, онзагай амытан” деп бодалды илереткен кезәэн чогаалдан ушта бижиш алышар.
 - 4.** Ҙөөн чүк улузунуң календарын ёзуғаар он ийи чыл аттарын дес-дараалаан чурум ёзуғаар шәэжилеп алышар.
 -  **5.** Номчаан чогаалдарыңарның уткаларынга дүүштүр чуруктардан чурунар.
 - 6.** Төрүттүнген чылдарыңарның онзагайын барымдаалап, мультимедийлиг проектилерден кылгаш, камгаланаңар.
-

Үттүг-Хая дугайында тоолчургу чугаа

Шаг-шаанды, Чинғис-Хаан безин маңаа келбәэнде, болған чүве-дир. Тываның хүн ажар чүгүнде бир-ле черге хааннарың оолдары тотканындан дажаарааш, кылыш чүве тыппастаан. Олар оюн-тоглаадан, айт чарыштырарындан безин чалгаараар апарған. Ыңчап чоруй, олар арага-дарылап, улус-чон үтпеп эгеләэн. Чыл келген тудум оларның саны өзүп, каржы-дошкуну дам барған. Бөдүүн чон оларның сураан дыңнааш-ла, коргуп-сүртеп турған.

Дээрбечи сойлуктар тайбың аалдарже халдап, ядыы араттарның мал-маганын былаап, куду көрүп, кадыр хаялардан Хемчик хемче киир октапкаш, чидир халды бәэр турған. Олар байып, калчаарап, баштыңчызы ырак чурттарже аян-чоруктар кылып турған. Дээрбечилер бедик даг кырында сазыг хөлдүң

ортузунда шивээгэ турлаг кылыш алганнаар. Ам ол хөл чок, ооң орнунда, Адыгыр-Кара маңгыстың аксы дег, кара тамы туруулжан дээр-ле болгай.

Үттар орнунга демир илчирбелерде баглап каан бөрүлөр шивээни дүн, хүн чок кадарып турган.

Барыын Тываның чонун дээрбечилер ынчалдыр коргудуп алган. Эц-не коргунчуг чуве — олар аныяк оолдарны будап, оларның сеткил-сагыжын хоозурадып турган. Өйлөп-өйлөп, боттарының чаңгыс карактыг баштыңчызының төрүттүнгэн хүнүнде, олар он сес харлапкан аныяк ядын оолдарны тудуп эккелгеш, бөлүүнче кирип ап турганнаар. Баштай оолдарны шылгаар, ону эртип шыдаваан кижини — өлүүрүп каарлар. Шылгалдалары база аңгы-аңгы: бир кижи альттыг чоруп орган кижиниң караанче часпайн адар, өскези — кайы-бир аалды оорлаар, үшкүзү — бодунуң кыс дуңмазын дорамчылаары-били дээрбечилерге эккеп бээр...

Эц-не берге шылгалда чырык чер кырында авазындан өске чүзү-даа чок Өскүс-оолга таварышкан.

Оларның самдар өө Хемчик кыдышынга турган. Олар өөн долгандыр оъттап чоруур каш борбак өшкү өнчүлүг чуведир. Өскүс-оол ыр-шоорга ынак, ырларын боду чогаадып аар турган. Бодунуң кылыш алганы лимбизинге сеткил-сагыжының аяны-били ойнаар турган. Чамдыкта ыяңгылыг хоюг аялгалар сырын-били катчыпкаш, човууртаан дег, дыңналыр. Бирде самдар өгден, хамнаарактың үнү дег, хөглүг, чарааш аялгалар чаңгыланы бергилээр.

Чазын болгаш чайын ырылар ацаа, чаныш келген күштар дег, четкилөп кээр. Өскүс-оол кыс кижи-били таныжып көрбээн. Ол чүгле бодунуң ырларынга болгаш авазынга ынак. Ырлаксай бергэнде, ол өөнүң даштынга олуруп алгаш, лимбизинге ойнай бээр. Авазы ооң чанынга келгеш, эргелелдии-били оглунчэ көрүп олурар — делегейниң бүгү иелери уругларынчэ шак ынчалдыр көөр.

Бо удаада оглу ырлай бээргэ, авазы үнүп шыдаваан. Каш хүн дургузунда ол оруундан туруп шыдавастаан, аргашинээн оскуунуп, күш-шыдалы баксырай берген. Өскүс-оол

муңгаранчыг ырызын ырлап ора, чайғы дүннүң дүжүп келгенин безин эскербээн. Чүгле хөй айт даванының даажы ооң ырызын үзе кирипкен. Ооң соонда бүгү чүве дүш-түлде дег болу берген. Бир-ле кижи олче халый берген. Хол-будун долгап, бир чүвеге ораагаш, айтка үңгерипкен. “Дээрбечилер” деп бодал ооң бажынга шывараш дээн.

— Дүргеденер, чалгаа язылар! — деп, бир-ле кижи кыжанган. Альттыг улус Өскүс-оолду алгаш халдып чорупкан. Өске айтта база бир кижини үңгерип алганын ол эскерген.

Мага-ботту силгииринден, эпчок чыдарындан Өскүс-оолдуң бажы халацайнып, сирилеп чораан. Чүү болганын, кайда келгенин ол билип чадап каан.

Оол миннип келгеш көөрге, долгандыр аажок каас идикхептиг улус олуар улуг одаг чанында чыдар болган. Оларның бирээзи чеңин даап алган, чалбыышталган одагда шиште шанчып каан эътти быжырып олурган. Чаңгыс карактыг, эзирек узун кижи Өскүс-оолга чедип қелгеш, ооң кежегезинден тырткаш, тургузу соп эккелгеш, эктин часкагылааш, мынча дээн:

— Сени дыка үр хайгаарал келдим. Сээн ырлаарынны со-нуургаар-дыр мен. Сээн хөрээнде айлаң-кушкаш орап-дыр. Ын-чангаш, төрүттүнген хүнүмде сени шилип алдым. Бөгүндөн эгелеп сен шилиттинген кижи боор сен. Бис чүнү-даа шыдаар бис, канчап-даа болур бис. Чүгле баштай шылгалда эртер сен, — дээш, каттырыптарга, ооң чылан ышкаш, дырышкак, узун думчуктуг, кара салдыг шырайында хүлүмзүргүг сомазы көстүп келген...

...Хаваанда доора сорбулуг, хөрээ делгем, чолдак, ыргак буттуг кижи тура халаан. Ооң сөөк чаактарлыг арнында думчуу чок болган.

— О дээргим, күчү-куштүг Узун-Кырза, бо дашканы алгаш, бодуңче чоокшуладып алыксаан кижиңче сунуп көр.

Чаңгыс карактыг кижи Өскүс-оолду дужааган:

— Бо дээрге сээн аваңың чүрээ-дир! Ону чиптер болзуңза, сенээ шупту чүве хамаанчок апаар. Канчаар сен?... Че, манап тур мен!

Өскүс-оолдуң эът-кежи соолаңайны берген. Ынчан ол ава-зының коргунчуг салым-чолунуң дугайында эвес, а бодунуң амы-тының дугайында бодай берген. Холун ала-чайгаар дашкаже суна кааптарга, ченнерин даап алган кижи кыдыглары өрттени берген шиштээн эътти ооң мырыңай-ла эриннеринге чоокшуладыр тудуп келген... Өскүс-оол бичии када чайгыла хона берген. Одагны долгандыр олурғаннар сыйыржып, шооңайчып туруп келгеш, аштаан бөрүлер дег, долгандыр халчып, шурап турғаннар.

Өскүс-оол ооң мурнунда кажан-даа арага ижип көрбээн турған. Ажыг арага ооң бажынче үнүп, төөредип, хөрээн доюлдуруп, бүгү мага-бодунче тараپ әгелээн. Эзириктиң дүлгээзини ооң арыг-шынчы әрткен оруун дутглай берген.

... Өскүс-оол ам кандыг-даа арын-нүүр дугайын уттупкаш, мөгее аарак шиште эътти эриннеринге чоокшуладып чедире берген... Ол хенертен дыка тода үн дыңнап каан:

- Үрүп ал, оглум. Эриннериң чиртип алдың...
- А-а-а-авай! — деп, Өскүс-оол коргунчуг кылдыр кышкырыпкан.

Ол шишти черже октапкаш, ооң кырынга көжээленип, даш кылдыр хуула берген.

Дээр кызаңнап, динмирээшкін чыжырт дээн. Хая-дашты хоора шаап, октап турага улуг шуурган әгелээн. Одагның от кезектери, кижилер — шупту холужуп, хатка бөөлдедип алгаш, хөме шаптырып дүжүп турған. Хат айы-бile шиш мурнуу чүкчө шиглей хадаан, та дүргениндөн азы та чүүден чүве, шиште иениң чүрээниң бузундулары чырый бергеш, согун ышкаш апарган. Ооң оруунга даг турған. Ие чүрээ ол дагны чаңык ышкаш өде халаан — өлүг болгаш өртөң-даа болза, ие чүрээ ол хире күштүг болган! Ол үеден әгелээш, Барын-Хемчикте Уттуг-Хая деп чер тывылган чүве-дир.

-
-  1. Чогаалдың планын тургускаш, утказын чугаалаңаар.
 - 2. Тоолчургу чугааның маадырларын адаңаар, оларга боттарындарың хамаарылгаңар илередиңер.
 - 3. Өскүс-оолдуң аажы-чаңында эки болгаш четпес талалар бар бе? Чүге ынчаар бодап турага силер, чижектер-бile бадыткаңаар.

-  4. Ие кижиңиң төлүнгө ынакшылының күштүүн чогаал болаш амыдыралдан чижектер-бile бадыткап чугаадан кылышар.
-  5. Номчаан чогаалыңарның утказынга дүүштүр чуруктардан чурунар.
-  6. Чогаалдың утказынга сценарийден тургузуп, шиижидип ойнашар.
-  7. “Ие сөзүн ижип болбас” деп үлегер домакка дүүштүр чогаадыгдан бижицер.
-  8. Уттүг-Хая дугайында тоолчургу чугаага үндезилеп бижит-тинген шииниң адын, ооң авторун тодарадышар.

Хайыракан

Шаг шаанды Түлүш деп ызыгуур чок турган. Хайыракан дааның ады-даа аңғы турган. Чүгле ол чоок кавыга Түлүш деп аттыг аңчы кижи чурттап чораан. Ажы-төл-даа чок, дөргүл-төрел-даа чок кижи-дир. Бир катап Түлүштүң өөнүң чаны-бile арай боорда калгып чоруур кырган шуваганчы кадай эртип чыдып-тыр. Ону өөнчө чалааш, шайладып, эйттедип хүндүллээн дээр. Шайлап алгаш, шуваганчы: “Чарындан ап берем, оол, кандыг аайлтыг чоор!” — дээн дээр. Улуг кижиңиң сөзүн дыңрап, өреге бажынга турган үш чылдың кургаан чарнын ап берип-тир. Шуваганчы чарынны дээр актап көргеш: “Оглум! Ажы-төлүң хөй болур, чаагай аттыг кижи-дир сен” — дээн.

Түлүш ёзу эдерип, өөрүп четтиргенин илереткеш, шуваганчының курунга далган бооп берип олурда: “Ажы-төлүң овур-хевириinden коргуп-сестип, улуг чурт үредин, оол, бурган башкының ачызында эки-ле өзүп сайзырап көрем” — дээш, эжик аксынга тейлээш, от адаанга бир хүл үзүп тейлээш, эргин аксынга бир чалбарып тейлээш, оруун Улуг-Хем унунчे углааш бадыпкан дээр.

“Уваа, кадай-бile чурттаа-ла чээрби чылдың нүүрүнде ажы-төл чок иийи бодувус чурттап келдивис, ам ажы-төлдүг болур дээрge, бүзүревес кижи-ле-дир мен” — деп боданып олурган Түлүш дээр. Үш хонгаш, ол оран-чуртундан диленир чаңы-бile

кадыг чазы, ок-бижээ хүн хүнезинин алгаш, кадайынга чагыг-сөзүн бергеш, аyttаныпкан иргин.

Мөөрүктүң ары чартыында пөш, чойган холуй үнгөн ийлерге келгеш, одагланып чыдар аразында бир-ле хөрек киргирээн ышкаш чүве дыңналган. Чаны-бile аай-дедир далаш чалбарыпкаш, чыдазын белеткээш олурупкан. Элээн болганда, одагның кедээзинде селбер пөш баарында өгбөгер чүве барын эскерип каан. Корга-корга чоокшулай бээрge, кыс адыгның шөйүндүлери сөөрттүнгеш, ынаар-ла төнмөс аргамчы ышкаш шөйлүп чоруп каан болган. Часкы ўе болгаш-ла куртуп чыдый бербээн амытан бооп-тур, та хаван-бile месилдешкен, та ёске кандыг-бир араатанга таварышкан.

Аңчыны көрүп кааш, адыг дыка улуг тыныпкаш-ла, өлген. Ам канчаар, долгандыр шинчиллээш, андара тыртыптарга, колдук адаанда чүве өгбөннээн, ам көрүп турага, билек дуртундан улгатпас хире адыг оглу иезиниң чаргаш эмиинден пактап алган, улуг уйгузундан ам-даа чедир адырылбаан хире чыткан. Ол орта аңчы дыка үр боданган дээр. Аң араатан-даа болза, өлген-бile кады өлүр эвес, адыг оглун аргалап тургаш, аалынга әккелген. Бойдустуң доктаадып кааны үезинге чедир дүвүрөвөзин дээш, уйгузу-бile эмисиктеп турганнар дээр.

Чай-даа келген, бие адыг оглу оттур шаанды оттуп келген, элээн доруга берген. Ажы-төл чок ашак-кадай адыг оглун оолзуна берген-даа чүве-дир. Ол аразында аңчының кадайы сааттаны бергенин эскерип каап-тыр. “Ажы-төлдүг чораан эвес бис, адыг оглу азырап, төлзүнеривиске, бурган биске ээ көрүп, төлденир-даа улус эвес бис бе?” — деп чугаалажып турган дээр. Адыг оглун “оглум!” дижир, ону черле эттеп, бак чаңнап болбас турган улус-тур. Ол-даа база ындыг, чассыг деп чүвези мырыңай дендии. Өскен тудум, ижер-чири кедереп барган, асқы черле куруг турбас. Чаптанчыы мырыңай кедергей. Ашак-кадайның аразынга хонар, удаан улус өттүнүп шуглак-дөжек адаанче кирер. Өшкү кежи чоорган адаанда таваңгайы карара берген-даа чыдар-ла, аңчыны өттүнүп дошпулуур-даа үен-даян каңгырады берген орар.

Чоорту ашак адыг оглун хой кадарып өөредип каан, ол черле чүве ышкынмас болган. Мал-маган база аңаа өөренип калган. Бир ай хире болуп чорда, адыг-даа аалдан ыравастаан. Божа-хойтпак, тараа-быдаа арттырбастаан. Ашак түвексингеш, хууңнарның дувүн бүдүү үттээш: “Суг чок-тур, оглум, суглас эккел” — дээш чорудуптарга, майтацайнып чоруп каар. Улуг-Хемден сугну ускаш, өгге кээп чорда, суг төктүп калыр. “Суун кайыл, оглум” — дээргэ-ле, хуунче өгденедир харап көргүлээш, катап-ла хемче кирип каар. Ынчап-ла суглас хүнзээр апарган.

Күс дүжерге, адыгның байдалы баксырап эгелээн. Аңчи кижи ону билбес эвес, кыштагга чылыг черни белеткээш, өгнү олче көжүрер деп бодап алган. Шаа кээргэ, бок-сакты шыргалап белеткээш, чоруканнар. Кыштаанга көжүп кээп турда, адыг оглу-даа кышкы чыргалын чыдыннай берген чүвэ-дир. Чыышкынга тускай черни белеткээш, орта чыттырып кааннар.

Үе-даа эртил-ле турган. Кыштың кончуг соогунда Түлүштүң кадайының эъди аарып эгелей берген. Ол душта эрткен часкы шуваганчы ол аалдарга келген чүвэ-дир. Биеэги чаңы-бile шуваганчы өдек адаанга, эргин адаанга, от адаангат тейлегилээш, ашакты: “Дөө өглерге барып ийи хондур чорааш кел, оглум!” — деп сөглээн дээр. Ужур ындыг турган, кадайының эъди аарыырга, өг ээзи өгге турбас.

Ашак-даа ийи хондур бир өгге тоолдааш келиргэ, кадайыдаа эки-чаагай чийгээн олуруп-тур. Шуваганчыдан: “Оглуң чээрби беш хар чедерге, улуг өскрилгелер болур, оглум. Ак-Мортуктугнуң адын ынчан ыдыкшыдып каар силер” — деп сөглээн, Улуг-Хемниң кыдышында шынааже углапкан дээр. Үш хонганды, аңчи молдургазын дилеп чорааш, шуваганчының көжүй берген сөөгүн тып алгаш, дагның адаа талазында бир сүүрнүң эдээнгэ орнукушудуп каан. Оон бээр ол бичии сүүрнү “Шуваганчы сүүрү” дээр апарган.

Үе-шаг-даа шыныцайнып эртил-ле турган. Бичии оолдуң адын Адыг-оол деп алган улус-тур. Адыг-оол-даа, адыг-даа өскен —

бирээзи улуг эр, бирээзи кедергей улуг иргек апарган. Ол ийиниң чарлыры-даа чок. Адыг-оолдуң сөөлүндө аңчының ажы-төлү эндерилгөн чүве-дир. Чәәрби хар чеде бергенде, шайлалгазын эрттиргеш, Адыг-оол аңгы-башка өг-бүлелиг чурттай берген. Иргек ийи өг аразынга-ла чоруп турган. Амыдыралдың аайы биле Адыг-оол-даа өскәэр азы амгы Арыг-Үзүү, Иштии-Хем ол ынчаар чурт тудуп көжүп чоруп каан. Ол үеде Адыг-оол чәәрби беш харлапкан чүве-дир.

Бир-ле катап аңчы ашак көөрге, Иргек оглу ашак-кадайга, дуңмаларынга әргеленип-әргеленип, хөлденип бада берген карак чажын адыжы-билие аштап олурган дәэр. Ынчап олуруп-олуруп ашактың эдәэнден дыргаа-билие дыртпалааш, үнүп чоруп каан. “Акың канчап туары ол, көрем, уруум” — дәэш, уруун айбылаарга, оозу үнгеш: “Дүгде эрги өг орнунда чыдып алды” деп кирип келген. Ашак-даа чувениң ужурун билгеш, аъдын дурген әзертәэш, оолдарының бирээзин “Адыг-оолду эккел” — дәэш, каксыпкан.

Белдир-Кежиинде аал Шынаа бажындан ырак әвес, ша-даа четпәэнде Адыг-оол бо эшкедеп келген. Кел сал-ла, Иргекке баарга, оозу Адыг-оолду шаанга киир куспактап, ыймактап, ойнап-ойнап, дөңмек қырынга бажын салгаш, даамчыраан олчаан удуй берген дәэр. Адыг-оол хондур Иргектиң бажын чыттап, ыглап келген дәэр.

Эртенинде ашак: “Оолдарым, чемненип алышар!” — дәэрге шиммәэн чок. Оолдарынга чеде бәэрге, Иргектиң эъди сооп, карактары шилдее берген чыткан. “Акым чана берди, ачай!” — дәэш, Адыг-оол хөөледир ыглапкан дәэр. Ам канчаар, чажында келген өөнүң орнунга улуг даг-иргек апарган адыгны ол хевээр ажаап орнукшуткаш, ашак чугаалаан дәэр: “Ажы-төлүм эгези, улуг оглум болуп чордуң, ам адың адаар әргем чок, өскен дааң мөңге ээзи болуп бурганна, Хайыракан.”

Ол олчаан ол дагның адын Хайыракан деп адай берген. А Адыг-оол әмгежок ажы-төлдүг болган. Ол Адыг-оолдан Адыг-Түлүш деп ызыгуур тывылган дәэр чүве.

Теве-Адар

Биеэде кыдат чиң сөөрткен хөй тевелиг кижи Чыргакыны куду бадып орган. Күскээр дииңчи үези турган. Бир тевениң бурундуун мурнунда тевениң кудуруунга баглап каан, эжен-не эндерик дизип каан чиң сөөрткен тевелер бадып органын көрүп кааш, ча, согуннуг бир кайгал аңчы ийи кызааның дужунга инек дег кара даштың артынга кедеп чыдып ап-тыр.

Эң сөөлгү теве эртип чыдырда, эр чүвең ооң бурундуун үзе адып дүжүрген. Хөй бараан чүктээш, ооргазы шылаан күжүр эңгин хаак аразынче шырбанып кире берип-тир. Аа, күжүр эр чүзү боор, маңнап чеде бергеш, сөктеп тургаш, тевени тудуп алгаш, одаанга чедип чедире берген.

Чыргакыда ол кызаа оон бээр Теве-Адар деп аттыг болган дээр.

-
-  1. Пландан тургускаш, чогаалдарның уtkазын чугаалацар.
 -  2. Кожуунуцарда черлер аттарының дугайында дыңнадыглардан бижинер.
 -  3. Хайыракан дугайында ыры, шүлүк билир силер бе? Ук чогаалдарның аттарын, авторларын адацар.
-

Амыр-Санаа дугайында төөгү чугаа

Хаан адазының ширээзинге олуарар эрес маадыр болур дээш, Амыр-Санаа биле Шүшпен-Бег ча адарынга маргылдажып турганнаар. Төрениң дөрт дүжүмеди оларга бир буганы тургузуп берген. Оолдарның кайызының-даа согуну буганы өткеш, черже төш чартыы хире кадалы бээр бооп-тур. Алышкыларның кыдат кижи алган угбазының Шунуун деп оглу ол маргылдааны көрүп турган.

— Чээн-оол, сен база шенеп көрбес сен бе? — деп, оолдар ацаа чугаалаан.

— Мен чүге адар мен, хаан болур эвес мен — дээш, оозу ынаксавас болган.

— Бисти ажыр атсыңза, чәэн оол, чүге хаан болбас деп сен — деп, оолдар ону деткәэннер.

Шунуун адарга, соң согуны буганы өткеш, черже бир кулаш болгаш төш чартызы хире кире берген.

— Шунуун хаан болган-дыр — деп, төрениң дөрт дүжүмеди шиитпирлөп каан.

Ол өйде Моолга ызыгуур салгап хаан болуп турган чүве-дир. Иий оол алаң кайгап калган, аразында чугаалажып органнар:

— Адавыстың хаан ширээзинге кайы-бирээвис олурап ужурлуг чүвени кыдат кижиғе чайлап бээр, кончуувусту-даа. Канчап багай атка кирер бис. Йндиг эвес, ам даарта Шунуунну эдертил алгаш, аң аглаар-дыр. Сегит бажынга олургулап алгаш, «чүүдаа болза аныяк кижи сен аң сегит, чәэн» — дээр-дир ону. Аң соондан эртил чыдырда, иий чартыындан өттүр адып, өлүрүп кааптаалы. Ол ок эндээ-ле болур ыйнаан — дишкеннер.

Кежээ үш оол хөөрежип оргулааннар. Шунууннуң иези дун-маларынга дашка тударда: «Чәэн-оол — эш болбас, чеп кур — кур болбас. Ам даарта аң аглаарда, куяк хептен кединцер» — деп ырлап-ырлап тудуп турган.

Шунуун иезиниң элдээрткен ырызын билип кааш, әртенинде аңнаарда, хевиниң иштинге куяк хевин кедип алгаш чоруткан. Иий алышкы Шунуун эртил чыдырда, адарга, октары куяк хепке дынымайн барган.

Шунуун хаан ширээзинге саадапкан. Амыр-Санаа ол хаан биле өжешкеш, өске кожуунга барып чурттай бергеш, хаан төрезинге удур демисел чоруда берген.

Хаан ону кыйгыртырга, барбас мен деп бижик бижээш, тарбаганның кулаа биле мойнун бижикке кады хаптааш, чорудупкан. Хаан бижикти номчааш, тарбаганның кулаа биле мойнун чүге чоруткан ужун билип чадааш, билигжи кыдат чалап эккелгеш, аңаа шинчиткен. Шинчээчи кыдат ону көргеш:

— «Аргактыг алды мойнум кестир, сеңээ чагыртпас мен. Сээн карааң, кулаанга көзүлбес мен, ынчалза-даа чер кырынга чурттаар мен» дээни ол-дур — деп-тир.

— Канчаар харылаар бис? — деп, Шунуун хаан шинчээчиден айтырага:

— Дас чүү биле тарбаган өштүн бижик-бите кады чорудар — деп-тир. — Оон ужуру болза кижиге четтирбес кай баар сен, дас болза ужуп чоруй баар, тарбаган болза черже кире бээр дээр — деп, ол билигжи кижи тайылбырлаан.

Амыр-Санаа хааның бижийн алгаш: «Хаан төрени дүжүргеш, дец эргениң төрезин тургузар мен» — деп харылаан болган.

«Хаан күрүнүң иштинге Амыр-Санаа каяа-даа чорза, ону өлүрүңер! Хаан төрезинге удурланган кулугур!» — деп, кыдаттың эжэн хаан чарлык тараткаш, хөй шериг чорудупкан.

Амыр-Санаа дөрбеттиң Далай-Хаан биле Сорукту-Хаан Қөгөйгө шивээлэп алгаш турда, ол дүне дургуннап үнгеш, Өвүрнүң Саглы аксында Кара-Үяш бетинде хову ортузунга чаңгыс дытка альдын баглап алгаш, бузуп хүнзээн. Ол дыт чанынга кудук чыткан. Оон суг узуп, шай хайындырып ижип алгаш, альдын дыштандырып алгаш, чоруурда, йөрээл салган: «Далай-Хаандан оол уруг төрүзе, доктаавас болзун, мени оглунга дөмөйлевээн кулугур! Оон орнуунга бо чаңгыс дыт чус сарыг дыт бооп өөрлөшсүн! Бо кудук булак суг болзун!»

Хову ортузунга турган чаңгыс дыт ам дөргүн арыг болган. Ол кудук булак суг болган. Ол арыг Зуу-Карагай дээр моол аттыг болган. Тывалаарга, Чүс-Дыт дээн.

Хөй шериг Амыр-Санааны Успа-Далайга чыгап келген. Үмьраа-сээк үглэп турага дүне болган. Эртенинде улус көөрге, Амыр-Санаа Успа-Далайны альдынның дуюунга өйлэп донуурал алгаш, кежип чоруй барган болган. Үмьраа-сээк ышкаш хөй шериг Амыр-Санааны ызырты сүргеш, Хемчик кашпалынга чыгап келгеш: «Ам-на кай баарыл бо!» дижип турда, дүне када чалым шаккырайнып хонаар болган. Эртенинде көөрге, дээрде шашкан чалымнарны кержек-бите альдынның дуюунга өйлэй кертип чорааш, ажа берген болган.

Хөй шериг оон-на оюп-кыйып чорааш, сүрүп кээрге, Самианы ажып чыткан. Чүгле бөргүнүң дошказы шала көстүп

бар чыткан. Сарыгларның Булдулдай маадыр деп кижи ону үзе адып чыдып калган чүве дээн.

Амыр-Санаа түмен-сая кыдат, моол шериглерге алдыrbайн, ынчалдыр-ла орус чуртунче дезип кире берген. Ол: «Коданың кулааның каразы, астың кудурууунуң каразы чидерден бээр; чаш уруг ыңаалап ыглаардан бээр; сандан ыяш ирип дужерден бээр ядышы чоннуң дең төрөзин мен тудар мен» – деп аашкынган дээр чүве.

Амыр-Санаа база катап чуртун эргиir дээш, чоруп олургаш, орус чурту бир хоорайга хайнып турган паштан: «Аас-кежии чайлаар» – дээш, хой чодазы ап алгаш халыткаш, Шеми-Аксында Соксаал деп тейниң кырынга тура дүшкеш көөрге, хойнуң чодазы сооваан, бузу буруцайнып турган. Ол тейниң кырында тос-таңма деп паш аксы хире калбак дашта айт изи бар. Ооң аъдының изи ол.

Барыын кожуунда Базырык, Тээли деп тейлер бар. Ында база калбак дашта айт изи бар. “Соксаалга соксадым, Тээлээ тептим, Базырыкка бастым” – деп турган деп, Амыр-Санаа дугайында бистиң өгбелеривис чугаалажыр.

Шынап-ла, тыва улустуң Амыр-Санаа дугайында чугааларында, үени өттур көрген-даа дег, элдеп-кайгамчыктыг утка бар. Октябрьның чырыы соңгу чүктен солаңгылап кээрин бодаарга, Амыр-Санааның күзели-бile кара ояар де!



1. Төөгү чугаада чоннуң кандыг күзел-бодалы илереттингендир, тодарадыңар.

2. Амыр-Санаа дугайында төөгү чугаада хөөредигниң чижек-терин тывыңдар.



3. Өске чоннарда Амыр-Санаа дугайында төөгү чугаалар бар бе, тодарадып шинчилеңер.



4. Амыр-Санааның эрткен оруун картадан көргүзүңдер.

5. Улуг улустан дыңнаан төөгү чугааларны чыyp бижинер.

Кыры сөөгү

Тывалар өлүрген малының хүндүлүг сөөктерин: калбак чарын, кыры, кажық, довук, курутай, баш (ылаңгыя ат бажын) уш-баш чок октавас. Чарынны өрттеткеш, чарын салып деп чүве бар. Кажыкты, курутайны чынып алгаш, ойнаар. Довукту чараштыр хемдиирге, уруглары чараш болур дээр. Кырыны тываларның хүндүлээр чүвези — аал, өг кадарчызы болзун дээр. Коданга чүве кирбезин дээш, хемдээш, хана бажынга азып алыр. Уруг-дарыны доктаавас азы ийи-чаңгыс уругларлыг өглер суг кырыны хөлчок хүндүлээр.

Шаанды кырган-авам мындыг тоол чугаалаар чүве: “Кадайның чаңгыс оглу аңнаар, ол аңнааш-ла, олчалыг чанып кээр. Кожазында аалдың оолдары үш алышкы база аңнааш, олча чок болурлар.

Кандыг кончуг хоранныг кулугур боор, өлүрүп каапкаш, олчазын, алгы-кежин ап алышлыцар — дишкенинэр.

Кежээ одаанга кедеп чеде бергеш көөрге, чаңгыс оолдуң одаан долгандыр дөрт-беш-даа кижи олуруп алган шайлап, хөөрешкен органнаар. Алышкылар каш-даа кежээ кедеп кээрлерге, оол чааскаан эвес болгаш тураг мындыг.

Чаңгыс оол бир-ле хүн одаанга келгеш, барбазын үжээрge, хүнезини төнүп тураг болган. Холун суккаш, барбазын үжеп орарга, дөрт-беш хире кыры сөөктери барба дүвүнде чораан. “Авамның хөкүүн, куу сөөктерни чоп суп турган кижи боор” дээн бодал-бile оларны уштуп октагылап-тыр эвеспе. “Чаа, шайлап алгаш, удуп чыдып алгаш, эртен-даарта чанар-дыр, алгы-кежим ам четчири” дээш, одаан салып, шайлааш, удуп чыдып ап-тыр.

Демги алышкылар ам-на кедеп кээрлерге, оолдуң одаа ээн, боду удаан чыдып-тыр эвеспе. Алышкылар чаңгыс оолду өлүргеш, алгы-кеш олчазын үптеп алгаш, халдып чана бериптирлер эвеспе.

Ынчап авазының камгалап чорзун дээш суп берген кырыларын уштуп октагылапкаш, кады төрээн чүвелери чок оол

амы-тынындан чарылган чүвең иргин” — деп, кырган-авам тоолдап бээр чүве.



1. Чогаалда кандыг кол бодал илереттинген-дир?

2. Шагаа байырлалының үезинде кыры сөөгү-бile холбашкан ёзулалдар дугайында дыңнадыгдан белеткеңер. Чечен чогаалдардан чижектер-бile бадыткаңар.

3. Тыва улустуң ёзу-чаңчылдары, чүдүлгө-сүзүглелдери-бile холбашкан мал-маганының ыдыктыг сөөктериниң дугайында кандыг төөгү чугаалар азы сагылгалар билир силер, чугаалаңар.

4. Сөөктер аттары кирген үлегер домак, чечен сөөстер, тывызыктар билир силер бе? Кыдыраажыңарга сактып бижип алышар.

Чижээ: Дөрбелчин боттуг,

Дөрт чүзүн малдыг. (Тывызык: *кажык*).



5.”Кыры шимчээрge, хырын тодар” деп үлегер домакка дүүштүр чогаадыгдан бижиндер.



6. Бавуужап Ондарның “Төлгө бижии” деп тоол аяны-бile бижээн шулүглелин улуг улус-бile кады номчааш, сайгарыңар.

Хөөмейллээр Бүдүкпен

Таңдының Межегейге хөөмейллээр Бүдүкпен деп кижи чурттап чораан. Алыс боду ядыы арат. Таңдының Ары болгаш Өвүр талаларынга Бүдүкпенге чедир хөөмейллээр кижи турбаан чүве-дир.

Бүгү Таңды-Тываны чагырган Амбын ноян ону арт-сын ажылдыр кыйгырып эккелдиргеш, хөөмейледип чораан. Бурунгаар Кыдат болгаш Моолдан улуг дужаалдыглар келгенде, Таңды-Тываның бүгү кожууннарындан эрге тутканнарны кыйгыртып эккелгенде, оларга аян тутсун дээш, ыяап-ла Бүдүкпенни элчи каксып кыйгыртыр турган. Бүдүкпенни эдерткен дүжүметтер Межегейден үнгеш, Чагытай хөл таварааш, Таңды сынын тавартыр Самагалдайже ажыптарлар. Чайын безин элик кежи чаргаш алгы тоннуг чоруур Бүдүкпен чавыт эзерлиг аъдынга бодунуң чазап алганы дошпулуурун

туткаш, аyttаныптар. «Эзенгилерин дыңзыдып» алгылаан, каас кыдат торгу тоннарлыг ийи дүжүмет Бүдүкпенниң мунган аъдының ийи талазындан чүген дээрбээнден тудуп четкилээш, чөлзиптерлер.

Бүдүкпен боду ийи чеңнерин берзенипкеш, дүжүметтерден бажы бедик кылдыр олурупкаш, дошпулуурлавышаан хөөмейлеп, сыйыртып чоруп орап. Хөөмейге таалаан аyttар безин хову черлерге челижин чаңгыс аайлаштыр челиптерлер. Бүдүкпенниң ийи талазында ооң аъдын четкен дүжүметтер болгаш оларның эдеринчилери, чалчалары ыыт-шимээн чиде бергилээн, узун чеңнериниң уштуктары-бile карактарын чоткулап каап, чоруп оргулаар турган. Черниң ырак-узаа-даа, кадыг-берти-даа билдиртпейн баргылаар. Бүдүкпенниң хөөмей-сыгыды арга-каскакка чаңгыланы бээрge, ону дыңнаап, таалаан өөр-бөлүк аңнаар безин орук хажызында дыңнааш тургулаптар. Самагалдайже ажып кээп, Амбын ноянга бараалгап келирлер. Ноян бодунуң улузун келдирип алгаш, Бүдүкпенге:

— Хөөмейлеп оол! — деп дужаап каар.

Бүдүкпен дыка-дыка хөөмейлей бергенде, ооң кежегези сорая бээр дижир. Амбын ноянны хүнде үш катап ыглаткаш, ам Бүдүкпен сеткили ханар турган дээр.

Хөөмейлээр Бүдүкпенни дыңнаар дээш, Салчактың нояны ону Каа-Хемче каш-даа катап кийгырткылап алгаш барып тургулаан.

Бүдүкпен муңчулуп-муңгарай бергеш, хөөмейлей бергенде, ооң аъдының карааның чажы төктүп, ыды безин улуй кааптар турган.

-
-  1. Чогаалдың маадыры хөөмейлээр Бүдүкпенниң аажы-чаңының онзагайы чүдел? Бүдүкпенниң хөөмейин дыңнаан улус — дүжүметтер, эдеринчилери, Амбын ноян ону канчаар хүлээп алыр турганыл? Аъдының, ыдының ацаа хамаарылгазы кандыгыл?
 -  2. Чогаалдың планын тургузунцар.
 - 3. Силерниң кожуунуцарда кандыг хөөмейжилер барыл, таныштырыңдар.
 - 4. Тыва хөөмей-сыгытты шинчилээн эртемден кымыл? Ооң кандыг ажылдарын билир силер?



5. Тываның улустуң хөмейжилерин адаңар. Оларның дугайында альбомдан долдурунар.



6. Тыва хөмейжилер дугайында видеороликтерден көрүңер, оларның дискилерин дыңнаңдар.

Тыва тоолчургу болгаш төөгү чугааларны шинчилеп келгени

Тыва улустуң янзы-бүрү темаларга хамаарышкан төөгү чугаалары кончуг хөй. Оларның иштинден Амыр-Санаа дугайында төөгү чугаалар чер-черлерде элээн нептереп тараан. Төп Азияны шинчилеп чораан аян-чорукчулар 19 чус чылда-ла Моолга чоруп чорааш, Амыр-Санаа дугайында төөгү чугааларны чыып бижигилээн. Дыл эртемдени Б. Я. Владимирцовтуң бижээни-бile алырга, ук төөгү чугааларның нийти утказы мындыг: Амыр-Санаа бодунуң ийи эжи-бile (У-нойон, Шыдарван) Пекинге өөренип тургаш-ла, моол аймактарның каттышкан күжү-бile маньчжур дарлалды узуткааш, Моолду оон хостаар деп шиитпирлеп алган. Амыр-Санаа Моолдуң Кобдо аймааның амбыны болу бергеш, сорулгазын күүседир деп турда, эжиниң бирээзи (Улясутайга турган У-нойон) өскерилгеш, өөрүн садыпкан. Шыдарван шаажыладып өлүрткен, а Амыр-Санаа шерии-бile Тыва таварып Россия же дезипкен. Ооң амыдыралчурталгазы болгаш маадырлыг чоруктары ол үеде, база-ла моол улус дег, маньчжур-кыдаттың аар-берге дарлалының адаанга базындырып чораан тываларның аас чогаалында артып калгылаан.

Тыва улустуң тоолчургу болгаш төөгү чугааларын чыып бижиирин болгаш шинчилээрин XIX вектиң ийиги чартыында Тывага шинчилел ажылы кылыш чораан эртемденнер эгелээн. Оларга В.В. Радлов, Г.Н. Потанин, Г.Е. Грумм-Гржимайло, Н.Ф. Катанов болгаш өскелер-даа хамааржыр. Тыва эртемденнер тоолчургу болгаш төөгү чугааларын чыып бижиирин уламчылаан. «Кыс-Халсыр» (Д.С. Куулар, Ч.Ч. Куулар), «Тыва улустуң мифтери болгаш тоолчургу чугаалары»

(А.Д. Арапчор), «Чылбыга Айны канчап сыйрыпканыл?» (З.Б. Самдан) деп төөгү болгаш тоолчургу чугаалар чыныңдыларын үндүрген.

Тыва улустуң тоолчургу болгаш төөгү чугаалары ки-жизидикчи ужур-уткалыг. Олар кижини сонуургаачал, эске-риичел, төөгүчү, чечен-мерген, амыдыралчы кылдыр өөредир шынарларлыг.

Амгы үеде Тываның гуманитарлыг шинчилдер институтунда тыва төөгү болгаш тоолчургу чугааларны чынып бижири, шинчилээри уламчылап турар. Россия чоннарының аас чогаалын шинчилээниниц түңнелинде «Памятники фольклора народов Сибири и Дальнего Востока» («Сибирьниң болгаш Ыраккы Чөөн чүк чоннарының аас чогаалының тураскаалдары») деп улуг ном бижиттинген. Ында тываларның тоолчургу болгаш төөгү чугаалары база кирип турар. Тыва төөгү болгаш тоолчургу чугааларны школаларда, ортумак болгаш дәэди өөредилге черлеринде өөренип турар.

Чурук-бите ажыл.



1. Улустуң аас чогаалының кайы хевиинге таарыштыр чураан чурук-тур? Харыңдарны эге класстарга алган билииңерге даянып, бадыткаңар. Чогаалдың утказын сактып чугаалаңар.

2. Чуруктуң автору кымыл? Чурукчунуң дугайында чүнү билир сiler? Немелде литератураны болгаш улуг улустуң тайылбырын ажыглаңар.

3. Чурукта тыва улустуң әдилелдерин айтыңар, аттарын ушта бижээш, тайылбырлыг словарларыны ажыглап тайылбырлаңар.

4. Чогаалга хамаарыштыр боттарыңар чуруктан чогаадып чуруңар.

Тыва улустуң ырлары

Кадарчы

Кадаарда хоюм чараш,
Катаң сөгләэр авам эки.
Үндүрерде хоюм чараш,
Үттеп сургаар авам эки.

Кадаарда хоюм чараш,
Харап көөрде тейим бедик.
Үндүрерде хоюм чараш,
Үнүп көөрде тейим бедик.

Ала караан дешкен болза

Кулун, чаваа куруг кагган
Кулугурну – коккааракты.
Куруг черге хуу шииткен
Куурумчу дүжүметти.

Ажы-төлүм боскун кескен
Аш-ла бөрү – коккааракты.
Актыг черге аъдым алган
Адыгырны – дүжүметти.

Аъдым чиген коккаарактың
Азыг-дижин сыккан болза!

Адам каккан дүжүметтиң
Ала караан дешкен болза!

Инээм чиген коккаарактың
Ийи-ле азыын сыйкан болза!
Ием каккан дүжүметтиң
Ийи караан дешкен болза!

Межегей

Улуг-Хемге таваңгайлаан
Улуг-Ийим, Кадыр-Ийим,
Уруг чаштан ойнап өскен
Улуг шынаа Межегейим.

Каа-Хемге таваңгайлаан
Кадыр-Ийим, Калбак-Ийим,
Кара чаштан ойнап өскен
Калбак шынаа Межегейим.

Аткан даңның сырнында
Адыр тейден бараан хараар,
Алдыы-Межегей — Сарыг-Булун
Кандыг янзы чыдыр ирги?

Алды-ла айның болчаандан бээр
Адыр тейден хараар боор сен,
Алдыы-Межегей — Сарыг-Булун
Чайыннанып чыдар боор он.

Үш-ле айның болчаандан бээр
Үш-ле дыттан хараар боор сен,
Үстүү-Межегей — Күжур-Булун
Үзүк ногаан чыдар боор он.

Самагалдай

Дооразындан харап көөрге,
Торгу хээлиг Самагалдай.
Топтавыла көрбээн кижи
Довурактыг дээр-ле боор он.

Хажызындан харап көөрге,
Хана хээлиг Самагалдай.
Караа-бите көрбээн кижи
Хая-даштыг дээр-ле боор он.

Адаанайдан харап көөрге,
Ажык шөлдүг Самагалдай.
Аргывыла чорбаан кижи
Арга-даштыг дээр-ле боор он.

Үстүүнейден харап көөрге,
Үлегер дег Самагалдай.
Үргүлчү-ле чорбаан кижи
Үзүүк суглуг дээр-ле боор он.

Хандагайты

Удазынныц ужугу дег,
Узун баткан Хандагайты.
Уран кыстар даараан ышкаш,
Угулза дег Хандагайты.

Хааржактыц сенчизи дег,
Калбак баткан Хандагайты.
Калга кыстар даараан ышкаш,
Каас-чараш Хандагайты.

Успа-Хөлче удур көрген
Улуг-Тербис, Башкы-Тербис.

Уруг чаштан ойнап өскен
Улуг шыктыг Хандагайты.

Кара-Хөлче харап көрген
Кадыр-Тербис, Башкы-Тербис,
Кара чаштан ойнап өскен
Калбак шыктыг Хандагайты.

Очаландан кедилерин

Очаландан кедилерин
Орус арат айтып берген,
Октябрьның хувискаалын
Ол-ла черден делгереткен.

Чеди чааның хувискаалы
ССРЭ-ден өөскәэн-не ийин.
Черлик чораан арат-ла чон
Чер-ле черде хувискаады.

Ам-на бо-ла сорулганы
Азий дипке делгереткеш,
Арат хөйнү катыштыргаш,
Амыр-чыргал әдиләэн бис.

Анаа-ла орган херээ-ле чок,
Аңгы херээн камгалаалы!
Арат түмен бүгүдеге
Артык эрге тыпсырылышар!

Тооруктуг долгай таңдым

Тооруктуг долгай таңдым
Долганзымза, тодар-ла мен.
Тос-ла чүзүн малымайны
Доруктурза, байыры-ла мен.

Эзириктиг ээр-ле тандым
Эргизимзе, тодар-ла мен.
Эрээн-шокар малымайны
Азыраза, байыр-ла мен.

Өдүген-Тайга

Өдүген-Тайга чурттуг-ла мен,
Өлең сиғен чыттыг-ла мен.
Чалым тайга чурттуг-ла мен,
Шаанак сиғен чыттыг-ла мен.

Эдер чарың мунуп алгаш,
Элиин будун дергилеп кел.
Мынды чарың мунуп алгаш,
Мыйгааң будун дергилеп кел.

Чашпы-Хем

Аалдар чайлаар аяң шыктыг,
Айы, бези арбын Чашпым.
Айлық черден келген кижи
Айын, безин кайгап чанар.

Өглер чайлаар өлең шыктыг,
Өлүк-дииңи өргүн Чашпым.
Өске черден келген чоннар
Өөрүшкүзү ханып чанар.

Чашпы-Хемниң чаш-ла хаакка
Чадаганнап орбадың бе.
Чара чөлзип келиримгэ,
Чашты хона бербедиң бе.

Хөнү баткан Чашпы-Хемге
Хөөмейлеп орбадың бе.

Хөмө чөлзип келиримгэ,
Көрбээчөнөй бербединц бе.

Алды баштыг Кара-Дагны

Алды баштыг Кара-Дагны
Аал-ла кылып алышылыңар.
Алызында барып-барып,
Амыр-шөлээн чурттаалыңар.

Оргу шөлдүг Кара-Дагны
Оңгу кылып алышылыңар.
Опчок, хоптак Сенгинчики
Ол-ла черге даяладыыл.

Чеди баштыг Кара-Дагга
Четтиrbейн баргай-ла бис.
Алды баштыг Кара-Дагга
Алдыrbайн баргай-ла бис.

Кашпал, кадыр Кара-Дагны
Кансы³ кылып алышылыңар.
Оорарган Оргу-Шөлдү
Олбук кылып алышылыңар.

Дөгэ-Баары

Дөртен альтты чарыштырган
Дөңгеликтиг Дөгэ-Баары.
Дөртен шериин чыскаап сургаан
Төп-ле черде дөрт-ле яамы.

³ Кансы – ширээ.

Бежен аyttты чарыштырган
Бедик чаагай Дөге-Баары.
Бежен шериин чыскаап сургаан
Белдир черде беш-ле яамы.

Алдан аyttты чарыштырган
Агылыг-ла Дөге-Баары.
Алдан шериин чыскаап сургаан
Арат чазак алды яамы.

Ыр, кожамык дугайында билиг

Тыва улустуң аас чогаалында улустуң ыр, кожамыктары кижиниң чуртталгазының эдеринчили болуп, амыдыралдың болуушкуннарын болгаш оларга хамаарылганы эң бөдүүн болгаш тода кылдыр көргүзүп чоруур. Ыр, кожамыкка кижи сеткил-хөңнүн илередир.

Ыр, кожамык шүлүк тургузулуг болур, аялга-бile ырлаарынга таарыштыр чогааттынган. Ыр болгаш кожамык, бир талазында, шүлүк чогаалынга, ийи талазында, хөгжүм чогаалынга хамаарылгалыг.

Ырларның аялгалары аңгы-аңгы, оран-чурт, ажыл-агый, амыдырал-чуртталга, ынакшыл дугайында чогаалдар болур.

Кожамык дээрge дүрген аялга-бile күүседир, ынакшыл болгаш кижилер аразында харылзаалар дугайында чогаалдар болур. Олар кижилерниң кандыг-бир четпестериниң, аажы-чаңының дугайында шоодугулуг, кочулалдыг, баштак уткалыг чогаалдар-даа болгулаар.

Тыва улустуңырлары тема талазы-бile байлак. Оларда төрээн чедин ырлап, төөгүнүң болуушкуннарын илередип, күш-ажылды алдаржыдып, айт-хөлүн мактап, ынакшылды алгап, өскүстүң амыдырал-чуртталгазын көргүзүп, кижилерниң амы-хууда харылзааларын-даа көргүскен боор. Аас чогаалының онзагай

хевири болбушаан, ыр, кожамык нийтилел амыдыралының хөй-хөй айтырыгларын көргүзүп келген.

Чогааттынган үезиниң айы-бile ырларның уткалары, темалары аңғы-аңғы боор. Шаандагы үеде тывылган ырларда феодалдарга, лама, хамнарга удурланыштын, хосталга дээш демисел, хөрөжен чоннуң аар-берге салым-хуузу, ынакшыл, чаагай амыдырал дугайында күзел-чүткүл тодазы-бile илерээн. Ооң соонда тывылган ырларда тыва улустун даштыкы эжелекчилерниң болгаш иштики феодалдарның иийи дакпыр дарлалындан хосталганин, Тывага улусчу революцияның тиилээнин, улустарның найыралын, интернационалчы найыралды болгаш совет чуртунга ынакшылын болгаш ёске-даа чугула темаларны көдүрген. Кижизиг мөзү-бүдүшту хажыдар, күш-ажылдың сагылга-чурумун хүндүлевес чоруктарга болгаш ёске-даа четпестерге удур угланган шоодуглуг база шүгүмчүлелдиг ыр, кожамыктар кайы-даа үелerde чогааттынып турган болгаш тураг-даа.

Тыва улустун ырларын, кожамыктарын чон чогааткан. Оларның аразында доктаамал аялгалыг ырлар хөй эвес. Оларга “Самагалдай”, “Кадарчы”, “Хандагайты”, “Межегей”, “Ала караан дешкен болза” дээн ышкаш ырлар хамааржыр.

Чер-чер айы-бile азы күүседир кижиниң аяны-бile кожамыктарның аялгазы хостуг, сөзүглелдери аңғы-аңғы вариантыларлыг болур.

Улустун ырларының, кожамыктарының дылы уран-чечен. Салгалдан салгал дамчып, амгы үеге чедир улам чаарттынып сайзырап тураг. Тыва улустун ырларын, кожамыктарын ыраажылар, хөөмөйжилер, тыва хөгжүм ансамбльдары күүседип, делегейниң чоннарынга таныштырып тураг.



1. Ыр болгаш кожамыктың аразында ылгал бар бе, номчаан чүүлүцерге даянып, сайгарыңар.
2. Номда кирген ырыларның сөзүглелдерин кичээнгейлиг номчааш, оларны бөлүктөрөгө чарыңар. Чижээ: чер-чурт дугайында, төөгүлүг дээш о.ө.

- 3.** Боттарыңарның билир кожамыктарыңарны чыyp бижицер.
- 4.** Тыва улустуң ырларын күүседип чоруур суралгыг ыраажылар, ансамбльдар дугайында дыннадыглардан кылыңар.
-  **5.** Ырларның сөзүглелдерин шээжилеп алгаш, ырлап өөреницер. Ында уран-чечен аргаларны тывыңар.
-  **6.** Бөлүктөргө үстүп алгаш, кожамыкка мөөрөйлөжиңер.
- 7.** “Хүн-Хүртү”, “Чиргилчин”, “Тыва” болгаш өске-даа ансамбльдерниң компакт дискилерин дыңнаңар.
- 8.** Дараазында ырларның сөзүглелдерин тыпкаш, номчуңар. Аялгаларын башкыңардан, ыры-хөгжүм башкызындан азы улуг улустан айтырып алыңар: “Бай-ла-Тайга”, “Калдак-Хамар”, “Баар оруу көгээрелдиг”, “Эрге-шөлээ бисте турда”, “Төп-ле сургуул”, “Чыраа-Хоор”, “Көшкүн арат”, “Конгурай”.

Алгыш-йөрээлдер

Алгыш-йөрээлдер чоннуң амыдыралы-бile холбаалыг дөлөгейде өндүр улуг болгаш өске-даа сүзүктүг чүүлдерге турас-кааткан шүлүк тургузуглуг аас чогаалының биче хевиринге хамааржыр уран сөс болур. Улустуң чаагай күзелдери кыска, уран-чечен одуруглар-бile илереттинер.

Алгыш-йөрээлдер аразында дараазында бөлүктөргө чарлып туар: алгыштар, чалбарыглар, макталдар.

Куда-дой дүшкенде, уруг төрүттүнгенде, баш хылбык-таанда, чаа өг тиккенде, байыр-наадымда *алгыш-йөрээлдерни* салыр.

Аңчылар, балыкчылар, ырак-узак чер чораан улус улуг арт ашканда, кежиг кешкенде, оран-делегейден кежик дилеп, олча күзеп, өршээл дилеп *чалбарыглар* салыр.

Хүрешке шүүлген мөгеге, чарышка эрткен айтка *мактал* тудар.

Тыва чон шаг шаандан бээр сөстүң хуулгаазын күжүнгө бүзүреп, сагыш-сеткилин, күзел-бодалын алгыш-йөрээлдерге илередип чораан. Амгы үеде тыва алгыш-йөрээлдер улам сайзырап, эртем талазы-бile шинчилеттинип туар.

Өг-бүле туткан аныяктарга йөрээл

Хараган дег малдыг болзун,
Хая дег эттиг болзун!
Челип четпес челелиг болзун,
Шаап четпес коданныг болзун!
Эдилээни мөңгүн болзун,
Эзертээни чыраа болзун!
Торлаа ышкаш өөр болзун,
Торга ышкаш каас болзун!
Узун назын назылазын,
Уруг-дарыы көвей болзун!
Кырган назын назылазын,
Кылган ижи бүдер болзун!
Кадыг таакпы тыртпазын,
Кара арага ишпезин!
Дыңнаан чүвезин чажырбазын,
Тыпкан олчазын харамнамазын!
Чоруу чогуп чорзун,
Чораан черинге хүндүлөтсүн!
Дөң черге өөн өглөп,
Дөлем черге малын чалазын!

Аңчының чалбарыы

Адак узактан сени сурап,
Аңнап келдим, алдын Таңдым!
Саңым салып, чалбарып,
Чажыым чажып олур мен.
Бээрицни белеткеп,
Алырымны аайлаштырып,
Караамга көзүлдүрүп,
Кара боомга дээртип,
Өршээп тур, алдын Таңдым!
Будуун аразынга бузурба,
Чаадың алдынга чажырба!

Караан хаштап,
Кулаан куйлап бер!
Өзенингө өөртүп,
Каскааңга каттыртып тур!
Соп чиир чилиглиинден,
Соргулаар чаглыындан.
Палт дээш,
Баарынга дегзин!
Дизиг сыңмас
Дииң, киштен,
Артыг сыңмас
Аң-менден хайырла, алдын Таңдым!

Шүүлген мөгеге мактал

Дуран болган карактыг,
Туман болган тыныштыг,
Тун дег ак диштиг,
Турган боду арзылаң боттуг,
Калбак дашка тайбас,
Кадыр черге ушпас,
Алдан дөрттү шүгген
Арзылаң мөгө бо-дур!
Аңаа алдар болгаш мактал!
Алдар болгаш мактал! Курай! Курай!

УЛУСЧУ ЭРТЕМДЕН ОНДАР ДАРЫМАНЫҢ ЧЫЫП БИЖЭЭНИ
УЛУСТУҢ ААС ЧОГААЛЫНЫҢ ҮЛЕГЕРЛЕРИ

Оран-таңдыга чалбарыг

Өршээ хайыракан!
Алдыгым, үстүгүм, Хайыракан!
Алдын делегейим, Хайыракан!
Тос дээрим,
Долаан бурганым, Хайыракан!
Алажым, Хемчиим,

Ак баштыг Бай-Тайгам,
Өршээ, Хайыракан!
Дөрт чүгүм,
Дөрбен тайгам, Хайыракан!
Хонган хонажым,
Хоор чонум,
Бак чүве ыңдай турзун!
Эки чүве бээр турзун, Хайыракан!

Альтка мактал

Эки бениң төрүп бергени
Эки Хүрең аъдым.
Хомду болган сынныг,
Хүртү болган кулактыг,
Каң хоо дуюглуг,
Хүмүш болган чүген суккан,
Арт болган аңгайган эзерлиг,
Хову болган чонактыг,
Тос коннун кожа тырткан,
Кудуругун баглаан,
Кудургазын сөөрткен,
Чели, кудуруу
Черинге дөжелген,
Сес чоруу дески чоруур,
Дүктүг даванынгга четтирбес,
Чүглүг кудуруктууга четтирбес,
Булуттүг дээрниң адаа-бите,
Будуктүг ыяштың кыры-бите маңнаар,
Эки бениң төрүп бергени
Эки Хүрең аъдым аар, оой!



Хам алгыштары

Хам алгыштары — тыва улустуң аас чогаалында онзагай черни ээлеп тураг. Хам алгыштары эрте-бурунгу үеден бээр

туруп келген тыва алгыш-йөрээлдерниң шажынчы хевири болур. Ында чамдык билишиккіннер солун.

Хам кижилер онзагай салым-чаянның, тускай ук-дөстүг болур. Ынчангаш олар укталган черинден алганыр. Чижээлээрге, дээр уктуг, даш көжээ уктуг, ызыгуур салгаан, чер, суг ээзинден укталган хамнар дээш оон-даа ёске.

Хам алгыштары шүлүк тургузуглуг, бурунгу шүлүк чогаалының үлөгерлери болур. Оларны хамнар алганып ыдар. Бир солун чүвези — оларны удур чогаадып алганыры болур.

Хам алгыштары кижиниң аарыг-аржыын экиртиинге, ажыл-агыйын чогударынга, багай чуведен адырарынга — амыдырал-чуртталганы чогумчалыг болдуурагынга чоннуң бүзүрелин эгидеринге ужур-дузалыг аас чогаалы болур. Тываның улустуң чогаалчызы, эртемден М.Б. Кенин-Лопсан хам алгыштарын хәй чылдар дургузунда чыып бижээш, эртем талазы-бile шинчиллээн. Ооц “Тыва хамнарның алгыштары” (1995) деп ному орус-тыва дылдарда парлаттынып үнген.

Күжүгет Серен хамның чаштарны алганганы

Уруг чаштар, үре-төлдер!
Уян болбайн, эрес болзун!
Бочургалап частыр болзун!
Бора-хектеп өзөр болзун!

Бочурганың чечээ-ле ышкаш,
Бора-хектиң чалгыны дег,
Бүгү чоннуң чаш-ла төлү
Бурун менди өзөр болзун!

Хамның Шагааны алганган алгыжы

Үнген айның чаазында
Үнер чылдың бажын уткуй
Улустарның хай-бачыды
Улчуп-хадып тайлыр боор деп,

Үнген хүннүң эртезинде
Ширээ дашка сацым салып,
Шиник хевим хевей кедип,
Омаам кирип хамнаап тур мен.

Кодан-чурту арыг бе деп,
Кокпа-шыныры менди бе деп,
Дымаа-ханаа сол-ла бе деп,
Дыңнаан чүве тайбың бе деп,

Дүңгүрлүгнүң дүвү мындыг,
Дүпкө тейлээр салым мындыг.
Орбалыгның оруу мындыг
Оранга тейлээр салым мындыг.

Амыр чоруур арга дилеп,
Чолукшуурну ёзу бодап,
Дөргүл-төрел угун сактып,
Дөрт-ле таңдаа тейлеп тур мен.



1. Алгыш-йөрээл деп чүл? Алгыш-йөрээлдерниң бөлүктөрөн чугаалаңдар.

2. Алгыш-йөрээлдерде чоннуң кандыг күзелдери илереттингенил?

3. Өг-бүле туткан аныяктарга йөрээлде “Торлаа ышкаш өөр болзун”, “Дыңнаан чувезин чажырбазын, тыпкан олчазын харамнанмазын!” дээн күзээшкүннөрниң утказын канчаар билип тур силер?



4. “Дөжек дой” база “Хылбык дой” байырлалдарга хамаарышкан алгыш-йөрээлдерден бижинцер. Уран номчулга мөөрэйиндөн эрттирицер.

5. Хам алгыштарының онзагайы чүдел? Хам алгыжы дыңнаан силер бе? Оон утказын канчаар билип алдыңдар?



6. Алгыш, чалбарыг азы макталдан чогаадыңдар.



7. Алгыш-йөрээлдерни чечен чогаал сөзүглөлдеринде ажыглап тувар бе, чүгэ? Оларның чижектөрдөн тывыңдар.

Авторлуг тоолдар

Степан САРЫГ-ООЛ

Агар-Сандан ыяш

Шылан ам, араатан дайзыннар этт чиир эрге чок бооп, арзылац-парларның азыг-диштери турлуп чаштап, алдын делегейниң хөрзүнүнгө ачылыг төре доктаап, шаг төре өскерлип, шарайин шажын өрттенип турага шагда чүвөң-даа иргин ам.

Арзайтының ары чарыындан адырланып үнгеш, Өлчейтиниң өвүр чарыындан өөштенип үнгеш, делегейни депшилдир аккан, дарган кижи таптап каан ышкаш, уран уруг угулзалап каан ышкаш узун ак-көк Улуг-Хемниң унунда даспы көк хаялар биле кашпалдандыр аккан, хамык чоннуң чайлаа болган, хараачыгай күштүң уязы болган, энерелдиг, байырымныг, эртинелиг, байлактыг Каа-Хем биле Бии-Хемниң белдириндөн бойдустуг делегейге бодарал көрбээн, будук бүгүдээзи чигирчилистиг, дазыл бүгүдээзи далган-тараалыг, өртемчейниң үнүш-бойдузунга үрелиг-ачылыг Агар-Сандан ыяш бодарал үнген-даа чүвөң иргин эвеспээ!

Ам-даа чүзү боор чүвөң ийик, биеэки Агар-Сандан ыяштың чигир-чилистиг, айдызалдыг-аңгаралдыг чаагай чыды үстүнчө үжен хонуп четпес, адаанче алдан хонуп четпес делгем улуг девискээрниң аң-мең амытаннарының аксы-думчуу, өкпе-чүрээнгө тоннуп чедип турага бооп-тур эвеспэ.

Хамык аң-мең амытаннар: «Чүү мындыг магалыг чаагай амдан чыт болду бо? Моең ачы-буянынга даянып, чигирчилизин четтирип болуру кандыг ирги» дишкеш, оон-моон кызыл үер дег кыйбыңайып, байыр-наадым болган ышкаш, ырлыг-шоорлуг кээп турган-даа чүвөң иргин.

Хамык амытан чыглып кээрге, Агар-Сандан ыяш узун чаагай холун сунуп, хүннээрек чаагай хүлүмзүрүп көргеш, ыыткыр мерген үнү-бile ырлай аарак чарлык бооп туруп-тур оо:

— Мээн чигир-чимизимни силерниң чириңдер-даа албан, мээн ачы-күжүмге силерниң даянырыңар-даа албан: мен болза силер бүгүдээниң түмен чылда түрээн түрээндерден, төккөн дериңер, аккан ханыңардан, түрлүг, күштүг килеңиңдерден төрүттүнгөн, ажылды кылтыр амытанга ачы-буяным үстүп, соглуп болбас Агар-Сандан ыяш мен!

Ындыг болза-даа, силерниң араңарда мээн ачы-күжүмнү көрбестер-даа бар, мээн чигир-чимизимни чивестер-даа бар. Кымнарыл ол? Чырык хүн алдынга ажыл-үүле-даа кылбас, ачы-буян-даа сагынмас, дөмей-ле кады төрүттүнүп келген кожа-холбаа, аймак-хелбээ өөрүн ыялап базымчалап, тудуп чип чоруур этт чиир, хан ижер кара маңгыс араатаннар ол деп билип алыңар. Силер оларны билирден артык билир, көөрден артык көрген-даа силер. Олар мээн ачы-күжүм көрүп, чигир-чимизимни чиир байтыгай, харын оларны бо делегей кырындан чемиш тып чиир эргезин кызыгаарлаан номнал, дүрүмнү чарлаалыңар! — деп, хову сыңмаажа хорадап кыйгырып, арга сыңмаажа ажынып кыйгырып-даа турган чүвең эвеспе.

Аастыг-диштиг араатаннарга одура оъттадып, кезе хемидидип, амыр-чыргал чок чораан амытаннар Агар-Сандан ыяштың ол чарлынын дыңнааш, каттырбаан каттызын каттыржып, хая-дажы алдын-мөңгүн кылдыр эзилгиже каттыржып, өөрбээн өөрүшкүзүн өөрүп, өлең-сиген өктереп үнүп, чечектелгиже, өөрүп туруп-турлар эвеспе!

Шак оон ам чүзу боор чүве ийик, демги дүктүгнү дүгү-бile чип, ханныгын ханы-бile чип чораан маңгыс араатаннар: адыг, бөрү, арзылан, ары, чыландан эгелээш, угаан-медерелин оскунуп, ужу-бажын сугар чер тыппайн, малгаштыг-малгаштыг черлерге бадырткайндыр багын борап, шириктиг-шириктиг черлерге сидирткейндир хирин борап, карактарын хавыйтыр ыглажып, дыргактарын дыралдыр маңнажып, дойлуп тургулаан дижир чүвең ыйнаан.

Амыраан, хосталган амытан бүгүдээ амданныг чаагай чигир-чимизин чип, амыр-тайбың чуртталгазын чурттап, ачылыг-буяныг Агар-Сандан ыяжының үрелиг чаагай дазылын

улам-на быжыглап, хөрзүннеп, суггарып, танышпаан боттary танышып, көрүшпээн боттary көржүп, уядан уран уяны тудуп, хоргадан уран кода-балгадын тудуп эгелеп-даа турган чүвөн иргин ам.

Араатан дайзыннаар амыдыраар арга чок бооп, хозавас улуг хырыннары хозап, туразында чуура дайнаар чуурга бэзин тывылбас болуп, өлүрү өлүп, кырлыры кырлып эгелээн.

Арга ядараап, адактың соонда Агар-Сандан ыяшты дазылдамырындан одура ызырып, узуткаар дээш, дүнэ-хүндүс оорлап, кедеп, каш чүгүндөн каш удаа халдап келген.

Та чежеге, та кажага сумележип-сүлчээлежип, кедеп-сүржүп келген чүве ийик, күш-шыдалын кадып алгаш, күчүлүг-шыдалдыг аң-мең амытан дээрниң шырайын тыртып, дедирлендир бүргеп хорадап, кудайның шырайын тыртып, күшкүлдүр бүргеп хорадааш, демир долугулаштыр чаап, оттүг чаңзыны чажырадыр дүжүрүп, чылан чылгаар шыгы чок кылдыр, өргө чылгаар өлу чок кылдыр узуткаап каап-тыр оо!



1. Тыва чогаалдың төөгүзүнде баштайгы авторлуг тоол болур бо чогаалдың 5-ки класска өөрөнгөнинер авторлуг тоолдардан (К.-Э. Кудажының “Кым эң ажыктыгыл?” болгаш оон-даа өске) ылгалын болгаш улустуң тоолдарынга дөмейин тодарадып чугаалаңдар.

2. Мында Агар-Сандан ыяштың, анаа аң-меңниң болгаш маңгыс араатаннарның овур-хевирлерин дамчыштыр чогаалчы нийтиледе кандыг аңыларны болгаш күштерни көргүскен деп бодаар силер?

3. Эрги Тывага аңгы демиселиниң дугайында төөгүден чуну билир силер? Ол дугайында бо тоолда чогаалчының овур-хевирлер дамчыштыр элдээртип бижээнийн тайылбырлаңдар.

4. Тоолга хамаарыштыр чуруктан чурааш, утказын тайылбырлаңдар.

5. Тоолда кирген эргижирээн болгаш ховар ажыглаттынып турар сөстерниң болгаш сөс каттыжыышкыннарның утказын билип ап, тайылбырлаңдар: *айдызалдыг-аңгаралдыг, өкпе-чүрээнгө тоннуп, чылан чылгаар шыгы чок кылдыр, өргө чылгаар өлү чок кылдыр, түмен, ачы-буян.*



Гипербола болгаш литота дугайында билиг

Аас чогаалында, ылаңгыя тоолдарда, маадырларның күш-шыдалын, чүвелерниң азы болуушкуннарның онзагай шынарларын чуруп көргүзерде, хөлүн эрттири хөөредири, улгаттырар уран арганы калбаа-бile ажыглап турар. Ындыг арганы *гипербола* (хөөредири, артыкшылдыы дээн уткалыг грек сөстен укталган) дээр. Чижээлээрге, маадырлар “кышты хыраазындан билип, чайны шалыңындан билип, суглуг черни кургаг кылдыр, кургаг черни суглуг кылдыр, айлык черни дүштүк кылдыр” хүрэжир азы “бедик черниң белин бастырып, чавыс черниң бажын бастырып” халдып турар. Чылбыга кадайның иштинден Дөң-Хөөжүктүң ада-иези, мал-маганы шупту үнүп кээр. Оон-даа хөй чижектерни тоолдардан тып ап болур. Чогаалчылар база боттарының чогаалдарынга гиперболаны бо-ла ажыглай бээр.

Гиперболага удурланышкак, чүвелерниң азы болуушкуннарның хемчээлин, күжүн, ужур-утказын уран-чечени-бile бичеледири уран арганы *литота* (бөдүүнү, бичиизи, өйүндээзи дээн уткалыг грек сөстен укталган) дээр. Чижээлээрге, тыва тоолдарда Чаңгыс-Карыштың овур-хевирин аңаа хамаарыштырып болур.

Светлана КОЗЛОВА

Аъттыг-шеригжи кыс

1

Биче-Тейде имир каксы
Аът дуюу сидирей-дир.
Бир-ле кижи ырлыг-шоорлуг
Аяңдыва кирип олур.
Кыстар ышкаш, чинге үннүг,
Кыяң-сыйбың кожаң эвес,
Ырызы чиик, өткүт чидиг —
Ындыг кайгал кайы эр боор?
Даңың бажы шара хере,
Даштар бажы сарыг-шокар.

Өгнүүц ишти оттуп келген,
Өле баштыг ирей оргаш:
— Канчап дедир эгдин, кызым,
Шайың, дузуң кайыл аан? — деп,
Шагжок хөлзеп айтырып-тыр.
— Шуптузун-на эккелдим — деп,
Чугаазы dort, бүзүрелдиг
Харыылап каар уруг болган...

6

Хан-Дээр даглар туман бөрттүг,
Ханалар дег шөйлү берген.
Ооң арты соңгу чүкте
Онза чарап хоорайлар бар.
Советтерниң чурту ында
Солаңгылай чапты берген.
Шаажыдан сени мөңге
Чарып алган чуртуң ол-дур.
Ол чурт сенәэ эртемни бээр,
Октаргайже карааң аштыр
Бүрүн эрге тудускан-дыр,
Бүдүүлүктен адырган-дыр.
Орус чондан өөрен дизе,
Оон канчап ойталаар сен.
Базымчадан чарган чуртка
Баар сен бе, эрес Байлак.
Барыын чүктен ыштыг булут —
Бардам дайзын шоглап келди...
Эзээргектен эргим чуртту
Эрте дээрэ хосташ дизе,
Сагыш канчап дөзүп орар,
Чаалажып кирер сен бе?

7

Кызылга олар даңыраглап,
Кызыл туктуң азыын ошкаан.

Шала шириин ыяш хоорай
Сагыжында артып калган.
Эң-не баштай Саян ашкан,
Эң-не баштай поезд көрген.
Паровоз-даа ышкыштапкаш,
Калбак Сибирь шөлүн кежир
Кара ыжын бургурадып,
Барыны чүкче ыдып орган.
Хоорай-суурга доктаай дүжер,
Хорлай берген кадайлар-ла,
Ногаа тараан, шойну куткан,
Оңгар каскан меннип туар.
Оолдарын, ашактарын
Олар чааже үдевиткен.
Карак чажы кадып калган,
Харын сүрлүг көзүлгеннер.

8

Төрээн тыва черинде дег,
Дөңгеликтиг хову кырын
Аккыр хары шыва алган,
Алгыг-делгем көстүп чыткан.
Барыны чүкте Украинаны
Фашист маңгыс хоозураткан.
Харның адаа кара черде
Халап дайын изи дириг:
Күйт дээр кускун-даа чок,
Өрттеттирген суурлар соргаа,
Өлүртүп каан чаштар сөөгү
Күү ыйба болу берген.
Өңнүктерни хыдааны дээш,
Өжээн кылышы улам хайнып,
«Чалданыш чок тулчур-дур!» деп,
Чалышы Байлак аашкынган.

Майор кижи чугаалап-тыр:
 «Байлак, сен-не шыдаар боор сен,
 Барып көрем, хайгылдааш кел,
 Дайзын чүге сураг барды?»
 Дайынчы кыс боданмайн-даа,
 Далаш үнгеп чорувуткан.
 Хаттыг дүвү ооң изин
 Хардан удур балап турган.
 Ачазындан салгап алган
 Аңчы мерген дуржулгазы
 Кыска ам-на дуза каткан.
 Хыыга бергеш, союп четкен.
 Халдаашкынның планнарын
 Хайгылчы-даа чиндип тыпкан.
 Харалааның ээп орда:
 – Хальт!.. – дизе, бедик немец,
 Азыг-дижин шаартыпкан
 Араатан дег бо-ла турган.
 Автомадын бүлгүртүпкен –
 Дөрт улуг ыт дег фашист
 Төөректелип чаштай берген.
 Адар даңы чыраалакта,
 Аккыр хары хөөп каар боор...

Чеве-ле дээр, «шенээр-ле» дээр,
 Сегирипкеш, салбайн-на баар.
 Чаага тергиин шаап халдаар,
 Салба шавар, өде халыыр
 Альтыг шериг хөглүг оглу
 Аттыг кайгал ростовчу бар.
 Бир-ле катап чакпыыл октан
 Билинвестээн, чүгле тынныг,
 Сергек караа андарылган,

Селбер бажы хадып чыткан,
Чоону берген салым ийик,
Чоогунда санитар чок...
Кайыын-на ийик, Байлак бо-ла
Халдып келгеш, дүже халаан.
Оолдуң балыын аштап-шарып,
Ол-ла дораан хемчег алган.
Аъдынга ок база дегген,
Аяң черде иелээ арткан.
Оолду уруг чүктевиткеш,
Ол-ла дораан соювуткан.
Хөртүк орта таварышкаш,
Хөрек чедир хандыр кирген.
– Күжүр дунмам, мени каавыт,
Күжүм төндү, шыдавас мен.
Ырак төрээн Донумда
Ынак авам, дунмам өлген.
Каяа-даа бол, хөөрүмге
Качыгдап кээр кижим-даа чок.
Балыг солдат чаннып-тейлеп,
Байлакка ону сөглеп чыткан.
Бедик дагның аңчи кызы
Бергелерге торулбаан-даа,
Өлүп чыткан орус оолду
Өрттүг чаага тынын алган.

11

Кызыл хоорай байырымныг
Тииилгени уткуп турган.
Кырган-чалыы чыглып келгеш,
Дидимнерге байыр туткан.
Оларга ынчан хөгжүм ойнап,
Орденнерни тыпсып турган.
Маадырларның аразында
Байлак чоргаар көстүп турган...

-
-  1. Тыва эки туралы айттыг эскадрон болгаш ооң санитар дайынчызы Вера Чүлдүмовна Байлак дугайында чүнү билир сiler? Вера Байлактың тайбың үеде ажыл-амыдыралының дугайында дыңнаан азы номчаан сiler бе?
-  2. “Бокту-Кириш, Бора-Шээлэй” деп тыва тоолдуң маадыры Бора-Шээлэй деп кысты Вера Байлактың овур-хевири-бile дөмөйлөп болур бе? Чүүлдешкек чүүлдерин тывыңар.
-  3. Вера Байлактың дайын шелүнгө эрес-маадырлыг чоруун авторнуң чуруп көргүсken аайы-бile тайылбырлацаар.
-  4. Дайынчы интернационалчы найыралды Ростов чурттug орус дайынчы биле Вера Байлактың овур-хевирлерин дамчыштыр канчаар көргүсken-дир? Маңаа хамаарыштыр чуруктан чуруңар азы кыска чогаадыгдан бижинер.
-  5. Таан-оол Хертектиң “Вера Байлак — амгы үениң маадыры” деп номун азы тыва эки туралылар дугайында номнарны тып номчуңар.
-  6. Силерниң чаңгыс чер чурттугларыңар азы төрөлдерицер тыва эки туралылар дугайында медээлерден чыып, дыңнадыгдан кылыңар.
-  7. Шүлүглелдин автору, шүлүкчү, журналист, очулдуруукчу Светлана Козлова дугайында улуг улустан, башкылардан айтырып, медээлерден чыңар.
-  8. *Шагжок, арттынчактыг, кызыл-дустаар, хүндү-ямбы, хайгыыл, чемдик-дудуу, бүлгүртүр, сүрлүг, шишип, дары* деп сөстерниң утказын тайылбырлацаар.

II кезээ. ОЙНАЙ-СЫЛДАЙ СОЙГАЛАЖЫР...

Кызыл-Эник КУДАЖЫ

Маргылдаа

“Кызыдып каан демирлерден чалданмайн,
Кым-даа ындыг улуг ажыл кылбайн турар.
Менден дээди ишчи чок” — деп,
Менээргенип Маска сөглээн.

Дәжек болуп, айда-чылда бараан болган
Дәжү дораан ону дыңнааш, удурланган:
“Оорга-мойнум оюлгуже соктап келгөш,
Оода мени тооп көрбес орта сен бе?
Акың мени чугулалап көрбес шааң чок,
Ажыл-иштиң чөлөнгиижи мен-дир мен ийин”.

“Изиг кызыл демирлерниң хааны мен” — деп,
Идээргексеп, Кыскаш тура көргөттинген:
“Согар чүүлдү араңарга тутпаан шаамда,
Чогум черле бүдүруптер ижицер чок”.

Аас-сөстен кезээ шагда чыда калбас,
Аңаа бо-ла киржи берген турарлар бар.
Дооразындан
Докпаңайндыр,
Хажызындан
Какпаңайндыр.

Хөжүледир үрдүнгүллээш, маргылдаага
Хөрүк чыда калыр эвес, киржи берген:
“Каң, шой безин тыныжымга бырашпастар,
Хайлы бээрлер, эсти бээрлер.
Ыытташпаңар, дээдицер мен-дир ийин,
Ыят чокка макташпаңар!”

Маргылдааны чежемейниң дыңназа-даа,
Маңаа чүгле ийи холдар киришпээннер.



1. Басняның маадырлары кымнарыл? Оларның аразында кандыг маргылдаа болуп турар-дыр?
2. Дәжү биле хөрүк кандыг мергежилдиг улустуң ажылынга ажыглаар херекселдерил? Оларның тус-тузунда тайылбырын беринер.
3. Чогаалда кижилерниң кандыг четпес талаларын сойгалап, шооткан-дыр?

-  4. Дээди макталды кайы маадырга тыпсып болур-дур?
5. “Маргылдааны чежемейниц дыңназа-даа, маңа чүгле ийи холдар киришпээннер” деп түңнел одуруглар кандыг бодалды илередип тураг-дыр?
-  6. Тывага дарган кижиниң ажыл-ижиниң, ус-шеверлерниң дугайында дыңнадыгдан кылыңар.
-  7. Хөрүк деп херекселди канчаар ажыглаарын билир силер бе? Ооң дугайында шинчилеп көрүңцерем.

Салим СҮРҮН-ООЛ

Аът биле Оор

Бүдүн шары эъдин чүктээш, шылагзаан Аът
Бүдүрээштиң чизирт кылдыр барып дүшкен.
Барбаларда дыгып туруп суккан эъттер
Башка-башка уштунгулап чаштай берген.

Аъттың ээзи, эъттиң «ээзи» коргуп-иргип,
Артын-иштин көрдүнгүлээш, кончуттуунуп:
Карак-кулаа көзулбестээн бөрүл мон! – дээш,
Халып барып, аътты тепкеш, эътте барган.

Кире берген оңгарындан туруп чыда,
Хилинчек чок хөөкүй Аът химиренген:
– Бөрү-бile мени деңнеп шыдавас сен,
Бодуну сен чогум кым деп бодай-дыр сен?

-  1. Басняда кандыг бодал илереттингенил?
2. Ээзиниң бодунуң айдынга кандыг хамаарылгалының сөзүг-лел-бile бадыткаңар.
3. Аъттың химиренген түңнел бодалының номчааш, утказыны тайылбырлаңар.
-  4. Ээзи деп сөстү чүге кавычка иштинде бижэенил?
5. “Бодун боду билинмес, морзук калчанын билинмес” дээн үлегер домакты тайылбырлаңар. Бо үлегер домак басняның кол бодалынга тааржыр-дыр бе, бадыткаңар.

-  6. “Оорнуң оруу муңгаш“ деп чогаадыгдан бижицер.
7. Тываның сүлде демдээнде айт чүге сиилбиттингенин улуг улус-бile демнежип тайылбырлацар.
8. Тываның хөгжүм-шии театры айтка тураскааткан шинин тургускан, көрген болзуцарза, ооң дугайында чугаалап көрүңцерем. Шинин автору кымыл? Режиссёру кымыл?

Иван КРЫЛОВ

Шиижек биле Қөге-буга

Шиижекчигеш дузак орта кире бергеш,
Шилирткейнип, сылдырткайнып чүткүп чыткан.
Қөге-буга ону көргеш, кочулап-тыр:
“Көк-ле хүндүс туттуна бәэр чөгөнчиини!

Мен-не болза, кирбес ийик мен,
Берген сөзүм ээлээр мен”.
Туразында хей ынчап ора,
Дузакталы берип-тири оо!
Турамыккай, байбаң чорба, Қөге-буга.

-
-  1. Басняның кол бодалын илередицер.
-  2. Кижиниң кандыг четпес талаларын чогаалда көргүскен-дир, чугаалацар.
-  3. Амыдыралда кандыг “дузактар” бар бооп болурул?
-  4. “Тайып ужар, даянып туар” дәэн үллегер домактың утказын басняның кол бодалынга дүүштүр сайгарыцаар.
-  5. Қөге-Буганың мөзүзүн илереткен эпитеттерни тывыңдар.
-  6. Иван Крылов дугайында немелде дыңнадыгдан кылыңдар.
-  7. Иван Крыловтуң өске кандыг баснялары тыва дылче очулдурутунганын тодарадыңдар. Таарзынган басняңарны шээжи-бile чугаалацар.
-  8. Иван Крылов биле Салим Сүрүн-оолдуң басняларында кижиниң мөзү-бүдүжүнгө хамаарыштыр кандыг ниити бодалдар барын илередип деңнеңдер.

Басня дугайында билиг

Басня дээрge шүлүктээн азы калбак чогаал хевииринге бижиттинген шоодуглуг, өөредиглиг болгаш кижизидикчи уткалыг, кыска сюжеттиг литературлуг чогаал болур.

Оон маадырлары колдуунда дириг амытаннар, үнүштер болгаш кандыг-ла бир чүвелер болгулаар. Оларны кижилер ышкаш аас-дылдыг, сагыш-сеткилдиг, оптуг-кажар кылдыр чураан боор. Чижээ: *дилги* — кажар-оптуг, авыястыг; *берү* — чазый-чилби, хоптак, ажырымчы; *кас* — мелегей, мугулай; *үгү* — угаан-сарыылдыг; *аэт* — ажылчын, ээзинге бердинген, шынчы, кедилиг дээш оон-даа өске.

Басняны номчуурга, тоолдарга дөмей. Ынчангаш оон дириг амытаннар дугайында тоолдардан укталганы билдингир. База бир онзагай чүүл — басня утка талазы-бile үлегер домактарга чоокшулашкак. Чүге дээрge үлегер домактарда ойзу чугаалаан кижизидикчи кол бодал басняда кирип турага өөредиглиг сургаал утка-бile база чүүлдешкек.

Басняда кижилерниң кандыг-ла бир четпес талаларын шооткан, чемелээн, мөзү-шынар кижизидилгезинге хамаарышкан чугула айтырыгны көргүскен болур. Ынчангаш кижиниң бодун канчаар алдынып чоруурунда четпес чүүлдү шүгдүнүп боданырынга басняның сөөлгү одуруглары сургаалдыг уткалыг болгаш кижиниң кижи болуп сайзыраарынга кандыг багай аажы-чаң шаптыктап турагын медереп билиринге ажыы кончуг улуг.

Басня — эң-не бурунгу литературлуг жанрларның бирээзи. Бурунгу Грецияга шылгараңгай басня бижикчи Эзоп (бистиң эрага чедир VI—V вектер) кижилерниң четпестерин сойгалаан басняларны колдуунда кол маадырлары дириг амытаннарын аажы-чаңын таварыштыр көргүзүп чораан. Ол басняны калбак чогаал кылдыр бижип турган. Эзоптуң басня бижиир чаңчылдарын делегейниң аңгы-аңгы чоннары уламчылаан.

Шылгараңгай орус басня бижикчиizi И.А. Крылов амы-дышалчы уткалыг, уран-чечен баснялары-бile алдаржып, кижииниң мәзүлүг болуунга кандыг багай чорук шаптыктап чоруурунун дугайында сагыш-сеткилиниң дүвүрелин илередип чораан. Ол Россияга басня жанрының сайзыраарынга кол черни ээлээн. Орус литературада Демьян Бедныйның, Сергей Михалковтуң баснялары уругларга билдингир.

Тыва чечен чогаалдың сайзырап келген төөгүзүнде Юрий Кюнзегеш «Шулукчунүң мергежили болгаш ному» деп чүүлүнгө басняның тыптып келген тодаргай үезин — 1952 чылды — тыва басняның төрүттүнгөн чылы деп адап турагар. Оон бээр тыва сатира, шынап-ла, басня жанрының тывылганы-бile чамдык чедиишкінніг түңнелдерни чедип алган.

1953 чылда И.Крыловтуң басняларының очулгаларын тыва дылга парлааны улуг ужур-дузалыг болган. Басняларның чыныздызын очулдууарынга шүлүкчүлөр Степан Сарыг-оол, Леонид Чадамба, Илья Медээчи киришкен.

Басня бижииринге тыва чогаалчылар барык шупту күжүн шенеп, талантызын бедиткен. Басня бижиири ындыг-ла белен эвес болганындан, олар басня жанрының им-демдектерин, теориязын баштай өөренип, мергежилин И.Крыловтуң басняларын очулдуруп тура, бедидип турганнар. Тыва чечен чогаалга база бир чаа жанр (хевир) болур басняны шүлүкчүлөр ханызы-бile шингээдип алганнар.

1953 чылда чырыкче парлаттынып үнген И. А. Крыловтуң басняларының чыныздызының кол очулдурукчузу болгаш тыва басняларның, баштайгы бижикчилериниң бирээзи Илья Медээчи болган. «Улуг-Хем» альманагынга ооң «Межерген», «Шилен биле Торга» деп баснялары парлаттынган.

Тыва литературада шылгараңгай басняларны Салим Сүрүң-оол, Юрий Кюнзегеш, Монгуш Кенин-Лопсан, Кызыл-Эник Қудажы бижээннер.

ІІІ кезээ. ЭЛЭЭДИЛЕРНИЦ ЭРЭЭН-ШОКАР ДЕЛЕГЕЙИ

Салчак ТОКА “Араттың сөзү”

Мерген

Амыр-мендиңни айтырдым, номчукчу! Бистиң улуг чуртувустуң кайы-даа крайынга чурттазыңца, сээн амыдыралың кандыг-даа болза, мээн төрээн Мерген хемим-бile таныжарындан чажам дивес боор сен деп бүзүредим.

Бо-ла болгай Мерген – бедик хая кырындан чиңге-чиңге көвүк кылдыр төктүп, даштар кырынга кээп дүшкүлээш, оон ыңай шапкын болгаш дааш-шимээннig хап бадып чыдар. Ооң хап чыдар уну – Тожунуң бедик тайгаларындан үнүп туар баштарындан эгелээш, Каа-Хемге киргиже чедир – хөй-хөй ужарлыг болгаш саарыглыг.

Мени авам чадырдан эц-не баштай үндүрүп кээрge, дораанна төрээн Мергеним көрген мен. Ооң хап бадып чыдар берге болгаш кылаң оруу мээн караамга ам-даа көстүп туар-дыр ийин.

Тайгалар бажынга чатьс-чайык болганда, Мерген хайнып-мөөреп, оруунга таварышкан ыяш болгаш хая-дашты, пөш, дыттарны аңдара-дуңдере шава бээр. Кааң хүннерде тырттынгаш бичии дырылап чыдар, сактырга аксынга арай боорда чедер ышкаш көстүр. Ол ынчаарда безин эц сыйык-даа черинге көвүктелип батпышаан чыдар болгаш ооң чүгле үнү өске – чиңге болгаш арыг апаар.

Кыжын Мерген кылын терең хар дүвүнче чаштына бээр. Ооң эриктерин дургаар сеглегер ак хөпээннөр туар. Ол – хамык будуктарын хар овааландыр шыва берген дыттар-дыр. Ынчалза-даа Мерген кыжын безин удууп чытпас. Хар алды-бile чиңге кара болу берген батпышаан, даштар кырынче үне халып, чайындылап чыдар.

Мергениң сыйстып үнүп чыдар бажын шимчеш-даа дивес караңғы кара тайга карактап, кадагалап туар. Ынаар хат-

шуурган-даа четпес. Мергенниң әриктерин сүүр-сүүр баштарлыг даглар илчирбелендир дистинчип алган камгалап турар. Ол дагларның бажынга, чайты кончуг изиглерниң үезинде безин, хар-меңги хөвээр чайыннанып чыдар. Мергенниң унунуң үнүжү ынчангаш байлактыг болгаш дириг. Хову-шөлдер изиг-халыынга борарып, хүнгө кагжаан терезиннер болгаш чашпаннар-бile чытталып турда, кыдыглары эрээш дошталып чыдар хар-бile шыптынган хаялардан саарыгланмышаан ағып бадып, бодунуң серийн шыгын Мерген катай эккеп чыдар. Мергенниң уну чайның кончуг изиинде беzin дагның өң-баазын чечектери-бile каастанынкан чыдар, ооң чаражынга кижиниң караа дек-ле салдынmas.

Ынчангаш ук хемни арат чон Мерген деп адап кааны анаа чuve эвес болдур ийин. Мерген болза тайга-таңдыларны, хову-шөлдерни куду ак-көк хээ угулза-бile чайыннандыр каастап чыдар болдур ийин.

Сөөлгү кашпалдардан адырлып, Сарыг-Септиң чаагай чыттыг ховуларынга киргеш, Мерген хостуг ағып чыдар. Чүгле чамдык хая-даштыг черлерге биеэки хөвээр хайнып, дааш-шимээнни-бile көвүктелбишаан, база-ла көк-шык, чечек-бile шыптынып алган, Каа-Хемге ужуражыр дээш, хап бадып чыдар.

Дошкун-шапкын Каа-Хем үрде чарылган чассыг уруу-бile ужурашкан ышкаш, Мергенге ужурашкан, ынакшылды-бile чалгып, ханы дүптүг кавайынга өпейлеп, оозунга ужуражыр дээш, далажып келген оруунуң бергелерин, хат-шуурганны арыды чалгып, хойнунга өпейлеп алгаш, оон ыңдай ужар-кашпалдарны ажыр, көктүг-шыктыг карак четпес делгем ховуларже аппаарын чугаалап олурган ышкаш боор.

-
-  1. Чогаалчы төрээн чериниң чарашибазын кандыг уран-чечен аргалар-бile илереткен-дир, ушта бижээш, сайгарыңар.
 -  2. Эгеден эң-не чарашибазынган, силерге таарышкан үзүндүнү аянныг, ыыткыр номчуп тургаш, шээжилеп алыңар.
 - 3. Бо эгениң утказын илередип турар кол дүлгүүр сөстерни ушта бижээш, тайылбырлаңар.



4. Бодуңарның төрәэн чериңерниң бойдус чурумалының дуга-йында дылдың уран-чечен аргаларын ажыглап турғаш, кыска чогаадыгдан бижиңер.

Тас-Баштыг

Өөвүстүң иштинде алды кижи бис: ававыс, угбаларым Албанчы болгаш Каңгый, акыларым Шомуктай, Бежендей, эң бичези-ле – мен. Билип кәэримге-ле, ачавыс чок турган.

Ававыстың чингине ады чок чораан. Бажының дүгү чок боорга, кижи-ле болганы «Тас-Баштыг» деп шолалап турган. Кандыг-бирдүжүметтиң сөс-домаантоваандээш, кеземчекөргүскени-бile-даа, азы кандыг-бир халаптыг аарыгга таварышкашдаа, ававыстың бажы тазара бергени чадавас, ону бис билбес бис. Ол дугайын ававыс биске черле чугаалап көрбээн. Бис оон айтырып-даа көрбээн бис. Ававыс ол-ла шолазы-бile бүгү назынын эрттирип келген.

Бодунуң дугайында ававыс шоолуг-ла чугаалавас чораан.

– Мен ядыы кижиниң уруу мен. Силерниң кырган-ачаңар ядыы арат Доора-Хемгэ чурттап чораан. Ийи-чаңгыс ивиден башка, ооң чүзү-даа чок. Силерниң кырган-ачаңар болгаш кырган-аваңар өлгүлөп каарга, оларны ырак черге тура, айызап, саң салып, «эмнеп» турган лама каш ивилерин шуптузун сүрүп алгаш барган...

Шомуктай амыдырал дээш улуска чалчалай берген. Силер ынчаарда шуптуңар бичии чаш турган силер. Мен улустан ажыл дилеп чораан мен. Мындыг имилээн уруг-дарыглыг ядыы кижи ол шагда кымга херек боор?

Ававыс чарааш-даа эвес кижи чүве: сыны чолдак, ооргазы арай бүшкүк. Ооң кеткен хевин кижи хеп-даа дээр аргажок. Кыжын-даа, чайын-даа кедип алган чоруур тон дээр чүвези, кажан шагда мүн тон-на турган ыйнаан ол, мен көөрүмгэ-ле, дүгү тазарып калган, ол-бо талазында ойбак-самдар, ында-мында чуруктар ызырынгылаан чүве болдур ийин. Иезинден төрээн эъдин ававыс ооң-бile дөңгүп чажырып чораан.

Бистиң ававыс угааныг, томааныг-даа, кылбас ажылы-даа чок кижи. Кандыг-даа бергелерден үнер аргаларны тып ап, бистерни холдарынга көдүрүп алгаш, көрбээнин көрүп чорааш, доруктуруп алган.

Бир-ле катап ававыс бисти кыйгыргылап алгаш, моон өскээр көжүп чоруур бис деп чугаалады.

Алдалаан эгиннеривиске бичии чүвелер арта кагылап алгаш, Мерген хемниң аксынга чеде бердивис. Ававыс бир кижиден сүгे дилеп алгаш, Мергенниң кыдыынга, даг эдээнде эң-не чарап черге, тос шывыглыг, шарлан алажылыг багай чадыр өг өпейти шаап алды. Өг иштинге дөжек орнуунга шиви будуктары болгаш сиғен чадып алгаш, чылыг болзун дээш, ооң кырындан кургаг өдек төп кагды.

Эләэн хөй узун сыра ыяштарның чинге баштарын бөле шарааш, оларның чоон уштарын алгыды тырткылааш, олурту шашкылпартарга, шаарап алажылар болу бээр. Ооң кырындан дыт чөвүрээзи азы тос- биле шыпкаш, чингежек базырткыштар- биле базырып каарга, чадыр өг болур. Ол өг дээр чадырның иштинче өл-чьең болурга – суг, кыш-соок болурга – хат-шуурган хос өдүп кээр. Мындыг янзылыг арга-арыгның аң-мени-били дөмөй чурттап чораан бис.

Мал-маган-даа чүү боорул аан: уш өшкүлүг, бир черлик ыттыг чораан бис. Ыдывыстың ады – Черликтен, ыттарның аразынга ол дээрge даг-ла турган.

Бистиң-били кожа алдар хөй-даа турган болза, дөмей-ле ядыы, чадыр өглерлиг тургулааннар. Хөй малдыг байлар турза-даа, бистер ышкаш ядыыларны тоовас, ояр. Бир эвес чоокта тураг байлардан болгаш дүжүметтерден улус чадырга келзе-даа, чүгле «ма, алгыларны ууштап бер», «бо тонну даарал бер», «бо идикти улдуруп бер» деп хөректеп келгилээр. Оон айбылаан чүвезин алыр деп келгеш, «өскээр кылган-дыр сен», азы «саадаттың» дээш, эттеп-эриидээрден өске чүве чок.

Бир эвес бисте чылыг кидис өг болгаш, оода чадаарда, хүнде бир катап чип алыр хире чем бар турган болза, кыш дужерин

өөрүп манаар ийик бис. Бистиң чадырывысты долгандыр хавак, тейлер эмгежок. Орта бутка ыяш шарып алгаш, чуңгулап турза, кайы хире эки дээр! Оон биче ырай бергеш, Мергенниң бадып келген дагларының эдектеринге барып шаналаар-даа болгай! Соок намдал чылый бээрge, хар-бile шивээлер, кижилер, инектер, хойлар тудуп ойнаан болза, Мергенниң ол чарында шыргай аразынга койгун, торлаа дузактаан болза, кандыг дээр! Даш-Чалаңың уруглары шак ынчалдыр чурттап турганнарла болгай, негей тоннуг, тодуг-догаа. Кыштың соогун бис-даа айыыл деп уткуур бис.

Улуг угбавыс Албанчы бистерден чарылбас, кезээде кады чоруур чuve. Ававыс-бile дөмей, бистерни азырап, аьш-чемин берип, чыллыбы биле чагып сургаар. Албанчы бедик, тырың сынныг, чоон кара чаштыг, кирбии караңгы кашпал ышкаш сагындырар болза-даа, карактары чырып кыпкан шолбан ышкаш чидиг өткүт. Чоок-кавының оолдары кудалаар дээш кээп көрүп, куда дүжүрерин эремелеп турганнар. Угбавыс бистерден чарылбазын бодааш, ону тоовайн баар.

Дерзиг-Аксынга көже бергенивис соонда, багай чадырывыска келген эң баштайгы аалчы – узун сыны ыргая эглип бады барган, ашаксый берген Данила Потылицын дээр, Каа-Хемге көжүп келген орус тараачыннарның бирээзи. Ол кижиден эң баштай коргарывыс кончуг. Ававыс, угбавыс чокта чадыр чанынга кылаштап кээрge, арыгже бурт-ла дээр бис. Данила удаа-дараа кээп тураг апарган. Келген санында-ла белектиг боор, чамдыкта чигир, чамдыкта хлеб эккээр. Чыл дургузунда Данилага ынакшый-даа берген бис, ойнаар-хөглээр, торлаа, күшкүл дузактаар-даа апарган бис. Данила биле Албанчы ашак-кадай болган. Ынчалза-даа оозу үр бооп шыдаваан: Данила алдынчылар-бile кады тайгалап чорааш, черниң аар ажылынга шыдавайн, өлген сураглыг болган. Угбам Албанчы уруг божаан. Уругну Сүрүнмаа деп адап алганнар. Угбам иий чинге хадың кезип алгаш, оларның бажын эй туткулааш, аразын чыраабиле хана-карактай аргып алган соонда, кавай-даа кылдынган: кавайның дүвүнгө күзүн көже берген аалдар өдээнден чыып

алганывыс сарыг-кидистер, чурук быжындыларын угбавыс чаткылаш алган.

Угбавыс бир катап кургаг өдек эккелгеш, ону кавай иштинче ура берди.

— Сүрүңмаа анай-хураган эвес, чүге ооң чыдар черинге өдек уруп туарың ол? — деп айтырдым.

Угбам ажына аарак чугаалады:

— Анай-хураганга-даа чылыг болгаш кургаг херек. Бисте самдар-даа пөс чок-тур. Өдек үргүлчү кургаг болур болгай! Кавай иштинге өдүп шыгый берзе, ону төпкеш, чаа кургаг өдек-билие солуп алры белен болгай.

Бир-ле дүне отту чаштап келиримге, Сүрүңмаа бар шаа-билие ыглаан чыдыр. Чыткан черимден тура халааш көөрүмге, авам биле Албанчы өг иштинде от ужуудуп алган, ангадап девидээн турлар. Хеп дээр орбак-самдар чүвелеримни дүрген-не кедип алгаш, авамның чанынга чүгүрүп чеде берген, сонуургаан тур мен.

— Уш дүн ортузунда чүге туруп келдиң? Барып уду! — деп, авам аттына-дыр.

Мен чүү-даа болганын билбээн мен. Чыткан черимге барып чыда сой тыртып алгаш, самдар чурук-быжындылар аразындан көрүп чыдарымга, авам биле угбам паш дүвүнгө артып қалган, кыры доңуксай берген шайны ыяш хуунчे куткаш, олче Сүрүң-мааның холдарын суккан турлар.

Эртен авам хомудаан аайы-билие чугааланып хүнзеди:

— Ат-ла чүве-дир! Мен бодум кавайлап каан кижи болгай мен. Қанчап холун ушта соп алган уруг боор?

Авам менчे көргеш, оон-даа артык чугааланды:

— Бо дүне дуңмаң биче-ле болза, хол чок артар часты! Кавайынга чыда холун ушта соп ап-тыр — эртенге чедир ынчап чыткан-дыр. Бир эвес бис даң аткалак турда, оттуп келбээн болзуусса, холу чок болур ийик. Чаш уруглар-даа кончуг-ла чүве-дир ам! Сен база дуңмаң Сүрүңмаадан арай улуг тургаш, холуң өрттедип ал часкан болгай сен. Ол хүн улустан аньш-чем диленип чоруур деп турган мен. Улуг уругларым база чоруй

барган чuve. Сени чааскаандырзын кааптар аайын тыппайн пат болган мен, оон аргамчы-бile курлаандан баглааш, отка кирбезин дээш, от кыдыында дөгеленип болур хире кылдыр чадырның адагажындан өртеп каан мен. Сени ынчалдыр анай-хураган дег өртеп каапкаш, чоруптум. Ээп чанып олура, чадырга чоокшуулап олургаш дыңнаарымга, бар шааң-бile ыглай-дыр сен. Далаш-дулаш-бile чадыр иштинге кире чүгүрүп келдим. Өртегге сен хөлчок чүткүп туруп-тур сен, ынчап турза-турза, бистиң багай ирик аргамчывысты үзе чүткээш, отче үңгеп чедип, көске холунг чидиртип ап-тыр сен. Бис ышкаштарга чүгле соок эвес, харын өг иштинде изиг от безин хилинчек-човулаң таварыштырар чuve-дир ийин – диди.

Кыштың дошкун соогу төнүп турда, дыттар аразында хөртүктер эрээш, агып эгелээн. Мергенниң кара суу эриктерже чаза теп үнүп, эрип чыткан доштарның алдынга холураан даажы улам улгадып турган. Төрээн Мергенивистиң эриинче чүгүржүп четкилей бергеш, орта барып, хайыракан оолдары ышкаш, ойнап, аңдаштанып тургулаар бис.

Чай-даа келир. Бойдустун чаягай ногаан үнүжү чадырывысты дескиндир бүргей бээр. Чылышыры-бile аштаарывыс дам барзадаа, эктивисти чайның хүнү чылыдып кээр, бис-даа ооң-бile дирлип үнер бис. Бичелеривис кышкы самдар хептерин уштуп октагылалттар. Улуг-улуг апарганывыс орбак-самдар хептерин бистии-бile селип, ооң-бile ойбаан дуглап эгелээр. Чай шагда Мергенге аалдар көвүдеп келирге, оон эгениринин аайы-бile арга чадаарда ынчап тургулаарлар.



1. Тас-Баштыг деп кымыл? Ооң овур-хевириин көргүзерде, кандаңг эпитеттерни, деңнелгелерни болгаш метафораларны ажыг-лаан-дыр?

2. Тас-Баштыгның өг-булези тос чадырга канчаар чурттап чорааныл? Чогаал сөзүглели-бile бадыткап бижиндер.

3. Данила Потылицын деп кымыл? Ооң тыва чон-бile харылзаазын канчаар көргүскенил?

4. Албанчының овур-хевириин көргүскен үзүндүлерни тыпкаш, сайгарыңдар.



5. Эгени кезектерге үскеш, оларга аттан чогаадыңар.
6. “Араттың сөзү” деп чогаалга хамаарышкан кандыг чуруктар, шиилер билир силер?
7. Сонуургаан үзүндүлериңерге таарыштыр чуруктан чурундар.
8. Ава дугайында өске чоннарның болгаш тыва улустун үлегер домактарындан тып бижиңер.

База кыш

Бир күстү сактып көрейн. Ол ышкаш кончуг берге үе бистиң черге черле турбаан боор. Каа-Хемниң унунга шак ынчаарда быжар-думаа халдаан, ол халдавырлыг аарыгдан чон, чидиг кадырып-бile кескенде ушкан сиғен ышкаш, қырлып турган. Ядыы улус аарыг-аржык, аш-чуттан арбан, сумузу-бile қырлып турган. Бай шыдалдыг кижиңер мал-маганы-бile дезип көшкүлөй бергеш, бистер ышкаш шыдал чок, аарып-аржаан кижиңерни чуртка кагылапканнар. Авамның чугаазын алгаш көөрге, шыдаар аргажок “думаа” Тожунун Кол сумузунун Хөйүк арбанның бистер ышкаш тос-шаңда чадырлыг чонунга таварышкан дээр чораан. Ол арбанның ивилиг чонундан дириг кижи барык артпаан, ооң салдары Каа-Хемниң унунга, Мергенниң эриктеринге чедип келгени бо-дур ийин дээр чораан. Аалдарның чурттары куруглап ээнзирээн. Мергенниң ооруунга чүгле бистиң самдар чадырывыс артып калган. Дескиндири көөрге, уш өшкү оъттап чоруурдан өске чүү-даа чок, анаа-ла ыржым чүве.

Чүгле Черликтен ээре бээрge, ооң чоон үнү арга-арыг аразы, даглар бажы-бile чаңгыланып турган.

Авамны көөрүмгө, эллээн-не чүве боданып, кылаштап турган. Оон бистерни чыyp алгаш, менче көрнү тыртып келгеш:

— Сен бо ай кымзарын ап алгаш, бо одуш болгаш идиштерни ап алгаш, мээн соомдан базып олур — диди.

Ававыс ону кадыры-бile, барык кончуй аарак чугаалааш, багай чадырдан дораан үне халаан. Ынчалза-даа ававыс биске ишти-бile кончуг ынак деп чувени билир бис.

Чогум кайнаар, чүге баарын-даа билбейн, чыдып калбас дээш, ававыстың соондан үне халышкаш, өпеш-өпеш кылдыр чүгүржүп-ле олур бис.

Ававыс улам дүрген-дүрген, хере-хере базып олур.

— Ам база чыткылап калдыңар бе, уругларым! Божуу чүгүржүңдер — деп, хая көрүнгүлээш, далаштырып каап чораан.

Ававыс чер кезип чоруп чорда, хүннүң-не чадыр эжининге олуруп чаңчыгып калгаш, мырыңай арып-соглуп, қылаштажы албас апарып-тыр бис. Ооң ужурундан чүктеп алган кымзарларывыс болгаш одуштарывыс куруг болза-даа, бир-ле чүвеге ылдыртына берип, ававыстан чыдып каап, пат-ла чораан бис. Ававыс дээрge чүү боор, черниң чери-бile чадаг қылаштап өөренген болгаш қылаштаары кончуг дүрген кижи-ле болгай, могаг-шылаг дээр чүвези чогун кижи кайгаар чүве. Қылаш талазы-бile ацаа чедер кижи бар деп бе.

Моожаларын чоокта чаа сөөртүп алгаш барган хевирлиг хоорзунга чедип келдивис.

Черже элээн көрүп тура, ававыс бисче эргилип келгеш:

— Черде мажактарны көрүп тур сiler бе? Мен ышкаш кылдыр ону чыңар — дей тыртып кагды.

Ававыс чугааланмышаан, тараазын кезип каапкан хоорзунче доңгая берди. Холун черже дүргени кончуг сунгулааш, оортан мажактарны улаштыр-улаштыр чыyp эгелей берген. Одуштуң дүвүнгө аар тараалар кээп дүшкүлээрge, ooң даажы дээр динмиrep, частың чайынды суунуң тос-бile шыпкан чадырга кээп дэггилээни ышкаш, догдурт-догдурт кыннып тураг чүве чораан.

Бис база-ла эдектеривиске мажактар чыyp ap, оларны кымзар, одуш иштинче уруп турган бис. Аштаанывыска шыдавайн, тарааның мажактарының чамдызыын ол-ла черинге ууштааш, чаза-ла амданнанып козурадыр дайнай берген тураг бис.

Бистиң-бile кады хоорзунга тогдуктар ужуп келгеш, мажактап эгелей берди. Бистиң холувуста боо-монггу чогун билгеш, коргар-каргар чүве-даа чок тottтур чемненип алгаш, тогдуктар ужуп чоргулай берди.

Мажак көзүлбес бооп караңгылааже чедир хоорзунга чыгдынып хүнзээш, пат турупкан чанып келдивис.

Келгеш, мажактарны ууштап, тараазын арыды челбип кааптарывыска, ындыг-ла кончуг хөй эвес болган. Ававыс тарааны челбип олурган аразында, бис кургаг талдар чыып оттуулгаш, отка алгый тип алдывыс.

Угбавыс Албанчы алгыйның иштинче тарааны ургаш, Каңгыйны айбылады:

— Ма, хоор, өрттеттиң халак.

Каңгый чүнү-даа ыыттавайн тарааны былгааш-бile хоора берди. Тараа дазырткайндыр дагжагылап, иззэн паштың изиинге шыдавайн чарылгылааш, бодунуң ағын алгыйдан үндүр чаштадып турганын көргеш, чиксеп четтикпейн турган бис.

Удаваанда Каңгый алгыйны туткууш-бile бургеп эскеш, хооруп каан тарааны одуш иштинче урупкаш — ча, ол-дур — деп кагды. Хүрең сарыг өңнүг тарааның бузу одуш иштинден буруңайнып, сооваан турда-ла, адыштай тыртып алгаш, бакка-сокка ууштагылааш, бир адыштан бирээзинге солуй каап, дүгүн үргүлеп, аксывыска уруп чий берген бис.

Авам кезек ыыт чок боданып олура, дыка-ла муңгаргай байдалдыг менче көрнүп келди.

— Бээр келем, оглум.

Тараа уруп алган аяамны бир холумдан салбайн, бир холум-бile даянгаш, дискектенип алгаш, авамның чанынче сооп чеде бердим.

Авам мээн тевек кежегелиг бажымдан чылыг холдары-бile хөрээнче чыпшыр тырткаш, суйбап, чассыдып, чыттап олур. Оон соонда, база кезек бодангаш, чадырның ойбактарынче пат кайгап олуруп алды.

— Чадырның ойбактарындан кирип турар тайганың соогун қөрем, улустуң карактары база бо ойбактар ышкаш соок болгай. Улустуң алгызын эттеп, хоюн кадарып берип чо-рааш, бодум-на борастаны-ла бээр мен ыйнаан. — Силерни канчаар кижи боор мен? Бо кыжын сilerни өлүм-ден чайлладып ап шыдаар ирги мен бе, але? — деп кончуг муңга-раан, чугааланып олур.

Ававыс оон өске чүнү-даа ыыттавайн сирийнин олур. Ававыстың оозун көргеш, өөңейндириг ыглап бадырғылапкан бис.

Эртип чыткан дүжүметтер дыңнааш: “Хем кыдышында бөрү оолдары иези-били кады аштааш, улужуп чыдырлар” деп бодагылаан боор он.

Ынчап-мынчап турувуста-ла, мырыңай дүне апарган. Бар-ла чүвелерни кырыйыска оваалап шугланып алгаш, так кылдыр дыгдынгылап алгаш, чыткан ояар-ла удуп калган бис.

Ынчалза-даа, мен шоолуг удувайн, дораан-на оттуп келген мен. Көөрүмге, чадырның дооразындан болгаши ойбактарындан хар кирип, чадыр иштинде оваалай хөртүктеп каан болду. Хат-шуургандан багай чадырыйыс арай боорда ызырнып, оон тос чөвүрээлери калбаңайып, чамдык ыяштарын андара-дүндере шаап аппарган туруп-тур.

Соогу дам барган. Мен дам-дам дыгдынып алгаш, удуй бердим.

Дүжүмде эмгежок чаагай аъш-чем, эйт, быштак, хоотараа чип турдум. Ол дүне мени чүнү чивээн чүве дээр! Оттуп кээримге, даң адып кээп-тир. Тура халып келгеш, дүжүмнү ақыларымга таптыы кончуг чугаалап бердим. Акым Бежендей улуг карактары-били менче чаза кайгап келгеш, чараазын сыйртына-сыйртына, шала адааргай аарак:

— Сээн дүжүнү биске шуптууска үлеп берген болза, кандыг эки болгай эртик, дунмам — диди.

Көрүп кээримге, авам биле угбам Албанчы чогул, кайнаар барган улус боор деп диленип олур мен.

Чадырдан үне халааш, Мергенниң кыдышы ол ынчалдыр көөрүмге, ында-даа чок.

Ол аразында чиг сугну каш-даа катап хайындыргаш, ижилле турдувус, оон ужурунда ававыстың читкени, бүгү амыдыралдан-даа узун чүве дег сагындырган.

Ававыс чанып келгеш:

— Бис Албанчы-били ийилээн Мергенниң унунда хамык аалдарга шуптуузунга чордувус. Чангыс-даа өг бисти киирбеди,

өглерге чеде бергеш, эжиктерни ажып, мендилежип чорувустала, үндүр сывырыптар чүве-дир — деп онза муңгарап чугаалаан.

Хүн ажып, кежээликтей апарганда, Албанчыны ававыс кыйгырып алгаш:

— Сарыг-Сеп баар-дыр — диди.

Мен тура халып келгеш, авамның әдәэнден халбактанып алгаш, ээрежип туруп бердим:

— Ам база кайнаар баарыңар ол? Сени черле чорутпас бис, авай. Авам мени холу-бите өрү көдүрүп алгаш чассыдып, бажымны чыттап-чыттап кааш:

— Сал оглум! Сарыг-Сеп киргеш, ында чурттап тураг орус чонга ыяш хирээлеп, кажаа-хораазының өдәэн аштап берзе, кедерезе дilenze-даа олар чугаа чок чемни бээр, хөй чем эккээр бис, оглум.

Хүн арай орайтай берген чүве. Ававыс кажан-даа ол хире орай өйде чүвээ чорбас кижи. Ынчаарга ол дүне чиде берген. Одувусту ужудуп алгаш, дөгеленип, дыка орайга чедир манапла олурган бис.

Эртен тура халааш көөрүүске, кончуг кылын хар чааптыптыр — ноябрьның үжү чүве болгай. Хүн тайгалар артындан чаа-ла үнүп келген, чаа харның кырын өөрүшкүлүү-бile чайыннадыр кызаңнаткан тур. Хат, салғын-даа чок. Черниң кырын хүннүң херели чайыннаткан, сактырымга агаарның чылышы шору ышкаш бооп турган. Уне халааш, авамның чоруй барган оруунга чүгүрүп чеде берген мен. Кызыл-будум доңа бергеш, чадырымче шыдавайн дедир кирип келдим — чылышы кончуг чүве-дир — деп алдап турган кижи иргин мен.

Акыларымның болгаш угбаларымның кедип чораан багай дыдык, ээжектери ойбак майыктаажы меңэ шилчиp келген чораан. Биче ырап, тайга азы хову кирер апарганда идиимниң улдуңунда дыдыын дуглай ыяш баглап алыр мен. Ол ыяш дээрge, идиимниң улдуңу-даа бооп, чунгулаар шанаам-даа бооп чораан. Кызыл таваңгайга чыпшыр баглап каан ыяш-даа чүнүң чылышы боор, дораа-ла хаара бээр чүве болгай. Ынчангаш, кыш болурга буттарым үжүй берген чоруур, чылдың иштинде ээжээмниң

кежи та чеже сойлур чүве ыйнаан, ол дугайын чугаалаан-даа херээ бар деппе.

Чадырга кирип келгеш, будум чылышып олурарымга, Черликтен бирде өөрээн-даа чүве дег, бирде коргуп, сезинген-даа чүве дег ээрэ-дир.

Бежендей биле Каңгый чадыр иштинче бакылааш, менче алгыржы-дырлар:

— Ававыс келди, божуу-ла, божуу-ла, Салчак — дишкеш, ыыттары чиде бердилер.

Болар мени мурнап авамга чеде бергеш, ооң эккелген чувезин көрүп кааптарлар болгай дээш, дыдык майыктааштарымны дүвү далаш-бile төлүрт кылдыр кеде соп алдым. Ынчаарга идиктеримниң улдуңунда ыяштар чыпшыр шарып каан чүве болгай, оон ыңай олар меңээ улуг-даа турган. Ынчангаш мен чүгүрүп ыңай боорумга, дыдык таар дег майыктаажым, эзэр төрепчизи ышкаш калбаңнаан, мени мырыңай чер алыспайн-дыр.

Дүвү далаш-бile чүгүргеш, тей кырынга үне халыда бердим. Хүн элээн бедий берген турган. Орукту куду Черликтен шошкуп бадып чыдыр. Канчап-ла бир көре бээримге, арыг кыдыындан авам биле угбам Албанчы элээн улуг чүвелер чүктеп алган олбо талазындан чаяңнаан базып олурлар.

Бежендей биле Каңгый шагда-ла чеде берген, оларның чанында чорлар. Авамның арнын көөрүмге, дериткени-ле кончуг.

— Чүнү эккелдин, авай, кайыны алдың? — деп алгыра-алгыра авамдан айтырдым.

Авам холун чая-дыр.

— Ыыттава-ыыттава! Тараа-дыр. Чиир сен — деп оожум чугаалады.

Бежендей база-ла ужа-тура дүшкен, өөрээни-даа хөлчок, менден-даа дыкадыр алгыра-дыр:

— Ынча хөй тарааны кайыны алдыңар, авай?

Ававыс арай чаңчай аарак, ынчалза-даа чассыдып:

— Кайыны-даа алган болза сеңээ ол хамаан чүве бе, ынчаш?

Хооруптарымга, чиир силер харын — дей-дир.

Ававыс чадырже улады. Бистер-даа соондан чүгүржүп олур бис. Чадырга четкелек чорааш, ававыс чүктээн чүвезин ооргазындан дүжүрбейн-даа бедикчигешке олуруп алды. Идииниң хончузундан багай сөөсken даңзазын ушта тыртып эккелгеш, доорап каан хараган-бile холуглуг кузумун тиккеш, буруладыр таакпылап олуруп алды. Таакпызының ыштары бөкпек-бөкпек кылдыр үнүп турган.

Албанчы чадырдан одуш эккелгеш, шоодайның аксын чеже тырткаш, хүнгэ кызыдыр дөгеленип каапкан чүве дег, кызылтасты олче ура берди.

Ол хүн биске чиик болгаш өөрүшкүлүг турган.

Хөөрежип, каттыржып туарывыс-даа кончуг. Алгыйда тараа дазыртырып-ла тур. Шуптувустуң аастарывыста хооруп каан кызыл-тас кайыртырып турган.

-
-  1. Бо эгени чуге ынчаар адаан деп бодаар сiler? Өскээр канчаар адап болурул? Бодалдарыңарны бадыткаңар.
 -  2. Тас-Баштыгның уругларының найыралдыын канчаар көргүс-кен-дир, чижектер-бile бадыткаңар.
 -  3. Авазының уруглары дээш сагыш човап, оларга ынаан илереткен одуруугларны номчааш, сайгарыңар.
 -  4. “Тыва дылдың тайылбыр словарындан” база улуг улустан айтырып тургаш, *быжар-думаа, кымзар, идиш, одуш, божуу, черниң чери-бile, моожа, хоорзун, мажак, туткууш, алгый, былгааш* деп сестерниң утказын тайылбырлап бижээш, домактардан чогаадыңар.
 - 5. Эгеге хамаарыштыр бодуңарның сонуургаан, сагыш-сеткилиндерни дүвүреткен кезээнцерге чуруктан чурааш, ону камгалаңар.
-

Шаагай

Черликпен хенертен үне халааш, чоон ыыды-бile ээре берди.

— Барып көрем, кым келген эвес — деп, авам айбылай-дыр.

Үне халыдым. Көөрүмгө, үш альттыг кижи кел чыдыр. Мурнунда чораан хәэлиг көк торгу тоннуг, киш кежи бөрттүг болгаш хүрең чиңзелиг кижи эзериниң кырында аары кончуг кылдыр саспайты олуруп алган, чүгениниң дынын ол-бо чайгылаан,

дарый-дарый кымчыланмышаан, «чу-чу» деп, ынчап чаңчыга берген чүве дег чоруп олур. Ортузунда чораан кижиини көөрүмгө, хүрөң тоннуг, хураган кежи бөрттүг, ак-көк чиңзелиг болду. Эң соонда чораан кижиини көрүп четтикпейн барган мен: шагдала дүже халый берген аyttтар артында турган.

- Кым келди? – деп, авам айтырды.
- Аъттыг улус-ла-дыр – деп аяар харыыладым.
- Дадайым ыңай, ат болдувус! – деп, авам аңгадаан тур.

Ол аразында аъттыг кижилер аyttтарын баглагылап кааш, чадырның чанынга четкилеп келген болду.

– Чадырда кымнар барыл, ядараан қулугулар! Ыдыңдарны хай деңер! – деп, келген улустуң бирээзи алгы-кышкы-бile хөректей-дир.

Улуг угбавыстың аайы-бile, Черликтенни Мергенниң кыдышынга аппаргаш, дыт будуунга баглап кагдывыс. Оон башка ол дээргэ чадыр чанынга бөрүлер кээргэ, үзе-чаза сон кааптары ышкаш кылдыр, чедип келген дүжүметтерни база чазарлап кааптар болдур ийин.

Ававыс чадырдан үне халааш, келген дүжүметтерниң баарынга дискектенип сөгейгеш, самдар тонунун әдээн чада каггаш, сөгүруп каап олур.

- Амыр-ла, амыр-ла – деп мендиледи.

Ол кижилер амыр-мендиге харыылавадылар-даа. Оларның карактарын көөрүмгө, бар-ла шаа-бile ажынган чорду. Кымны-даа көрбээн чүве дег, чадырже ыттавайн базып олурлар. Тоннары дырыштыр-дырыштыр сыйтынгылай берген, ченнери дээргэ холдарындан узап баткаш, халацайнчып, хол-хавының-даа орну бооп, кымчының-даа орну бооп чораан.

Бис kortкаш, чадыр өгнүң алажыларының доорзунда күс-келер дег сыңып киргилей берген чыткылаан бис. Көрүп чыдарывыска, үс-чаг чоткулап каан идиктер казапчада чедип келдилер, оон дораан- на бистиң чанывыста келди. Келген дүжүметтер кезек ыттавайн хорадап тургаш, холдарын, ченнерин чайып, хөректеп-ле үндулдер:

— Амырлаан-умурлаан, ядараан кулугурлар! Силерге «амырны» таптыг көргүскей бис аан, дора-өлчүктер! Бээр дыңнацаар, кулугурлар!

Кирип келгеннерниң бирээзи алгыйда уруп каан чыткан тарааже айыткаш, хөректенди:

— Кымның тараазын сыйрып олур сiler, тояланчылар!

Ававыс харыылаар деп чорда, келгеннерниң бирээзи чара киргеш:

— Кижи билбес эвес — кажан, каяя тараалыг чоржук болар! Узун-Чоодурнуң тараазын оорлап алганы ол-дур!

Бир дугаар дүжүмет тургаш, улам-на өнемчип:

— Узун-Чоодурнуң тараазын алганыңарны таптыг өчүп олуруңдар, чыланнар!

Ол дүжүметче көрнүп кээривиске, диштери арзая берген, чараазы ол-боже чаштагылаан, хөректенип тур.

— Оо, кайын ындыг боор, дээрги хайыраатыларым! Бо хоорган тарааны бис, Сарыг-Септе орус чоннарның ыяштарын доорап бергеш, ооң садыынга алдывыс. Ам база баар болган бис. Өске кандыг-даа тараа көрбээн бис — дээш, ававыс калбаш кылдыр сөгүрүп кагды.

Улуг дүжүметти мен танып кагдым. Даш-Чалаң болду. Ооң арны кезээде ыжык чүве ышкаш чоруур, думчук орнунда кызыл эът дөнчүгеш! Даш-Чалаң чадырның дөрүнде, эжинче көрүндүр, ламаларның хола бурганныры ышкаш, маспактанып олуруп алды.

Тарааны кайынын ап алганын ававыс тайылбырлап бергенинин соонда, Даш-Чалаң авамның чанынче пага ышкаш кылдыр халып келгеш, кончуг улуг чылбыга ышкаш болу берген, хөректей-дир:

— Аа, чүүже? Кончуг мелегей боор бо! Сен оорлаваан болза, кым ону алыр чүвел? Чугаалап олур, кулугур! — дээш, авамны чеци-бile бир орааштыр шаапты.

Ававыс ойта барып дүшту. Авамның арнынче көрүнден корткаш, донгая бердим, ынчалза-даа карактарым боттары чайгаар ынаар тырта берген — эмгежок хөй хан төгүлгенин көрүп кагдым.

Ол аразында Даш-Чалаң мээн кулаамдан кээп сегирип алды:

- Аваң бо тарааны кайынын эккелди, чугаала, самдар кулугур
- дей-дир.

Мен чаагымны бопуйту үрдүнүпкеш, чүнү-даа ыыттаваан мен.

Дүжүметтер тура халышкылааш, чадырның иштинде чүү-хөө чүвелерни быдарадыр октап, диленип туруп бергеннер.

– Эки диленцер. Кайнаар чажыра кааптар деп болар. Тывылбаза, бо чүвелерниң иезин кымчы-бile каш сывыра шаапса, ам сөглепкей аан – деп, Даш-Чалаң дужаап, хөректээн тур.

Чадырның иштинден чүве тыппайн, дашкаар үне бергеш, чадырны долгандыр дилеп туруп бердилер.

Ол аразында кара салдыг узун кижи шанактанып алган чедип келди. Дүжүметтерни көөрүмгө, Узун-Чоодур бай деп адап турганнар. Ооң-бile кады чадырывысты долгандыр дилеп димзенгеш, база чүве тыппааннар.

Ававыстың холдарын хүлээш, чадырже көрүндүр күдүк базындыр олуртуп алдылар.

– Хап туруңар, сөглевейн кай баар! – деп, Даш-Чалаң дужаады.

Хүрең тоннуг дүжүмет авамның хүлүп каан холундан хирлиг идии-бile хере тепкеш, бажын бодунун дөңмээнин кырынга чыпшир тудуп алгаш, шагаайтай-ла берди. Каан хап чорда-ла, авамның чаагындан кара-хүрең хан төктүп келди.

Дүжүметтерниң чамдызы ававысты эттеп-эриидеп, байысаап турда, ескелери чадырны дескиндирип диленишиаан турганнар. Өгден шала ыракта хөртүк-бile дуглап каан серижигеш чанынга димзенип чораан дүжүметтерниң бирээзи ында кускуннаан соонда, холун былгай-дыр. Дүжүметтер шуптузу ынаар калбаңнадыр чүгүрүшкеннер. Ол серижигеш – өшкү кажаазы, ооң иштинде хар-бile кырын хөөп каан тараалыг шоодай чытканын көрүп каан. Торга ышкаш шиш думчуктуг, чыпшияңчак арган ак дүжүметчи гештиң карак-кулаа илези-бile өөрген, мында моон өске байлак база хөөп кагбаан бе деп чү-

вени билип алыр дээн чүве ышкаш, “хи-хи” деп каттыргылааш, кымчызының сывы-бile шоодайны долгандыр кылын харны деже иткилеп кылаштап тур. Тыпкан дүжүмет шоодайда тарааны Даш-Чалаңга, а оозу кымдан-даа айтыrbайн, Узун-Чоодурга дужаап берди.

Дүжүметтер узун кара-салдыгга канчаар-даа аажок чашпаалап, «кожай-кожай» дижип адап турганнар.

— Силерниң тараацар бо-дур. Ап алыңаr. Бир эвес бо тараа мында чок-даа болган дижик, иий кырывыс dort сынар, дөмейле өске черден, өске улустан тып бээр ийик бис — деп, демги чашпаа дүжүметтер холдарын баарынга чыпшыр туткулап алган, баштарын согаңнагыладып турганнар.

Узун-Чоодур ацаа таалааш, салдарын сүйбагылааш, мактаннып эгеледи:

— Аа, күш эки-дир, таныш, сен менде келир-ле, шай чиир бис, ижер арака база бар-ла — деп багайтыр тывалап чугаалайдыр.

Узун-Чоодур шоодайны шанааның иштинге кагаш, аъдын кымчызы-бile «дарс» кылдыр каккаш, харны бурулады Сарыг-Сепче хап кире берген.

Дүжүметтер ол черинден ээп келгеш, күдүйүп алган олурган ававысты чаактарынче база катап шагаайтай бергеннер. Ке-жээки ыыт-шимээн чок агаарга, авамның чаактарынга дегген шаагайның даажы чаңгыланып турган.

Демги торга ышкаш дүжүмет угбам Албанчыны кээп сегирип алгаш, холдарын хұлуп кагды. Дүжүметтер аyttарын мунгулап алгаш, ававыс биле угбавысты, адигуузун малдар ышкаш, сүрүп алгаш, чоруур дей бердилер. Ававыс арнының ханын эдээниң ужу-бile чодуп алгаш, дискектенип олурганындан турбайн-даа, харын улам-на черже эде олура дүшту.

— Өлүрер-чиидирер дээн болзуңаrza, маңаа багай чадырым чанынга, чаш уругларым көрүп турда, өлүрүңер! Кайнаар-даа барбас мен! — деп, авам дыңзы-бile ылавылап чугаалады.

Хүрең тоннуг дүжүмет узун кымчызы-бile дап берген соонда, кымчызының баа авамның эъдинге барып ораажы-ла берди.

Соонда чораан кижи эзеринде дергилеп каан аргамчыны чеже тыртып алгаш, авамның хөрээнден киир каап алды. Авам оон ыңай чүткүп шыдавас апарган. Угбавыс Албанчыны мурнунга сүрүп алгаш, чоруур дей бергеннер.

Албанчы Даш-Чалаңче әглип келгеш, бистиң талавысче угландыр човууртай-дып:

— Ол чаш уругларны канчаар чүвел?

Даш-Чалаң бар шаа-бile каттыра берди. Арның көөрүмге, куруг-ла борбак кызыл-кызыл шивишикилер чөржейжи берген чүве чораан.

— Хош, ядараан кулугур! Ам сактып келдиң бе? Ха-ха! Бо дора-өлчүк чүвелер кырылгылап-даа калза хамаан бе? Өзүп-доругуп-даа келзе, олардан чүнү алыр боор? Олар база оорлар болур ыйнаан! Ам дээрезинде бодуң амылыг болганында ыыттавайн чоруп олур! — деп, тенек аараан бөрү дег, ырланып кагды.

Даш-Чалаң угбавыстың чанынга чедип келгеш, чудуруубиле бир үстүрдү.

Дүжүметтер альттарын кымчылангылааш, ававыс биле угбавыс Албанчыны ховуну куду сүрүп алгаш, чоруй баардылар.

Оон кежээзинде ававыс биле угбавыс хан-шылбай апарган, арыннары барбаландыр ышкылай берген чангылап келгеннер.

— Актын, каразын-даа ылгавас кончуун, а улус чүвези кылыш бергеш, арай деп тып алган тараавысты база былаай берди. Ам канчаар бис, уруум? — деп, авам Албанчыдан айтырды.

Албанчы бажын көдүрүп келди. Арын-шырайы муңгаргай, карааның чажы бүлдөңгөйни берген олур.

— Бистиң биче уруувус Сүрүңмааның адазы Данилдиң чурттап турган черинче чоруй бараалы, авай! Бінда кылыш ажыл-даа бар, уругларга-даа эки болгай — деп кагды.



1. Тас-Баштыгның тос чадырынга келген дүжүметтеринң овур-хевириң, аажы-чаңын тодарадыңар.



2. Эгеге пландан тургускаш, допчу утказын чугаалаңар.

3. “Тыва дылдың тайылбыр словарындан” база улуг улустан айтырып тургаш, чиңзе, саспайты, алажы, алгый, сөгөр,



рер, күдүк базар, шаагай деп сөстерниң утказын ушта бижәэш, домактардан чогаадыңар.

4. Тас-Баштыг биле дүжүметтерниң аразында диалогту рольдап номчааш, тұңнелден кылышар.

Степан САРЫГ-ООЛ

Ол-ла Маскаждық

Кижииниң угааны база-ла чиктиг болур чүве: чамдық дықала улуг таварылгалар соргак-даа чок уттундурған чоруур. А чамдықта, мырыңай-ла беш харлығ турунда, күскү эртен сәэн багай болууцуну avaңның кедирип олурганы, ол болууцунуң майышшак черлерин эде-хере туткуулап орган хаварық холдар хорлаңғы кара буттарыңны тударга, кандыг кайгамчық чылыг, чымчак болганы, ол аразында чушкуунға изиннедир дәэп олурган тыныштар ол-ла хевәэр, ам-даа сооваан ышкаш кылдыр, кырызыжаңға-ла сагындырып, каракка көстүп келир. Олзуг сактыыштыннар кижииниң бажынга, кандыг-ла бир хоочу аарыг-даа ышкаш, бирде чиде хонуп, бирде каданнап кәэп-ле чоргулаар.

Ынчаарда күскү кара-дондак кидин-не шаккыңайнып келген. Сыннар баштарының чоткан хары ийни куду дүнениң не соястаза-соястаза, эзимнер әдектеринден бакылап келгиләэн. Хемнер әриктери азыгларын шаарарты ырланғылап әгелегиләэн.

Ууштаар ашактың бөдей өө Уургайлыг-Алаактың селбер-селбер сарыг дыттар баарынга чүве. Черле оон көжер эвес, кырында дыт күзүрүмү саргарты дүжүпкен, кымысскаяк өглөринден ылгал чок апарған турған. Оон ылгалыр-ла чүвези – өғнүң дүндүүндөн оттуң ыжы бурунайнып турар, ол-ла.

– Күжүр ачай, чоруп-ла көрейн. Ам-на чөпшәэреп көр. Моон-бile бөгүн дөрт өшкү кежи кургады эттедим – дәэш, Маскаждық бир өшкү кежин ынаа артынче аспышаан, чугаалаан.

Алғызын ачазы әдирәэлевишаан, оглунче эләэн үр ыыт чок көрүп олуруп-олуруп:

— Чоруп шыдавас сен, амдыы чыллын чору деп сеңээ чеже чугаалаар чүвөл? Кулааң үду чок язы сен бе? — деп, ашак хорадап, эдирээзин октай каапкаш, хамык-ла тоглаан кургаг божа, кыртыш овааланган ширтээнин самдарларын ажа тырткылап, даңзазын дилей берген.

— Ам эттээр алгы база эвээжээн-дир. Алга оргаш, чүнү тыварыл? Шай, таакпы чок чүнү ижер сiler? Бирде чорудар бооп, бирде хоржок деп, ийи сөглөп орган херек чүл ынчаш? — деп, оол химириенин хыйланган.

— Мен сени тутпайн-дыр мен. Мегелевейн-дир мен. Ыя бичии дары, коргулчун-даа бар-дыр. А даван-даяан доңуруп алзыңза. Мооң мурнунда дииңнеп көрбээн, чер билбес кижи азып-тенип өлзүңзе, канчаарыл? Мээн-бile am чугаалашпа. Бо аваң-бile чугаалаш, оглум.

— Авай, ырак эвес черлерже улус-бile одаг кожуп чорууйн — деп, Маскажык авазынче хөлчок чалынган шырай-бile көрүп, дилээн.

— Анчыын боларның! Чорудар болза, дөө Эргек ашак-бile кады чорутса-даа кандыг чүвөл. «Аваң-аваң» деп чүзүл! — деп, кадай Ууштаарын чемелексээн.

— Ча, ол Семис-Кожай сугдан улдуң кылыш хөмден барып айтыр. Оода идииң дүүтеп берейн. Ындыг идик-бile канчап аңнаарыл...

— Ой, авай, дораан, ачай, дораан! — деп, берзенип алган ийи чеңин чандыр-соора чоруй кеттинип, үне халаан.

Өг чанында кара чаңгыс дөрт даваныг амьтанаң, чалгаараң чыткан Чүрекпен, Маскажык өөрүшкүлүг үнүп кээрге, база-ла өөрүп, хөлчок улуг кудуруун чайып, халып кээп куспактанып, кады өскен өңнүүнүң божаалыг куу чаагын чылгаар чыгыны турган.

Күжүр Маскажык Чүрекпениндең чавыс чыгыны, арган куу болза-даа, кожа алдар аразынга даады маң-бile чоруур болгаш, дораан-на чеде маңнай берген.

— Күжүр угбам, эрги-каксы-даа болза, ийи улдуңдан хайырлап көрүңдер. Ам дораан дииңнээр апардым. Өртээн оон кел-

геш, көргей бис аан — деп, оол маңнап олура чугаалаар кылдыр бодап алган сөстерин дидими-бile чугаалапкан.

Кожайның кадайы оолче-даа көрүнмейн, ындыг-мындыг харыы-даа чок, таакпылап олуруп-олуруп, адак сөөлүнде, белинде бир барба тараа баглап каан чүве дег, арай боорда тургаш, ынаар чүккөн хозундан хадың тозу дег дүрүп каан, шириленген инек кежи уштуп келгеш, от адаанче октапкан.

Маскаждык кезек када ыыт чок, аңгадай берген тургаш, кожайдан дилээн чүвезиниң дугайында даады-ла бодаар бир бодалы сагыжында кирип келген: «Улдуң дилээримге, бүдүн инек кежи тудускаш, ма, барып, аваң-ачаң-бile кады идинтерден кылып алышар-ла дээн болза!»

— Ма, мону эттеп эккеп бериңер. Ийи чаагының кежин алыр сен. Сээн тайгада дииңиң кежи та болур, та болбас. Мый-ыттың сагыжы таңды кырында болгай аан — дээн.

Маскаждык кезек када ыыт чок, аңгадай берген тургаш, кожай кадайының арнынчे ылавылап керген.

— Чүл, Маска, алыр хөндүң чогулу бе? Ачаң мээн алгыларым доосту бе? — деп, шырайы ам бир янзы хуулуп кээп, демги кадай айтырган.

— Алгыларын эттеп-ле турага кижи чорду... — дээш, чуну-даа харыылаар аайын тыппайн, хөмнү қөдүрүп алгаш, үнүпкен.

Ам канчаар, мындыг-мындыг болду деп, ачазы, авазынга кээп көргүскен.

— Уваа, кожар болза дөрт улдуң чавыдай бээр чаак кештери чыдыр. Улуг шары кежи-дир моң, оглум. Мээн бо багай чодаларым хавы мырыңай улдуң чок, ам саваң-даа ызырын-мастаан. Эттевейн дедир аппарып бээриңгэ, бир-ле чүвээ кызаарлар оларың. Аппарып, шык өдекке эки хандыр хөөп каг, даарта соктаар бис — деп, Ууштаар ашак оглун-даа, кадайын-даа муңгаратпас дээш хүлээп алган.

— Шак ол кеңгиргэ ижинниг, хирээ диштиг көк тулуптуң чазый караан доллар чүве кайда боор. Чүгле өлү бээргэ, кускун соктап чиптергэ, ацаа элезин доллар он. Чаш төл улдуң дилээргэ, ону ажыглап, бүдүн шары кежи чүктедип бээр чүзүл? — деп,

Масканың авазы оглу үнен бээрge, арай муңгак чугаалап эгелээн.

— Ча, ыыттава, кадай. Оглуң муңгараий бээр. Оларның чазыйын ам чаа көрүп каан эвес бис. Бистиң күжүвусту чеже сыыrbажыктар. Ажырбас, аяа долар хүнү келир он.

— Кулугурнуң бо оранга хырны чарылганын көрбезимзедаа, Эрлик оранынга ыяап-ла ужуражыр мен. Шак ол сырып олуары аьш-чемни бүрүн делгээш, чүгле аксы четпес кылдыр херип каар, каара када берген турага оң — деп, кадай бир-ле тоол чугаа дыңнаанын сактып, тырттынып чугаалаан.

Эртенги кара шайынга бир-бир аяк тараазын каап чип алгаш, өөнүң чанында хөм соктаар чудуунуң чанынга туруп алганнаар.

Бирээзи андарып бээрge, бирээзи соктап, элчип-селчип, аар, чиик ийи докпак-бile хөмнү соп-ла эгелээн.

Күжүр Маскаждык, бирээде, дүрген аңнап чоруксаазы келгеш, ийиде, өске-даа эңме-хаяажок алгы эттеп турага ачазынга мындыг божа, хөөдүг чок көк шири сөөртүп эккеп берген буруузун билингеш, өө тынгыже соп туралын хүнзээн. Соктаар-даа, далгырып-даа — чымчавазы берге болган.

Он үш харлыг оглунуң карак кызып турагын көрүп, ону кээргээш, Ууштаар пар дыттан кылган үш кончуг докпак салбарааже соккан. Далгыгың ийи сүргүзү сынгыже баскан.

Адалышкылар ийи хүн шак ынчаалдыр ыйтылдашкаш, демги хөмүн чымчады эттеп алган. Кайызының-даа адыжында кеш чок: көк-көк суглангылар. Кады чоруур дээн улузу база даарта чоруур дей берген.

— Доп-дораан аппарып бергеш, бергенин эккел, оглум — дээш, оглун ашак чорудупкан.

Кожай кадайы былгаар дег кылдыр арыдыр эттеп каан шары кежин чада тудуп көргүлээн. Ылаңгыя ооң чаагының кештерин ийи-даа удаа тудуп суйбагылааш:

— Ам-даа эди ханмаан хөм-не-дир, оол. Ийи чаагының кежин бээр мен деп турда-ла, кончууцарны але — дээш, хачы дилей берген.

— Мырыңай ийи хүннү бадыр амыр-соксаал чок эттедивис.

Бо холдуң кончуун көрден, угбам, ачамның холу моон-даа артык хаварган – дээш, Маскажык холдарын көргүсken.

Кадай ыыттавайн-даа, ийи чаактың баштарындан чаңгыс оолдуң идиин улдуурарынга арай боорда-ла чедер хирени үзе кескиләэш, октагылапкан:

– Ма, харын-даа бердим көрдүң бе. Чедир эттевээн-дир силер. Дииннээш кээриңге, амдыы кижи база чугаалажыр ыйнаан – дээш, ийи талазынче доора чаяңнап, идиктериниң улдуңнарын төлүрткейндир сөөртпүшсаан, үне кылаштай берген.

Маскажык чер базып чоруур ачазын кээргээш, баарының чанында соок кара даштар хойлап алган чүве дег, кылаштап чанып келген.

Ууштаар ашак шак ындыг үелерде ыыттавас чаңы-бile оглунун идиктерин даңны атсы улдургаш, эртенинде оглун таныжары чадаг аңчыларынга аппарып кожуп берген.

II

1943 чылдың ноябрь. Кызылдан ырак эввесте Улуг-Хем эрии. Даشتындан көөрге, ындыг-ла онза чүве чок беш-алды ыяш бажыңнар бар. Ону долгандыр көдээ малчын, тараачыннар-даа өглеринге орта дөмейлешпес: картон, шуугай ийикпе, брезент, пөс эргиндилиери-бile оюндактап, дуглап каггылаан элээн хөй кара-шокар өглер-бile холушкан тыва ажылчын сууржугаш – Кызылдың алгы эттээр, кидис идик өөр заводу ол.

Хүн үнер талакы ханазы кызыл-хүрең апарган чаа, бедик, ак ыяш бажыңның кырында узун-узун, кара хоорзалардан хоюг кара ыштар бургурткайнып үнгеш, хүн херелин дуглап тураг кыштың соок шаң-туманын шоюңайндыр өрүмнеп эрткеш, ынаар дээрже үнүп турган.

Заводтуң иштинде – ооң аңгы-аңгы цехтеринде хөй аныяк ажылчыннарның даشتыкы хевири база-ла демги өглер сагышка кирер: көдээден кедип келген тыва идии-бile ийикпе, азы алгы чүвүрүү, өшкү кежи шээживээ-даа хевээр. Ылангыя бир ажылчынның бөргү ревшериг, өшкү кежи тыва шээживектиг, күү брезент чүвүрлүг, иви бышкaa идиктиг болду. Оларның

аразында бүрүн хоорайжаан, бүдүрүлгеге дирт кара кылдыр дадыккан хоочун ажылчыннар база элээн хей.

Шак ындыг аныяқ, чап-чаа хевирленип олурап болза-даа, ол чүгле Кызылга эвес, харын Тыва Арат Республикада ады үнген завод турган. Ол завод Ада-чурттуң Улуг дайынының ыраккы тылында ажылдалуп турагар хөмүр-даш уургайларында, балык тудар артельдерде хөй ажылчыннарны, көдээгэ малчын, тараачыннарны идик-бите, хамык айт дерии-бите, фронтуже чорудуп турган муң-муң хаак баглары-бите чуртту хандырып турган.

Ынчангаштың ооң аныяқ ажылчыннарының сеткил-сагыжы Уралдың, Сибирьниң улуг-улуг заводтарында ажылчыннар-бите дөмей турган. Олар дөмей-ле күш-ажыл фронтузунуң солдаттары.

Заводтуң иштинге кире бээрge, бүгү-ле цехтеринде машина-багажазы шингирээн, бир черде алгызын идээлээн, хөөткен, эттээн, кургаткан, ыштаан, дүгүн дыттырган, салдырган, өйген, соктаан турагар. Ынаар кире берген кижинин думчуунга янзы-бүрү чыт кээр.

Хөм эттээр салбырга кире бергеш, хөй-ле ажылчыннар аразында бир күдер кара, хоочун ажылчын-бите каш сөс шывадашкан бис:

— Бир ажыл хүнүнде каш хөм эттээр нормалыг чүвэл аца?

— Бешти эттээр ийин! — деп, кончуг улуг шары кежин шыгырткайндыр дизээлевишаан, харыылады.

— А силер база хүнде бешти эттеп тур силер бе? — деп, ол шимээнгэ чандыр дыңнааным чадавас дээш, кайгап, ылавылап айтырдым.

Мээн арнымче эш топтап көргеш:

— Бо чоокта келген аныяқ оолдарда безин норма ажыр күү-сетпейн турагар чөгенчиг кижи амдызыында чок-ла чуве-дир бо — деп, хамык өөрүн эргилдир көрбүшсаан, «чүү мындыг өөдөжок айтырыг салып турагар кижи апарды, көрүнерем, оолдар» дээнзиг дыңзыг үн-бите чугаалады.

— Аа-а, магалыг-дыр оо! Силер бөгүн чежени эттединцер, эжим? — деп, шын-на сеткилим ол дээрзин бүзүредир сагыштыг,

магадап алгырдым. Мээн оомну билип кааш, демгим шала чазык чугаалады:

— Амдызызында он бирни эттеп кагдым. Ажыл шагы ам-даа элек-тир. Ам бир ол хирени чайлтыг алгай aan мону ацар.

— Талыгыр чүве-дир оң... — дээш, ол хире соксаал чок шимченип турган кижээ шаптык болурундан сестип, ында дужумда ханада хүн бүрүнүң көргүзүг самбыразын көре бердим. Шынапла, нормага доктаар кижи чок, даады-ла 150-200%, 300%. А мырыңай 400% күүсеткеннер бар. Ылангыя 1943 чылдың ноябрьның 7-ден эгелээш, кижи бүрүзү саагайны-ла берген. Ол болза, Дээди Кол Командылакчының 309 дугаар дужаалы үнген соонда ынчап барганы дораан-на билдине берди.

Ол бүгүнү магадааш, демги-ле эжимден айтырдым:

- Силерниң адыңаар кайызы боор ацар?
- Маскаждык дээр ийин.
- Кайы, Ууштаар оглу Маскаждык ышкаждың чүл?
- Ийе-ийе, Ууштаар оглу мен.
- Эх, көрүшпээнден бээр үр-ле болган-дыр бис! Ам харыңаар каш апарган?
- Ам дөртен ийи...

Демги самбырада ажыл нормазын дөрт чүс хуу азы хүнде чээрби ийи хөмнү эттеп турар кижилерниң бирээзи, биеэги кожай куруяаның хөмүн ийи хүн соктаан ол-ла Маскаждык ол болду ийин моңар!

-
- 1. Күску бойдусту чураан метафораларны ушта бижээш, оларның ужур-дузазын тайылбырлацаар.
 - 2. Чогаалга эгелер аайы-бile пландан тургузуңар.
 - 3. Маскаждык деп кымыл? Оон аажы-чанының онзагайы чудел?
 - 4. Ууштаар ашактың оглу дээш сагыш човаашкынын канчаар билдиңер?
 - 5. Кожайның кадайының каржы, чилбизин кандыг уран-чечен аргалар-бile дамчыткан-дыр.
 - 6. Чогаалда Тывага амыдыралдың өскерлиишкиннерин канчаар чуруп көргүскең-дир?

7. Ада-чурттуң Улуг дайынының үезинде тыва чоннуң патриотчу хөөнүн чогаалда канчаар чурааныл?

8. Маскаждыктың күзелин илереткен одуругларны тыпкаш, О.Саган-оолдуң “Эжишкителер” деп чогаалының маадыры-бile деңнелгени кылыштар.

9. “Ол-ла Маскаждык” деп чечен чугаада кайы одуруглар силерниң сагыш-сеткилициерни доюлдуруп, хөлзетти? Чүгө?

10. Дараазында сөстерниң уткаларын “Тыва дылдың тайылбырлыг словарындан” ушта бижицер: *бөдөй өг, күзүрүм, уургайлыйыг, шири, кара-доңдак, далгыг, сүргү*.

11. “Кижи өзөр, кидис шәйлүр“ деп үлегер домакка дүүштүр “Маскаждыктың салым-чолу” деп кыска чогаадыгдан бижицер.

Чогаал маадырының дугайында билиг

Чечен чогаалдарны номчуп ора, янзы-бүрү кижилер-бile ужуражып, таныжар бис. Оларны ук чогаалдарның маадырлары, киржикчилери азы персонажтары дээр. Литератураның аймактарының айы-бile чогаалда чуруттунган маадырларны аңгылай адаар. Шүлүк чогаалынга — лириктиг маадыр, шии чогаалынга — персонаж, прозага бир эвес чогаалчы боду маадыр кылдыр чуруттунган болза тоожукчу маадыр дээр.

Чижээлээргэ, С.Сарыг-оолдуң “Күс” деп шүлүүнде лириктиг маадыр күску бойдуска, төрээн черинге ынакшылын, өөрүшкүзүн дараазында одуругларда илереткен:

Сарыг торгу олбук чаткан
Садтар ишти оймактарга чоруксаам кээр.
Чаап дүшкен бүрүлөрни,
Чаштар ышкаш, дозуп-сүрүп ойнаксаам кээр.

С.Сарыг-оолдуң “Ол-ла Маскаждык” деп чечен чугаазында автор бодунуң сактышкыннарын дамчыштыр тоожукчу маадыр кылдыр киришкен.

“Кижиниң угааны база-ла чиктиг болур чүве: чамдык дыка-ла улуг таварылгалар соргак-даа чок уттундурган чоруур. А чамдыкта, мырыңай-ла беш харлыг турунда, күску эртен сээн багай бопуунду

аваңның кедирип олурганы, ол бопуундуң майышкак черлерин эде-хере туткулап орган хаварык холдар хорланғы кара буттарыңы тударга, кандыг кайгамчык чылыг, чымчак болганы, ол аразында чушкуунға изиннедир дәэп олурган тыныштар ол-ла хевәэр, ам-даа сооваан ышкаш кылдыр, кырыыжанға-ла сагындырып, каракка көстүп келир. Олzug сактыышыннар кижиниң бажынга, кандыг-ла бир хоочу аарыг-даа ышкаш, бирде чиде хонуп, бирде каданнап кәэп-ле чоргулаар...”

Чогаалчы бодунуң маадырларын номчукчуга тода көргүзер дәэш, оларның даштықы хевириң (портредин), ажыл-херәэн (үүл-гедиглерин) болгаш чугаа домаа база бот-боттарыңың аразында хамаарылгаларын чуруп илередир.

Чогаал маадырының овур-хевириң тургузарынга ооң портреди, ажыл-херәэ болгаш өске киржикилерге хамаарылгазы әргежок чугула.

«Араттың сөзү» деп чогаалдың бирги номунуң «Тас-Баштыг» деп әгезинде аваны автор мынчаар чуруп көргүскен.

«Ававыстың чиңгине ады чок чораан. Бажының дүгү чок боорга, кижи-ле болганы «Тас-Баштыг» деп шолалап турган. Кандыг-бир дүжүметтиң сес-домаан тооваан дәэш, кеземче көргүскени-бile-даа азы кандыг-бир халаптыг аарыгга таварышкаш-даа, ававыстың бажы тазара бергени чадавас, ону бис билбес бис...

Бодунуң дугайында ававыс шоолуг-ла чугаалавас чораан:

— Мен ядыы кижиниң уруу мен. Силерниң кырган-ачаңар ядыы арат Доора-Хемге чурттап чораан. Ийи-чаңгыс ивиден башка, ооң чүзү-даа чок...

Ававыс чараң-даа эвес кижи чүве: сыны чолдак, ооргазы арай бүшкүк...

Бистиң ававыс угаанныг, томаанныг-даа, кылбас ажылы-даа чок кижи. Кандыг-даа бергелерден үнер аргаларны тып ап, бистерни холдарынга көдүрүп алгаш, көрбәэниң көрүп чорааш, доруктуруп алган...»

Ынчаарга «Шаагай» деп әгеде Даң-Чалаңның овур-хевириң мынчаар көргүскен. «...Улуг дүжүметти мен танып кагдым.

Даш-Чалаң болду. Ооң арны кезээде ыжык чүве ышкаш чоруур, думчук орнунда кызыл эттөн дөңчүгеш! Даш-Чалаң чадырның дөрүндө, эжинче көрүндүр, ламаларның хола бурганнары ышкаш, маспактанып олуруп алды.

Тарааны кайынын ап алганын ававыс тайылбырлап бергенниң соонда, Даш-Чалаң авамның чанынче пага ышкаш кылдыр халып келгеш, кончуг улуг чылбыга ышкаш болу берген, хөректей-дир:

— Аа, чүүже? Кончуг мелегей боор бо! Сен оорлаваан болза, кым ону алыр чүвел? Чугаалап олур, кулугур! — дээш, авамны чеци-бile бир орааштыр шаапты.

Ававыс ойта барып дүштү...

Ол аразында Даш-Чалаң мээн кулаамдан кээп сегирип алды:

— Аваң бо тарааны кайынын эккелди, чугаала, самдар кулугур — дей-дир.

Мен чаагымны бопуйтур үрдүнүпкеш, чүнү-даа ыттаваан мен.

Дүжүметтер тура халышкылааш, чадырның иштинде чүү-хөө чүвелерни быдарадыр октап, диленип туруп бергеннер.

— Эки дилендер. Кайнаар чажыра кааптар деп болар. Тывылбаза, бо чүвелерниң иезин кымчы-бile каш сывыра шаапса, ам сөглөпкей aan — деп, Даш-Чалаң дужаап, хөректээн тур...»

Бо ийи кыска үзүндүнү номчуурга, бирги үзүндүде Тас-Баштыг амыдыралы дээш кызымак, ажы-төлүнгө ынак, олар дээш кандыг-даа бергени ажып эртеринге белен, туруштуг, буянныг кижи кылдыр илереп кээр. Ийиги үзүндүде Даш-Чалаң ажырымчы чазый, каржы-дошкун, кээргээр сеткили чок, кошкак улусту дарлап бастыр маадыр бооп көстүп кээр.

Өөренип эрткенивис С.Сарыг-оолдуң “Ол-ла Маскаждык” деп чечен чугааның маадырлары Маскаждыкты, кожайның кадайын, оларның ажыл-хөректерин болгаш тоожукчу маадырның чугаазын дамчыштыр билип алыр бис.

“Күжүр Маскаждык Чүрекпенинден чавыс чыгыны, арган куу болза-даа, кожа аалдар аразынга даады маң-бile чоруур...”;

“...Мырыңай ийи хүннү бадыр амыр-соксаал чок эттедивис. Бо холдуң кончуун көрден, угбам, ачамның холу моон-даа артык хаварган – дээш, Маскаждык холдарын көргүскен”; “...Маскаждык чер базып чоруур ачазын кээргээш, баарының чанында соок кара даштар хойлап алган чүве дег, кылаштап чанып келген”.

Үстүнде чижектерден бичии Маскаждыктың овур-хевири мынчаар чуруттунуп келир: он үш харлыг, арган куу, кээргээчел, биче сеткилдиг, тура-соруктуг оол.

Маскаждык өзүп келгеш, дайын чылдарында алгы заводунун мурначы ажылчыннарының бирээзи деп чүүлдү тоожукчу маадырның чугаазындан билип алыр бис.

Кожайның кадайының аажы-чаңы ооң диленип келген бичии Маскаждыкка хамаарылгазындан болгаш Маскаждыктың авазының хомудап, хорадаан чугаазындан тода кылдыр чуруттунуп келир.

“Кожайның кадайы оолче-даа көрүнмейн, ындыг-мындыг харыы-даа чок, таакпылап олуруп-олуруп, адак сөөлүнде, белинде бир барба тараа баглап каан чүве дег, арай боорда тургаш, ынаар чүк хозундан жадың тозу дег дүрүп каан, шириленгэн инек кежи уштуп келгеш, от адаанче октапкан...

– Шак ол кеңгирге ижинниг, хирээ диштиг көк тулуптуң чазый караан доллар чүве кайда боор. Чүгле өлү бээрге, кускун соктап чиптерге, ацаа элезин доллар оң. Чаш төл улдуң дилээрge, ону ажыглап, бүдүн шары кежи чүктедип бээр чүзүл? – деп, Масканың авазы оглу үне бээрge, арай муңгак чугаалап эгелээн...”

“Белинде бир барба тараа баглап каан чүве дег” деп деңнелгениң дузазы-бile кожайның кадайының ажыл кылбазын илереткен, а ооң каржы, чилбизин “кеңгирге ижинниг, хирээ диштиг көк тулуптуң чазый караа” деп эпитеттер дамчыштыр уран көргүскен.

Чечен чогаалда маадырлар бот-боттарының аразында харылзаалыг, удур-дедир хамаарылгалыг дээрзин үстүнде көрген болгай бис. Ынчангаш оларның тус-тус аажы-чаңнарын,

чурттап турар байдалдарын деңнелгелиг сайгарылганы чорудары чогаалдың кол утка-бодалын тодарадырынга эргежок чугула дээрзин билип алыр бис. Чижээлээрge, Тас-Баштыг, Маскаждык болгаш Даш-Чалаңың, кожайның кадайының аажы-чаңын деңнеп тургаш, бот-боттарынга дөмейлешпес, аңгы-аңгы маадырлар-дыр деп түннеп, Тас-Баштыгны, Маскаждыкты төлептиг (мөзүлүг) маадыр, а Даш-Чалаңы, кожайның кадайын төлеп чок (мөзүлүг эвес) маадыр деп санаар бис.



1. Чогаал маадыры деп кымыл? Ону номчаан чогаалдарыңарда чижектер-бile бадыткап тургаш, тайылбырланар.

2. Дараазында таблицага Маскаждыктың, Даш-Чалаңың овур-хевирлерин долдурууңар.

Маадырның ады	Даштыкы хевири	Чугаазы	Түннели

3. «Мээн ынак маадырым» деп темага кыска чогаадыгдан бижиндер.

Олег СУВАКПИТ

Буянның сергези

Хачалдың терең оттуг мээстерииниң сериин талакы ыйгылаанды честек-кат дээргэе, дизип каан шуруулар-ла, кызыл чайт чүве, безин кижи базар чер тывылбас. Ынчангаш аңаа ол хүн хамык аалдарның уруглары улуг-биче хууннаар, сыгыртаалар туткулаан эндерлип-ле келгеннер.

Катчыларның аразынга Седен оглу Буян база чораан. Ол өшкү саар сыгыртаазын кымны мурнай долдуруупкаш, кезек чып чип чорааш, эжи Баянга дузалажы берген.

Ийи өңүк бот-боттарын мурнажыр дээш хуунун долдурууканын билбейн барганнаар, өске өөрлери база-ла доозупканнаар. Ол хирезинде-ле честек-кattар ам-даа сыптарын ээй баскылай бергилээн, аар салам апаргылаан артып калган.

Уруглар соңгузу хүн база честек-каттаарын дугурушканнар. Оон элээн бадып, кезек-кезек сөөсkenнерлиг болгаш шеттерлиг ажыкка келгэнде, бир-ле чүвени тырткан чоруур орлан эрес Болат өөрүн доктаадыпкаш:

- Чаалыг шагның уржуу дээштиң
Чапаевтен ойнаалыңдар — диген.
- Шын-дыр, шын-дыр! — дижип, оон-моон алгыржы бергеннер.

Болат оолдар биле уругларны ийи үскеш, ийи талага тургузупкан. Кымнар кызыл шериглер, а кымнар фашистер болурул деп айтырыг тургустунуп келген. Кайы-даа тала фашистер болурун күзевес болган. Маргылдаа кыптыгып-ла үнген. Адак сөөлүнде мырыңай хүрежип, сегиржип алганнар...

Ынчан Буян өөрүн соксаткаш:

- Уруглар! Бөгүн Кызыл Шеригге дузаламчы чыыр хүн дээр чорду. Даргалар база келир. Дүрген чоруулудар! — диген.
- Шын-дыр, шын-дыр! — дишкеш, уруглар хууңнарын туткулааш, чамдыктары хаак “аъттар” мунгулааш, тус-тус аалдарынче халчыпканнар.

Буян биле Баян аразында хөөрежир дээш, өглеринге четкилеп келгенин база эскербээннер.

Бышканындан бичии тударга-ла, мышпырлы бээр честек-кадын Буян өгден кирип олура-ла авазынче:

- Каттап эккелдим, авай — дээш сунган.
- Кежээ чүвемни ай — дээш, авазы оглунуң бажын чыттап каан.

Буян сүтке тараа шыгыдып олурда, аъттар даваны дагжап келген соонда, Ак-Хол чирти-ле берген.

— Кымнар келди, барып көрем, оглум — деп, авазы айбылаан.

Буян аяан салып кааш, үне халып келирге, үш аъттыг кижи тутсуп келген.

Бирээзи аът кырындан-на:

- Ыдың хай де, оол! — деп кыйгырган.

Буян тура:

— Ак-Хол, Ак-Хол, сок-сок! — дээрge, оозу кудуруун чайып-чайып, өг артында сери хөлөгезинче чоруй барган.

Демги-ле кижи:

— Ачаң бар бе, оол? — дээн.

— Чок — дээш, Буян уламчылаан. — Хой кадара берген.

Даргалар аyttарын баглаашка баглап кааш, өгже кирип келгеннер. Буянныц авазы Сериц-бile мендилежип, кандыг чурттап турарын сонуургап айтырганнар.

Оон демги-ле дарга олура:

— Даштын иийи өгнүүц иштин эккел бар, оол — дээн.

Буян дораан-на бурт дээн. Өглерниц ээлери четкилеп келгеннер. Ол аразында Буянныц авазы шай хайындыргаш, даргаларга шайын кудуп, тавактарда өрөмөлиг тараазын салгылаан. Оон хола пажын эскеш, шой пажын ожукка салгаш, суг кудуп, мун хайындыра берген.

Демги даргазы дерлиг хаваан шыва тонунуц иштики эдээнинц ужу-бile чоткулааш:

— Бо дарга кожуундан келген, фронтуже дузаламчы чорудар комиссияныц кежигүүнү кижи-дир, бистиц сумуда сургакчылап келген. Монгуш Достай-оол дээр дарга дийин, бисти билбес эвес сiler, айыткааш чоор — дээш, удамчылаан. — Ам даргага сөстен бээр-дир.

Достай-оол дарга кuu шляпазын ужулгаш, алтара кырынга салып кааш, хөрээн ажыдыр чөдүргүлээш, шала чазай маспадактап олуруп алган. Ол Кызыл Шеригниц маадырлыг демиселин, ТАР-ныц арат чонунуц акы-дуңма улуг дузаламчызын болгаш бирден бирээ чокка чугаалааш, сөзүн мынчаар төндүрген:

— Бүгү чүвени фронтуга! деп лозунувус бар. Ынчангаш болган болза, бүгү чүвени ооң адаа-бile чорудуп турар бис. Кым чүнү дузалаксай-дыр, кым чүнү бериксей-дир, адын суму тергиилеклизинге бижидер-дир.. Бистер ону дузалацар, мону беринчөр деп албадавас бис, эштер, эки тура-бile күзээнин дузалаар.

Өггэ кезек када ыржым апарган. Ол аразында Седен кирип келгеш, даргалар-бile чолуккаш, сыртык баарынга барып сөгедектеп олурупкаш:

— Дарга-сайыттар кайынын каккан ирги, кандыг херек ужурунда чор ирги? — дээш, оларны эргилдир көрген.

Суму төлээзи олура:

— Кызыл Шеригге дузаламчы чыыр хүнүвүс-ле болгай. Ынчангаш чор бис, дом. Бо болза, кожуун төлээзи Достай-оол дарга-дыр.

Арбан төлээзи олура:

— Бо кавыны харылаар киживис бо-ла болгай — дээш, Седенче даңза сунган.

— Хоюң канчалдың, ирем? — деп, кожазы өгнүң ээзи ашактан Седен айтырган.

— Келбес улусту чеже манаар боор. Очур сугда кажаалап кагдым, демги оолдар чемненип алыр дээш, чоруй бардылар — дээш, ирей сегел салын суйбагылаан.

Седен олура:

— Дайын үезинде мынчап туруп черле болбас, даргалар. Беш аалдан 113 баш хой, өшкү дузалады, алгы-кеш үүрмек чувени санаваска. Силерниң келиринерни хүнзедир манап келдивис. Ам улуг дүүш эртип тур. Хүннү айыткан соонда, хүн-бile деңге келир ужурлуг — дээш, даргаларны шала чемелей көрген.

Суму төлээзи:

— Эки болган-дыр, озалдаан ышкаждывыс чүл, дуцмам. Ийи удаа озалдап кээп тур бис. Буруулуг болдувус — дээн.

Седен оглун даштын боор дээш кый дээн — харылааваан, база кый дээн — сураг болган.

— Бо оолдуң кайнаар баары ол, хой ырай бээйни — дээш, даргаларга тавактарга эйт салгаш, айыткаан.

— Чооглап көрүңер. Мүнден куткулавыт, Серин.

Достай-оол дарга сарыг сыптыг бижээ-бile ужа чалын кеспишаан, айтырган:

— Оглуңар хары кажыл аан?

— Ашак болган кижи дийин, дижи безин курзук, көрбединер бе? Чедилээн ашак дийин.

— Кончуг-ла орлан-шоваа, эрес-кежээ оол-дур, өзүп келгеш, та кандыг эр болур ыйнаан!

Сериң олура, мактанган:

— Авазының оглу ындыг болбайн канчаар.

Ол аразында даштын хой диигейнип келген.

Седен олура:

— Күжүр эрни, хоюн девээледири-бile кирип келген-дир
— деп чугалаан.

— Че, даргалар, ам аштанип-чемненип алганда чүү боор,
даалда өшкү-хойну, белек-селекти хүлээп алыр силер бе, чедирер
ийи оол база томуйлап каан чүве. Мен хуумда 14 башты салдым.
Кымның каш башты бергенин, чүнү дузалаанын чизелеп каан чүве.

Улус шупту өгден үнүп келген. Буян ада-иезинге халып
чедип келгеш:

— Авай, мен ам молдурга мунар мен, хой кадаарда ча-
выдактаар ак сергемни кызыл шериг ақыларымга берейн шин-
ме — дээн.

Буянның ада-иези харыылап четтиктейн чыдырда-ла, суму
төлээзи үзе кирген:

— Ынчап баарга кайын болдур, оглум. Өөң ишти 14 башты
берген-дир. Ында сээн өшкү-хоюң база бар-ла болгай.

Буян тура:

— Серге мээн бодумнуу-дур, авам-ачамның-даа эвес — дээш,
алдыртпаан.

— Шын-дыр, оглум. Ак серге сээзии болгай, бодун бил —
дээш, авазы оглун чассыдып каан.

Ачазы тура:

— Эр хей-дир моң, сен дег бичии дайынчылар кызыл ше-
риглерниң аразында бар болганда, сен оларга бодуң хуунда база
дузалаар ужурлуг сен — дээш, оглунун бажын суйбап каан.

Буян хой аразынче халып кирген соонда, молдурга дег ак
сергениң сегелинден чедип алган үнүп келген.

Даргалар оолду чаптап, чарашсынып, хүлүмзүржүп-даа,
каттыржып-даа турганнар.

Достай-оол даргага Буян сергезин тутсуп бергеш:

— Сергем семис чүве, черле аргыспаан, Кызыл Шеригге
чедирер силер — дээн.

Ол тура:

— Ынчаар бис, четтирдивис, Буян — дээш, ону өруү көдүргеш, бажын чыттар каан.

Арбан төлээзи сергени эзеринге үнгерип алгаш, үстүү аалчे чортуп каан.

Буян сергезиниң соондан үр-ле көрүп алгаш турган, оозу олче көргеш-ле, алгырып каап чоруй барган.



1. Чогаалда чечен үени тодарадыңар.

2. Буян деп кымыл? Ооң аажы-чаңынга характеристикадан беринер.

3. Аалга келген улустуң сорулгазын тодарадыңар.

4. Буянның овур-хевириң чуруурда, автор дылдың кандыг уран-чечен аргаларын ажыглаан-дыр? Оларның ужур утказын тайылбырлаңар.



5. Мәэс, сыгыртаа, салдам, чирти-ле берген, шыва тон, ақы-дүңма дузаламчы, чолукшуур, сөгедектей олурар, үнгерип алған деп сөстерниң утказын тайылбырлааш, домактардан чогаадыңар.



6. Фронтуга дузаламчы эки тура-бile чоруп турар дээн бодалды чогаалда чижектер-бile бадыткаңар.

7. В.И. Чапаев деп кымыл? Ооң дугайында улуг кижилдерден айтырып, материалдарны чыып, номчуп таныжыңар.



8. Ада-чурттуң Улуг дайынының чылдарында силерниң чуртап турар чериндерден фронтуже чорудуп турган ақы-дүңма дузаламчы дугайында кыска төлевилелден кылыңар.

9. 1941–1945 чылдарда Тыва Арат Республиканың Кызыл Шеригге чорудуп турган белектериниң дугайында шинчилел ажылындан кылыңар.

Михаил ДУЮНГАР

Хлеб

Күс дүжүп кээрge, Байырны ачазы ушкaryп алгаш, Дыттыг-Хемде аалындан өөренир школазынга эккеп каан. Ол эрткен чылын бирги класска интернаттың долу хандырылгazынга

өөренип кыштаан. Ам бо кээрge, интернатка турар улус хэй, удуур орун-дөжек чедишпес-тир дээш, ону чартык хандырылгага хүлээп алган. Ол чул дээрge, аль-чемин болгаш идик-хевин школа хандырар, а чогум чурттаар чери ада-иезининц бажыңы апаар. Байырны ачазы бодунуң кады төрээн оол дуцмазының бажыңынга тургузуп каан.

— Эки кызып өөрен, оглум. Чаныксава. Кышкы дыштанаалгада келгеш, ап алыр мен. Башкыларың сөзүн дыңдан тур. Школаңынц берген хевин хирлендирбе, камнап кедер сен — деп, чоруурда ачазы чагаан.

Хүннүң-не интернат столоваязындан барып чемненип алрын Байыр утпас турган. Идик-хеви база, ында-хаая-даа болза, солудуп алыр. Хеп үлээр фронтучу, аскак буттуг Түлүш акый кээрge, боду-ла сагындырып кыйгыра бээр.

Дүйште база кежээ столоваядан чемненири Байырга көңгүс хала чок. Өөренип чоруурда-даа, кежээ, кичээлдер соонда чанып кээрде-даа, кылаштаар оруунда турган ыяш куу бажыңчыгашче кире халырын часпас. Аңаа бодаарга, эртенги чем-бile херек арай нарын. Ылаңгыя амгы ышкаш кышкы үелрde. Чемден озалдавас дээш, кара даң бажында тургаш, столоваяже халып бадар. Оттуп кээрge, бажың ишти соок, ээлери безин турбаан болур. Хөмүр деп чүве бар эвес, кежээ чыдарда, суугуже чеже-даа доң ыяш долдур дыгып каарга, ооң чалыны бажың иштин кезек када чылыкткаш, дораан суларап сооп келир. Чаш чувени, уdup алзын дээр эвес, улус эртен албан-бile оттургаш, столоваяже халыдарын черле утпас. Тараа-быдаа ховар болгаш, ол үениң байдалы ындыг турган. Акызының көк-хырын өйүнде ажы-төлү база хөй. Ада-иезин санаваска, безин чеди кижи.

Ынчан, амгы шаг ышкаш, элбек, хостуг садып турар хлеб кайда боор. Колхоз пекарнязынга быжырган бичии хлебти школаже кииреринден аңгыда, башкыларга болгаш ийи чаңгыс албан-хаакчы улустарга четчир шаанче мүн-не берип турган. Чонга ында-хаая-ла душ бооп саттына бээр. Ынчангаш хензиг сууржугаштың чуртакчыларының барык шуптузу тараа

соктап, далган тыртып чиир. Байырның акызы суг база ындыг.

Улус, таварылга бооп, пекарнядан хлеб апканда, кедергейле сонуургап, камнап чиир. Артында бажың иштинге чаагай хлебтиң чыды долуп, бичиилерниң байтык, улугларның безин каткы-иткизи, чугаа-сооду бир аңғы хөглүг апаар. Ол хлебти чиирде, артында эндере-чаза оонактай бербес, а чүгле өгде бар кижи санынга кескиндилей үлей кескеш, холдарынга тутсугулап бәэр. Күжү, дери-бile өстүрүп алган чеминге кижилерниң хумагалысы, хұндұткелдии ол хире турган.

Бир-ле әртен ачазының дуңмазы әр Байырны оттурупкан:

— Тур, оол, ойт! Чемиң шагы чеде бербәэн чүве бе? Барып хлеб, чигириң чип алгаш маңнап кел. Даشتын сооксумаар ышкаш, чылыды кеттинип ал.

Кезек када чылыг шуглаандан турар хөңну чокталып чытса-даа, Байыр хевин кеде каапкаш, бажыңдан үне халып келген. Ийи айның чыккылама соогу даشتын меннип чоруп турган. Тынарга, хөрек ишти безин соолацайнып келир. Чаактарны ооң ажыг чывары дораан-на чылгап эгеләэр. Ээлери әртежиктепкен ийи-чаңгыс бажыңнарның әжиктериниң кыйырашкан дааштары дыңналза-даа, соңгаларының чырықтары бус-шаң өттүр арай деп-ле бүлүререр. Соокта тас баштыг думчуктарын селбер кудуруктарынче суккулаптар ыттарның эәрер харыны чок.

Әртенги соок чывардан чаактарын холдары-бile дуй тудуп чорааш, Байыр столоваязынга кәэрge, оозу шоочалыг хевәэр болган. Ынчалза-даа чем кылыр талазында хоолайындан кызыл көстер бүргүртүнүп турарын ол эскере тыртып каан. Доңуп турар эвес, ынаар чүгүрүпкен.

Кирип кәэрge, кезәэде омак-хөглүг каттырган-иттирген чоруур повар Өлчеймаа угбай кайгап айтырган:

— Ойт, Байыр, күжүр-ле төлүм! Бо кандыг кончуг әрте келгениң ол? Чем кылыр мен безин чаа от салып чыттым. Доңган деп чувенни, але? Бәэр әртип отка чылын, шымда. Чаактарың үжүүр чеде бербәэн чүве бе, каям көрейн.

Оол эрте чедип келгенин ам-на харын эскерип билип кааш, шала эгенгензиг харыылаан:

— Акым оттурупту. Өөрүм чемнени берген боор деп бодадым. Ону дыңнааш, Өлчеймаа угбай хыйланыксаан:

— Чүү адам чүвел аан ындыг. Чаш уругнуң доңар-дожаарын билбес, астыга бәэр ышкаш.

Даш, малгаш-бile сомалап туткан печкада ужуткан кургаг токпак ыяштарның дызырткайнчып хып чыдары-даа кедергей. Байыр ооң кыдыынче чоокшулат, сандайга олуруп алган. Дээвиирде аскан деңниң чырыындан ыңай-бәэр кылаштаан Өлчеймаа угбайның хөлегези бирде кедергей чоон, бирде узун шөйбек апарғылат, өрээлдиң ханаларынга ол-бо көжүп турган. Байырның доңган хол-буду, арын-бажы чоорту чылыккаш, чымыңайнып эгелээн. Повар ооң-бile-даа чугаалашпайн, паш савазында-ла ажаанзырап турган. Байыр от чалынынга даам-чырап, кыдыында ханага чөленикsep бажын салгаш, бичии када удуй берген. Ынчалза-даа ол удаан, удуванаанын-даа орта билбейн барган. Чүге дээрge повар ону дораан оттурупкан.

— Одун, оглум. Шай, хлебтен ижип-чиp алгаш, халып чана бер. Мүн болуру ам-даа элек-тиp.

Чемнени шаap алгаш, чоруур деп турда, повар ооң холдарынга каш даш ак чигирлер тутсуп берген.

Ишкен изиг чеминиң тевии-бile боор, Байыр үнүп кээрge, демгизи дег улуг соок чок ышкаш сагындырган. Ынчангаш ол улуг-ла чаныксаар хөңнү чок, столовая кыйыында өөрү-бile чай кадында ойнай каалтары, харын тапталдыр базып, дошталдыр маңнажып алганы чингэ орук чунгузунга келген. Аңаа чааскаан ужуп-туруп ойнап турда, мурнунда бир чыкпак бажындан чаа быжырган хлебтиң чаагай чыдын удур хаккан сырын Байырның думчуунга чедирип келген. Кеткен хеви безин хлеб чыды сицип калган чоруур, шириин шырайлыг быжырыкчы угбай-даа ооң карактарынга хензиг када көстү хонган.

Башкыларның ол пекарнядан хлеб халас бижидип ап турарын Байыр авазының дуңмазы болур Билзек-кыстың аайы-бile кончуг эки билир. Ынчангаш оолдуң бажынга хеп-хе-

нертөн мындыг бодал дүшкен. “Билзек-кыстың адынга хлебтен бижи迪п көрзе канчап баар деп? Халас, амыр чүвени! Адырам...адырам... Оол хлебти канчаарыл, ынчаш? Канчаар боор, акым сугга аппарып-ла бергей мен! Сонуургап чигейлерде!”

Ойлук чок бодалдары Байырны пекарня эжиндинде кылаштаарынче чайгаар-ла албадапканнар. Ынчалза-даа алыхсаан хлеви угбазының ажылдаан шалыңының орнунда чоруп турар дээрзин ооң чаш угааны кайын угаар ийик.

— Чүге чор сен? — деп, быжырыкчы кирип келген оолдан доңгун айтырган.

— Мен... мен... Билзек-кыс башкының дуңмазы-дыр мен. Угбам хлеб эккел деп айбылады.

— Билзек-кыс башкының? Ооң мындыг эрте халып турганын чоп билбес мен. Мегелеп тур эвес ыйнаан, оол? Кымның оглу ийик сен? — деп, бирээзи Байырже сезиктиг көрген.

— Мен бе? Мен... дуу ол... Дойнур ашактың оглу-дур мен.

Быжырыкчы орта-даа бузуревес мен дээнзиг, дам-на ылагылап сиңниккен.

— Аваң ады кым ийик?

— Өшкү-Саар.

— Бичии мана че, ындыг болза — дээш, быжырыкчы ындынче кылаштааш, бир кара хлебти Байырже сунуп, хыйланыксаан:

— Боду-даа келгеш, ап албас, бичии оол чорудуп чүзүл аан, оол башкының ужу-бажы билдинмес. А сен чоп бажың халайты бердиң, оол? Думааң тырт! Идииң бажында чедер чыгай берди ооң. Бужарын, артында көк.

Байыр салып чанып келгеш, кажарлап апкан хлевин орган ақызының мурнун орта барып сала каапкан.

— Ык, бо кандаай чүвенил, оол? Кайыын апканың ол? — деп, оозу белицнексеп айтырган.

— Башкым берди.

— Башкым? Чүү дээш? Шын чоор бе ол?

— Анаа берди. Айтрып-даа көр даан, акый — депкеш, Байырның арны изиш дээн.

Чартык хандырылга деп каан херээ-даа ол чүве ирги бе кылдыр бодааш, акызы оолдуң сөстеринге бүзүреп, эккелген хлебти уругларынга үлей кескилегилеп берген. Кожазы өгден кирип келген ирей база чиген. Чоруурда ол шын-на сеткили-били хөөрээн:

— Шымбай-ла чаагай чөмивис бо, уругларым. Бистиң адажурт дайын хоозуралындан уштурунуп, элээн хөнүй суг бээр болза, бо хлевивис моон-даа элбек, амданныг апаар, көөр-даа силер.

Дүүште Байыр өөренип чорупкан. Ынчалза-даа ол эртенги апкан хлевиниң ужунда элээн шуугаазын болуп турганын кайын билир ийик...

Билзек-кыс алыр ужурлуг хлевин бодап, хүндүс пекарняга чеде бээрге, быжырыкчы тургаш, “Бо эртен дуңмаңар оол ап алчык” диген. Бажыңымда тургузуп алган дуңмам бар эвес, еске кижи-дир деп ацаа удурланып эгелээн. Башкы ынчап баарга, быжырыкчы шынын бадыткап, оолдуң ада-иезиниң аттарын адаан. Ону дыңнааш, Билзек-кыстың дылы агарып калган.

Бо бүгүнү хажызынга турган суму даргазы Төмүр дыңнаан. Харысалга чок, күрүне өнчүзүн кижи болганга берип турар сен дээш, хөөкүй быжырыкчыны кончуп, сыйндырып медээжок болган.

Байыр чанып кээрge, акызы сугда арнын хөлчок таныры кижи олурган. Суму даргазы деп каразываан-даа. Акызынга кээр кижи таныры-таныvas улустар-ла хөй болгай. Ынчалза-даа демги кижи эжик аксында турган Байырже көрнүп келгеш, “Бээр келем” деп чанынче имнээн. Үнү үнер-үнмес “Мен бе?” дей каапкаш, Байыр ооң мурнунга базып келген.

— Өөреникчи кижи чурум үреп чүңүл, че? Артында-ла башкы угбаң адын тудуп хлеб бижидип. Ол дээш школадан үндүртүпсүңзэе канчаар сен? — деп, дарга чугаазының аянын шириинзидип айтырган.

Байырда ыыт чок. Хейде куруг черге думчуун тыртынарынга өйлөжи берген. Ынчалза-даа ол иштинде мынчаар бодап

турган: “Хлеб дээш школа чыскаалының мурнунче мени үндү рүп, албан тургузар. Бүдүн хлебти холумга тутсуп каар. Өөрүм оолдар ынчан мени кыжырып каттыржырлар. Ылангыя Кудус-оол суг!”

— Кым сеңээ ынчаар өөретти, даргага чугаалап бер оол, че. Оода-ла менәэ шынын чоп чугаалавадың? Ат болган кижи-дир сен.

— Кым... кым-даа эвес, мен бодум мегеледим. Моон соңгаар ынчанмас мен. Школадан мени үндүрбенер, мен өөреникsep тур мен — деп чоруй, Байыр ыглапкан.

— Бурууц миннип турар болгандыңда, эр хей-дир сен. Сени кымга-даа чугаалавас мен. Ынчалза-даа хлебти кажан-даа үй-балай төтчеглеп болбас. Бис ону чонга безин бербейн, эртем чедип алзын дээш, чугле силерге берип турар бис көр даан — деп, суму даргазы чугаалааш, оолдуң бажын суйбай туткан.

Карактарындан бадып турган борбак-борбак чаштарны Байыр холдары-бile дүргени кончуг чода тырткылапкаш, халайтып алгаш турган бажын көдүрүп келгеш, буруузунган шырайлыг Төмүр даргаже хүлүмзүрүй каапкан.

-
-  1. Чогаалда кол бодалды илереткен одуругларны тыпкаш, сайгарыңар.
 -  2. Байырны акызы чүге “...эртен албан-бile оттургаш, столоваяже халыдарын черле утпас” турганыл?
 -  3. Кижилерниң хлебке хамаарылгазын илереткен одуругларны тыпкаш, аянныг номчааш, утказын тайылбырлаңар.
 - 4. Хлебти халаска ап алыр деп бодал Байырга чүге кирип келгенил?
 - 5. Чогаалдың кайы одуруглары силерниң сагыш-сеткилиңерни хөлзедип дүвүретти?
 -  6. Чыккылама, сомалап туткан печка, дылы агарып калган деп сөстерниң утказын тайылбырлаңар.
 - 7. Суму даргазы Төмүр, Байырның болгаш ооң акызының аразында диалогту номчааш, “Мен Байыр болган болзумза...” деп темалыг кыска чогаадыгдан бижиңер.
 - 8. Чечен чугаа чүге “...бажын көдүрүп келгеш, буруузунган шырайлыг Төмүр даргаже хүлүмзүрүй каапкан” деп одуруг-

лар-бile төнгөн деп бодаар силер? Чогаалчы ооң-бile чүнү илереткенил?

9. Чечен чугаага пландан тургускаш, ооң допчу утказын чу-гаалаңар.

10. Чогаалдың кол утказынга хамаарыштыр үлегер домактардан тыпкаш, бижип алышар.

Шаңғыр-оол СУВАН

Кижи-бүрүс

(Тоожудан үзүндүлөр)

Максим хүнзедир хой кадаргаш, шуут-ла чалгаарап каан. Чааскаан ойнаар оюннарын дөгерезин ойнаан. Чааскаан чеже ойнаар боор, мәэстинц какпак хаяларының бирээзиниң баарынга олуруп алгаш, хүнчे көрүп-ле, көрүп-ле олурган. Кежээки хүн өкпең-кызыл агаар бөмбүүнгө дөмей болган. Ону холга тудуп ап болур ышкаш. Максим холдарын бурунгаар сунгаш, хүннүң адаанга дужааштыр адыштарын чада тудупкан. Ылап-ла! Хүн ооң адыштарында! Даглар баштарынга дәэстир хүннү холдары биле идиптерин оол күзээн. Ол болдуунмас деп билир-даа болза, оюнзурап хүннү даглар баштарынче чоокшулладыр “иткилээн”-даа. Хүннү дээрже бедидир үрүксээр-даа. Ол-ла сагыжы-бile оол хүннү холдарынга “тудуп”, олчे үрүп, адыштарынга борбактай “суйбап”, салааларын дураннай туткаш, ону өттүр хүннү топтап чоруй, ойнап эгелээн. Хүн-бile ойнаар оюннаар ала-чайгаар-ла удур-ла чогааттынып, оларга алаагып, кадарып чораан хой-өшкүзүн-даа, чаныксай бергенин-даа оол бичии када утту каапкан. Хүн-бile ойнап оргаш, канчангаш-ла көөрге, хой-өшкүзү көзүлбес болган. Оларның кайда оъттап чоруурун харап көөр дээш, оол мәэстинц бажынче маңнап үнүп-ле каан. Мээс бажындан харап көөрге, хой-өшкүзү база бир оорганы ажар чыгыы оъттап бар чорааннаар. Оларның бажын аалчे угландыр дозар дээш маңнап оргаш, канчангаш-ла көөрге, оорга кырында кижи турган — оъттап бар чыдар хой-өшкүзүнүң мырынай чоогунда.

Максим тура дүшкеш:

— Ээй! Ээй! Бетинде хой-өшкүнү-ү-үң бажы-ы-ын бээрлendir дозуптуңар-а-а-ам! — деп алгырган.

Ол кижи шимчеш-даа дивээн. “Мээн үнүмнү дыңнавааны ол-дур аа” деп бодааш:

— Хой-өшкүнү-ү-ү бээр дозуптуңар-а-ам! — деп база катап алгырып, холдарын чайгылаан.

Демги кижи турза-ла тураг болган. “Бо чоокта аалдарның кайы-бирээзиниң кым деп кадарчызы ирги?” деп бодааш, оол ону топтап көргеш, танываан. Чүгле ооң дашты дүктүг тон кедип алганын Максим эскерген. Ону-даа херекке албайн, “Эл-дептиин аа бо кижиниң, мындыг чылыгда тон кедип алган” деп бодап каан.

Максим ийи салаазын аксынче суккаш, хаяларга чаңгыландыр аажок дыңзыды сыгыра каапкан. Шимчеш дивейн турган кижи ийи холун атпаш кылгаш, херии-херии шуравышаан, оорга ындынче ажытталып чоруй барган. Дыңзыг сыгыттан ол кижи сырбаңрап, арай чаяңнады, чиктии сургей маңнаанын оол элдепсинип эскерзе-даа, хой-өшкүзүнүң бажын дозарынче далажып, ону шоолуг-ла херекке албаан. Катап-катап сыгырып, дайгырарга, хой-өшкүнүң баштыңы, узун мыйыстыг ак хуна, өөренген чаңы-бile аалче кирер кокпаларже углай оъттай бээр-те, кодан мал ооң соондан шуужа берген. Элээн тарамык оъттап чораан хой-өшкүнү бөле хай дээш, оларны аал чоогунга бичии кадарчы сүрүп әккелген...

(*Максим алга кээрге, хоорай чурттуг Долаана дээр дун-мазы чайгы дыштанилгазын чайлагга эрттирип чедип келир. Олар кады хой кадарып эгелээн.*)

...Кожагарны өруү кончуг оваарымчалыг дүрген чаштынып үнгеш, селбегер тоннуг кижиниң турган черинге чедип кээрге, ол кижи чок болган. Чүгле хаяларның бирээзиниң сүвүр бажында бир шымчым хире хүреңзимээр дүк ызыртынып чыдыш каан. Кожагарның арга чарыындан ис кезип көөрлерге, селбегер тоннуг демги кижи күдургайны куду терец оът-сиген кыры-бile чунгулап бады барган болган. Ооң изинде база-ла хү-

реңзимээр өңнүг дүк сывырлып чыдып каан. Алышкылар ону херекке-даа албааннар...

... Хаялар аразындан Максим бакылап көөргө, селбегер тоннуг оол дужунда мээсте хая кырында олурган. Ооң мында чедип келгенин оол билип орап ышкаш кылдыр Максимге сагындырган. Ынчангаштың боду база хая кырынга көзүлдүр олуруп алган. Селбегер тоннуг оол туруп келгеш, Максимниң уунче көрүп туур-туруп, даш алгаш, ону мээсти куду чууп бадырыпкан. Даши чууктап ойнаары оолдарның кайызынганаа солун болган. Ынчаар даш чууктап кезек ойнааш, Максим оолдуң турганы мээсче чорупкан. Мээс кырынга үнүп кээрge, тоннуг оол оон дескелеп, эләэн ырай берген турган...

— Чоп ырай бердин, аал? Бээр чедип кел даан! — деп, Максим кыйгырган.

Оол ыыттавайн, олче көрүп алгаш-ла турган.

— Аңаа тур. Таныжып алгаш, кады ойнаар бис — дээш, Максим улаштыр чоруптарга, оол мээсти өру дескелээр болган. Ынчалза-даа ооң ужуражыксап, кады ойнаксал туарын сагыш-сеткилиниң ындындан-на ала-чайгаар боду билип каанынга Максим элдепсинген. Өске кижииниң бодал-сагыжын бүдүү билип каар мен деп чувени ол ооң мурнунда эскербейн чораан. Оолдуң ооң-бile ойнаксаанын Максим ылап-ла тода билип турган.

Ынчангаш:

— Альттар киштежип таныжар, кижилер чугаалажып таныжар деп чуве билбес сен бе, аал? — деп, ол алгырып чугаалаан.

Ооң үнүнүң кандыг-ла-бир хөөнү оолдуң сеткилинге тааржы берген деп чувени Максим дораан-на билип, өру улам дүрген үнүп-ле каан. Илдиклес дээш баарында даштарны көрүп чораан болгаш, оолдуң чүгле мырыңай чоогунга келгеш, олче хенертен көрнү каапкаш, Максим серт-ле дээн — ооң мурнунда бүгү мага-боду дүктүг кижи дүрзүлүг амытан турган. Ынчалза-даа чүг-ле ийик, Максим улуг дыка кортпаан.

Боду бэзин билбейн:

— Дүктүг тоннуг деп бодааным, бодуң дүктүг амытан ышкаждыл сен — деп чугааланган.

Дүктүг амытан ооң чугаазының утказын билген, бодунуң дүк-түүндөн ыяткан-даа ышкаш, оолдуң арнынчे дорт көрүп чадап, даглар баштарынчे кайгагылаан. А бо кижи дүрзүлүг дүктүг амытанның көңгүс коргунчуг эвезин Максим билип, даш кырынга олура дүшкеш:

— Пу, кижи коргудар сен — диген.

Дүктүг амытан база “пу” дээн ышкаш болган соонда, даш кырынга олуруп алган. Ооң чугаазын, шимчээшкинин дүктүг амытанның өттүнгенин Максим эскерип, олче көрген — дүктүг дээрден башка, кижи ышкаш кылдыр көзүлген. “Хеп-хенертен кижи мону көрүп каар болза, угаан-кудун оскунуп, ол-ла черинге далып-ла каар-дыр” деп оол бодаан. Ооң бодалын билген-даа дег, кижи дүрзүлүг амытан оолдан ырадыр олуруп алган. “Кандыг-ла-бир арга-бile аравыста чугаалажып орап-даа ышкаш бис” деп бодай каапкаш, ооң-бile чөпшээрешкен бодалды ол-ла дораан Максим билип каан. А канчаар билип каанын оол тода билбейн, ацаа чүгле элдепсинген. “Бир эвес бо амытан кижи болган болза, Дүктүг-оол деп адап ап болурла-дыр” деп, оол бодай кааптары билек, дораан-на ооң-бile чөпшээрешкен уткалыг харыы келген. “Бо амытан мээн-бile бодал дамчыдып чугаалажып орап ышкаждыл” деп билип кааш, олче Максим көрүп кәэрge, демгизи ацаа чөпшээрежип бажын согаңнаткан. Ам оолга мырыңай солун апарган — кортканы тайлы хона берген. Ынчангаш дүктүг амытанның мага-бодун ол топтап көрген. Дурт-сыны Максимниң бодундан бедивес, хар-назының алыр болза, база-ла ооң үе-чергези хире, чүгле арнында дүк чок, ылап-ла кижи дүрзүлүг амытан болган. “Арын-нүүр чок кижилерни дүктүг арынныг дээр-ле болгай. А мооң дугайында ынчаар чугаалап болбас-ла-дыр, чүге дээргэ арны дүктүг эвес” деп, оол бодантарга, “Дүктүг-оол” база катап бажын согаңнаткан. Ооң бодалдарының утказын бо амытан кандыг-ла-бир арга-бile билип орарынга Максим ылап-ла бүзүррей берген...

...“Мооң-бile чугаалашкан санында-ла, кижи дүрзүлүг амытан деп-ле тураг эвес мен. Дүктүг-оол деп адап алыр-дыр”

деп бодап, Максим олче көрнүп кээрге, ооң арын-шырайының өөрүшкүлүү аажок болган. “Чүгө амырап орары ол мооң?” деп бодаптарга, “Дүктүг-оол деп аттыг болганым дээш” деп харыы билдинген.

— Чүгө ынчаар адап каанымны билир сен бе? — деп, оол чугаалаан.

— Сенден ылгалдыг, дүктүг боорумга — деп харыы билдинген.

— Мээн адымны Максим дээр — деп оол чугаалаан.

— Сен Максим, а мен Дүктүг-оол мен — деп, бирээзи харыылаан...

...Дүктүг-оол:

— Ам чаа-ла ужурашкан болгаш, сенээ кичээнгейим күштүг болганындан бодалдарыңы билип кааптар-дыр мен. Үргүлчү ужуражып турар болзувусса, сенээ кичээнгейим кошкай бергеш, менче дамчытпаан бодалдарыңы билбес апаар мен — диген...

...Кижи дүрзүлүг амытанның “Кортпа, Долаана. Сээн акың биле мен эжишкiler-дир бис” дээниин уруг чайгаар-ла билип каан.

Долаана даш артындан туруп келгеш, дүктүг амытаннын ам-на топтап көрүп, ону акызы Дүктүг-оол деп адап турганын сактып:

— Экии, Дүктүг-оол — деп мендилешкен.

Дүктүг-оол:

— Экии, Долаана — дээн. — Чиирге, дыка амданныг кат долаана-ла болгай.

— Мен кат эвс-тир мен — деп, Долаана сестип чугаалаан. — Мени кат ады-бile адап каан.

Дүктүг-оол:

— Мээн адым бодумга дөмей, а сээн адың катка дөмей — диген.

Долаана хүлүмзүрүй берген. Дүктүг-оолдуң ынча дээни чаптанчыы аажок болган...

...Кежээ аалга кижи-бүрүс дугайында чугаа болган.

— Кижи-бүрүс деп кым боор ындыг, угбай? — деп, Долаана сонуургаан.

— Тонунун дүгүн андара кедип алган кижины ынчаар адаар бе?

— Чок — деп, Максимниң авазы харылаан. — Тоол домакта кижи дүрзүлүг дириг амытанны ынча дээр чуве дижик. Чамдык кижилер кижи-бүрүске душкан-даа боор. Шагда бичии уруглар, оолдар кежээ караңгылааже чедир ойнаарывыска, “Орай дүнеге чедир даштыгаа чорбацар, силерни кижи-бүрүс алгаш баар” деп, улуг улус коргудар боор чуве.

— Кижи-бүрүс амытан бар дээрзин телевизорга көргүзүп тураг чоржуктар — деп, кажаа аксын хаап тура, ачазы чугаага киришкен. Орустап “хар кижи” дээр кижи-бүрүс ол-ла ыйнаан. Телевизорга көөрүмгэ, кижи дүрзүлүг дүктүг амытан-на чорду.

Максим биле Долаана удур-дедир көрүшкеннер — кымны кижи-бүрүс дээрзин кайызы-даа биле тыртып кааннар...

...Чаяңнадыр маңнагылаар кижиның чамдык хүннерде Максим алышкылар-биле хой-өшкү кадарып, кады ойнап хүнзээрин кожазы малчынның оглу Даши-оол ырактан хайгаарал көрүп турган. Ынчан ол “Шугдур деп хойжу ашактың угааны багай оглу ыйнаан” деп бодап каан. Ынчалза-даа оларның чоогунга хоюн кадарып чеде бээргэ, ол оолдуң көзүлбейн баарын Даши-оол эскерген.

(*Максим биле Долааның кижи-бүрүстү Даши-оолдан чажырып турагы аңаа хомууданчыг болган. Даши-оол каттап чораан уругларны дүктүг тон кедип алгаш, кижи-бүрүс бо черде бар деп бодалды тарадыпкан. Оон соонда чайлагга кижи-бүрүс дүгайында чугаа дыргын болуп, ону көрген кижилер көвүдээн.*)

...Бир хүн Максим биле Долаана алышкыларга Чойганмаа ноутбуку тудуп алган чедип келген.

— Силерге солун чүве көргүзейн — дээш, ноутбугун ажылдаткаш, интернетте сайттарның бирээзин ажыткаш:

— Номчуп көрүңер даан — диген.

Максим номчуп көөргэ, Қадыр-Үзүк чайлагда кижи-бүрүс деп амытан тыптып келгенин, ону көрген-билген кижилерниң

ат-сывындан бээр бижип каан болган. Оларның аразында Максимниң, Долаананың, Даши-оолдуң дээш чайлагда аалдарда оолдар, уругларның чамдызызының аттары база бар...

...Чойганмаа:

- Даши-оолдуң компьютери бар бе? Интернетте коштунганде? — диген.
- Даши-оолдуң бодундан айтырза... — деп, Долаана саналдаан.

Максим кезек боданып тура:

— Мен барып айтырайн — деп чугаалаан...

...Даш-оол Максимниң айтырыынга:

— Менде ноутбук чок. Бүзүревес болзуңза, өг иштин үжепчиндип-даа болур сен. Чойганмаадан дорайтаан эвес, ада-иемге ноутбук саттырып алыр чүве бе харын... — деп чивиини аажок харылаан.

Чойганмааның тып эккелгени сайт дугайында меңээ чугаалааның кончуг таптыг болду. Ноутбук саттырып, аңаа интернет кииртип, электроннуг почта ажыдып алгаш, кижи-бүрүстүү сонуургаан кижилер-бile харылзажыр мен.

— Кижи-бүрүс деп-ле чүү ындыг чүве тып алган кижи сен — деп, Максим баажыланып чугаалаан.

— Билбээчеңнеп турба — деп, Даши-оол кылыштаны берген.
— Кижи-бүрүс-бile кады ойнап туруңарда, каш-даа катап дураннап көрдүм. А силер ону менден чажырар-дыр силер.

Кижи-бүрүстүү Даши-оолга хөңнү чогун сактып келгеш, Максим чүгө-ле ийик:

- Карап көрнүр апарган эвес сен бе — дей кааптарга:
- Ындыг де! — деп, Даши-оол алгыра каапкаш, өжешкени ылап-ла илдең. — Кижи-бүрүстүү ылап-ла көрген мен деп улус мурнунга ыяап-ла бадыткаар мен. Ноутбук, интернет, электроннуг почта дугайында сагындырыпканыңа дээш четтиридим — дигениндөн ол ийиниң аразында эп-чөп деп чүве ам шуут ис чок читкенин Максим эскерип каан.

Максим биле Даши-оолдуң аразында чугаа соонда каш-даа хонмаанда, интернетте сайттарга Кадыр-Үзүк чайлагда тыптып

келген кижи-бүрүс деп амытанның, ону көрген кижилерниң дугайында медәэлер удаа-дараа көстүп эгеләэн...

...Бир-ле хүн суму чагырыкчызы машиналыг кижилер эдер-тип алган халдып келгеш, Кадыр-Үзүктө аалдар иштин чайлагның ортаазында турар Хойтпак-оол ашак сугнуң аалынга чыгаш:

— Компьютерлер-бile харылзажыр интернет деп чүведе... — деп чугаалап эгеләэн.

Оолдар, уруглар чир шоң дүжүп каттыржы бергеннер.

Уругларның бирээзи:

— Интернет! — деп дарганың частырыын эде тыртып каан.

— Ийе, ийе. Интернет... — деп, чагырыкчы уламчылаан.

— Кадыр-Үзүк чайлааның интернатчылары кончуг алдар-жаан улус бооп-тур силер...

Уруглар, оолдар база катап каттыржып үнгеннер. Демги-ле уруг база катап:

— Интернетчилер! — диген...

— ...Силерниң чайлаацардан ынаар кижи-бүрүс дугайында хөй медә кирип турар. А болар... — дээш, келген кижилерже бажы-бile айыткан. — Оран-делегейде әлдеп-әзин чүүлдер шинчиләэр эртемденнер-дир.

Оларның бирээзи туруп келгеш, бо чайлагга хар кишини, биригээр чугаалаарга, кижи-бүрүстү көрген кижилерниң интернетче киирген медәэлерин номчааш, ону ылавылап келгеннерин дыңнаткан...

(Максим Дүктуг-оолду тайгаже чорудар деп шиитпирлээр.)

...Дүктуг-оол чарлып тура:

— Бо чарааш чайлагны кожагар кырындан база катап көрүп алыйн. Оон чоруптайн. Мээн караам огу четпес черде чувени көрүп кааш, кайы ырактан бодалды дамчыдыптар кижилерден корга бердим. Кайынын келгенимниң уу, кайнаар баарым меңээ билдинип тур — дээш, Бедик-Кожагарны өрү базып үнүп каан.

Ол хая безин көрүнмээн. Ынчалза-даа кижи-бүрүске кайы хире муңгаранчыын Максим бүгү-ле сагыш-сеткилиндөн билип турган.

Долаана хой-өшкүнүң бажын аалче углай оожум дозуп бар чораан...

Дүңмазынга база дыка кударанчыг дээрзи Максимге билдине берген. Ол үштүң сагыш-бодалы ол өйде тудуш-ла турган боор. Кижи-бүрүске... кижи бүрүзүнге муңгаранчыг...

Орай кежээ аалга Чойганмаа аyttыг халдып келген. Оон анаа эвес келгенин Максим эндевейн, уруг баглаашка аъдын баглап турда, уткуй барган.

Чойганмаа дораан-на:

— Кижи-бүрүстү көрдүм — диген.

Оон караанга Дүктүг-оолдуң көзүлгенингэ бүзүревейн:

— Каая? — деп, оол кайгап каан.

— Эртемденнер турлаанга — деп, уруг чугаалаан...

...Оларның чанынга Долаана чедип кээрге, чүү болганын Максим ацаа чугаалап берген.

— Дашиболга Дүктүг-оол анаа эвес хөңнү чок болган-дыр — дигеш, Долаананың карактарынга чаштар кылацайнып кээп, айтырган.

— Канчап тудуп алган-дыр?

— Кижи-бүрүс-бile сiler ужуражып турундарда, эртемденнерге Дашибол көргүзүп берген-дир. Оон-на кижи-бүрүстен шинчилекчилер карак салбаан. Жайы ырактан кедеп чорааннар — деп, Чойганмаа харыылаан. — Мининместедир октүг, дуранныг боодан кижи-бүрүстү дыка ырактан адыпканнар-дыр. Кижи-бүрүс мининместеп чыдырда, демир кажаага аппарып суп алган.

Орлан чаңы-бile Долаана:

— Дүктүг-оолду дораан хостап алыр-дыр — диген.

Акызы хаваан дүйген:

— Канчаар? Демир кажаа иштинде кижини... кижи-бүрүстү...

Үжелээ кезек када ыыт чок барганин.

— Ачаңга чугаала, Максим — деп, Чойганмаа сүмелээн.

— Сээн ачаң дыка эки ийик чоп.

Оларга дуза херегин билген-даа дег, ачазы өгден үнүп келгеш:

— Чойганмаа бо хире орайда халдып кээп, чүнү хөөрежип, хүлүрткейнип турарыңар ол? — деп дүште-даа чок чугаалаан...

...Шинчилекчи эртемденнерниң турлааның чоогунга олар дуюкаа чедип кээрге, демгилери одагга чем хайындырып турганнар. Одаг чоогунда шаараш демир иштинде кижи-бүрүс дүрүжүп алган чыткан.

— Ачай, кажаа чанынга чеде бергеш, Дүктүг-оол-бите бодалдажыптайн — деп, Максим сымыранып чугаалаан.

Ачазы:

— Ынчал че — дээн. — Чүгле оваарымчалыг.

Максимниң чоокшулат келгенин кижи-бүрүс билип кааш, өндейип кээп, ооң уунче көргүлээн.

— Шимээргеве, шимээргеве, Дүктүг-оол. Одагда улус билип каар — деп, Максим ону оожуктурган.

— Олуруп ал. Шимчеве!

Кижи-бүрүс ооң аайындан эртпээн.

Оол:

— Сени демир кажаадан үндүрүп, хостап алыр бис — дээрge:

— Кажан? — деп, кижи-бүрүс айтырган.

— Бо кежээ азы дүне. Чүгле дүвүрөве, одагда кижилер сезик аптар.

Кижи-бүрүс:

— Чaa — диген.

— Мана, Дүктүг-оол. Сени ыяап-ла хостап алыр бис. Ачам дузалаар.

Кижи-бүрүс:

— Ачаңны көрген мен — диген.

Максим:

— Биске бүзүрээр сен бе, Дүктүг-оол? — деп айтырага:

Кижи-бүрүс:

— Ийе — диген.

— Ынчаарга чыдып ал. Дааш-шимээн үндүрбө — деп, оол чагыырга, кижи-бүрүс дүрүжүп чыдып алган.

Оглу дедир чедип кээрге:

— Одаг чырынынга бараанын көөрүмгө, кижи-бүрүс амытан бичии дүктүг оол дег ышкаждыл, силерниң үе-чергенер — деп, ачазы кәэргеп чугаалаан. — Ону дүрген хостааш, тайгатаңдызынынче салыптар-дыр. Аңаа хостуг-шөләэн чурттап чорзун.

Максим:

— “Сени хостап алыр бис. Ачам биске дузалаар” дәэримге, Дүктүг-оол “Ачаңың көрген мен” диidi — дәэн.

— Кай, кижи-бүрүс мени көрген, мени билир де! — деп, ачазы мырыңай кайгап каан.

— Ылап-ла, ачай!

— Бо кижи ожаавас, тоол домак болуушкуннар оран-дегейде бооп тураг чүве-дир аа — деп, ачазы кайгап-хараан...

Шинчилекчилерниң одаандан ырап келгеш, кезек шеттер чанынга Максимниң ачазы тура дүшкен.

Уруглар ону долганды хонуп кәэрge:

— Че, демги бичии кижи-бүрүстү кандыг арга-бile тайгатаңдызынынче хостап чорудар бис? — деп, ол айтырган.

Үш эжишкiler удур-дедир көрүшкөннөр...

...Максимниң ачазы:

— Чок! Тоннарның дүгүн дашкаар кылдыр андара кеткеш, одагда эртемденнерни хенертен бүзәэләэш, ок чок дүүргебиле оларны коргудупкаш, шоочаның дүлгүүрүн ап алгаш, демир кажааны ажыдыпкаш, кижи-бүрүс оолчугашты хостап чорудуптар бис — дәэрge, уруглар чөпшәэрешкөннөр.

Кижи-бүрүстү шак-ла ынчаар хостап алыр дәэш, олар одагга чоокшулат келгенде, Дүктүг-оолдуң “Менә дүрген ужураш” дәэн бодалы Максимге билдине берген.

Ачазы биле уругларны манадып кааш, демир кажаа чанынга оол чедип келирге, Дүктүг-оол:

— Одагда кижилерни коргутпацар — дәэн. — Мени хостап алыр дәэн силерниң күзелиңер күжү-бile бо кажаадан уне берип болур-дур мен.

— Канчаар? — деп, оол ооң бодалының утказын тода билбәэн.

— Силерниң шуптуңарның күзелдериңерниң демниг күжү херек.

— Күзелдеривисти канчаар демнештириптер бис?

Дүктүг-оол:

— Мээн chioогумга шупту чедип келгеш, мени бо демир кажаадан үне берзин деп бүгү-ле сагыш-сеткилиңер-бile чаңгыс демниг күзептиңер. Силерниң күзелиңерниң күжүнге бодумнуң күжүн демнештирипкеш, ылап-ла үне бәэр мен — диген.

— Билдине берди. Ачам сугларны бәэр эккәэйн — дәэш, Максим чорупкан.

Кижи-бүрүстү суп каан демир кажааның чанынга кончуг оожум чоокшулат келгеш, шупту аңгадап кааннар. Дүктүг-оол кажааның шаарап демирлериниң аразы-бile оларже уткуштур үнүп келген. А одаг чанында эртемденнер ону-даа эскербейн, дүште чок олурганнар...

...Эртемденнер эртен эрте оттуп келгеш, дүүн тудуп алган кижи-бүрүстү барып көөрге, кажаа куруг, ында чүгле кинчилер чыткан. Кижи-бүрүстү бектеп каан демир кинчилер-даа, ону суп каан демир кажаа-даа, ооң шоочазы-даа бүдүн болган. Кажааны долгандыр кылаштап көөрге, ис-даш-даа чок...

(*Эртенинде Долаана интернетте Тываның Кадыр-Үзүктө эртемденнер хар кижи тудуп алган. Шаараش кажаа иштинде кижи-бүрүстүң чуруу бар болган.*)

...Уруглар баглаашка турган аътка дүрген-не ушкаждыпкаш, эртемденнер турлаанче халдып ыңай-ла болганнар.

Эртемденнер турлаанга алышкылар кәэрge, ында кижи дәэрge кара шаар болган. Кижи-бүрүс деп амытан туттурганын интернеттен билип алган, ону дыңнаан, кижи-бүрүстү көрүк-сәэн кижилер чайлагның ол-бо аалдарындан чыглып келгеш:

— Кижи-бүрүс кайыл? Биске көргүзүңер...

— Кайда чажырып алдыңар?..

— Кижи-бүрүс тудуп алдывыс деп интернетке мегелеп кааныңар ол бе? — деп эртемденнерни үглеп турганнар.

Демгилери кижи-бүрүстү тудуп алыр харыы чок болганындан ыядып, боттарының эртемден адын камгалаар дәэш:

— Бис ону тудуп алыр хамаанчок, безин көрбедивис. Хар кижи дугайында дамчыыр чугаа хоозун чүве-дир. Силерниң

чайлаацарда кандыг-даа хар кижи чок — деп, херек кырында чүү болганын, чажырып турганныар.

— Меге медээни интернетке та кым тарадыпкан...

Дүүн кежээ кижи-бүрүстү шаарашиб демир кажаага суп алгаш, фотоаппарат-билие тырттырып, ооң чуруун интернетке кирип турган эртемденнерниц ындыг харызын дыңнааш, Даши-оол шуут-ла алаң кайгап каан.

Максим биле Долаана алышкылар дегийт-ле демир кажааны барып көөргө, ол куруг болган. Кайызы-даа амырай бергеннер. Кижи-бүрүс Дүктүг-оол ам оран-тандызында!

Дараазында чайгы дыштанылгада Долаана, Максим алышкылар кижи-бүрүс-билие кады хой-өшкү кадарып, ойнап чоруулун Даши-оол ырактан көргеш, кымга-даа ыттаваан.



1. Чогаалчы тоожунуң эгезин чүге Максимниң хүн-билие ойнаарындан эгелээн деп бодаар силер?

2. Тоожуну утказының аайы-билие кезектерге чаргаш, циталыг пландан тургускаш, аттардан чогаадыңар.

3. Кижи-бүрүс деп чүл? Ооң дугайында чүнү билип алдыңар?

4. Эртемденнерниц Кадыр-Үзүкке келгениниң чылдагааны болгаш ооң түңнели кандыг болган.

5. Кижи-бүрүстүң чоруксавайн турарының чылдагааны чүдэл?

6. Чогаалга Даши-оолдуң овур-хевирин чүге киирген деп бодаар силер? Бир эвес ону киирбээн болза, чогаал кандыг уткалтыг болурул?

7. Чогаалдың кол маадыры кым деп бодаар силер, бодалыңар бадыткаңар.

8. “Мен кижи-бүрүске ужурашкан болзумза, мынча дээр ийик мен...” деп темалыг кыска чогаадыгдан бижинер.

9. Тоожуда фантастиктиг болгаш боттуг, шынныг чүүлдерни аңгылааш, тайылбырлаңар.

10. Долаананың овур-хевири кайы үзүндүде тодазы-билие көстүп турар деп бодаар силер?

11. Тоожунуң кайы маадыры силерниц сеткилиңерге таарышты, чүгө?



12. Тоожуга хамаарыштыр викторина айтырыгларын тургузар.



13. Эртем-фантастика темазынга бижиттинген кандыг чоғаалдарны номчаан силер? Қайы-бирээзиниң қыска утказын бижицер.

14. Бир эвес силер чурукчу, қаастакчы болзуңарза, бо тоожуну канчаар чуруп қаастаар силер?

15. Боттарыңарның сеткилиңерге таарышкан, сонуургаан үзүндүлерге чуруктан чурааш, ону камгалап тайылбырлаңар.

IV кезээ. ЫТ — ШЫНЧЫ ӨҢДҮК

Хөвөңмей ОЙДАН-ООЛ

Эзир

Бирги эгө

Частың башкы айының сөөлгү хүннери турган. Хүн-даа бедээн. Алаак-шынааларның, хову-шөлдерниң хары чарбы-дыңап эрип эгелээн. Дүүш үези чоокшулап, хүн караа чылып келирге, ой-чиктен дамырак сарыг суглар шулурткайнып чаржып-ла баткылаар. Хүн келген тудум-на улам чылып орган. Омак-хөглүг-ле апарган. Қыштың ажыңнадыр хаарып келир соок чывары, көжегелей дуй тудуп келир шаң-туманы ам кайда боор. Долгандыр бүгү-ле чүвени көөргө, артында хостуг-шөлээн ышкаш көзүлгүлээр.

Чараш частың келгенинге уруг-дарыг-даа, улуг улус-даа, дириг амытаннар-даа, долгандыр туруп турар үнүш-бойдус-даа өөрүп тураг.

Кадыр хаваанда ханы-ханы сыгыгларлыг, уян-чымчак болгаш хүргүл сыгыр карактарлыг, узунзу маар дурт-сынныг, калбак хөректиг, үстүү эрнинде кирбей кара салдыг, бежен хар чаала ажа дүжүп чоруур хире хар-назылыг кижи чоон доорбаштар чара шаап турган.

Ол доорбаштарны печкага оттууларынга өйлей үзе хирээ-легилеп каан.

Моң кара балдылыг ол кижи балдызын көдүрүп, херлип үнгеш, куду алзы карбаш дээн соонда, чоон токкулчак ийи чара тавыланып чаштай бээр. Ол могап-шылаар-даа ужур чок. Харын-даа эъди изип, дам-на бар чыткан.

Чанында чарган ыяжы кизирээртири овааланып үнүп чыткан.

Кыжын тергезин, чайын шанаан септээр. Ажыл-ишчи чүвөнниң келир кыжын оттуулар ыяжын баш бурунгаар белеткеп ап туары ол.

Оон ыңай чай база чок. Аңныыр инспектору кижи аалга канчап олуарыл. Ону мөөрүк-мөөрүк тайга-сыннаар, хөлбөгер ногаан эзимнер, хайнүп-мөөреп чыдар шапкын хемнер, хырыгыштар шыва үнген тулаа, хөлдер манап туар. Арга-арыгның даа, аң-меңниң даа камгалакчызы ол.

«Час-бile кады чазый-чилби төтчеглекчилер дойлуп үнер болдур эвеспе. Арын-нүүр чок ол чазыйлар караанга-ла көзүлгөн дириг амытан бүрүзүн адып алтырын бодаарлар. Оларның өзөртөрүүру-даа сагышка кирбес. Чүгле боостаазынче сыйрыштар болза ол-ла. Мен оларны ынчаар амдажытпас болдур мен ийин. Оран-делегейниң аны, күжү-даа болза, чонувустуң байлаа-дыр...”

...Ол шак ынчаар боданып олурда, ооң чанын орта чиик машина кээп тура дүшкен. «Бо-даа районнуң аңныыр чериниң улустары болгай aan» деп, ол боданган. Олурган доорбажындан тура халып келгеш, сонуургап көрүп турган.

Сүлде-ле бо! Кижин үйгүн кайгап-ла калган. Машинадан кижи үнүп келзе-ле, кончуг өндүү Матвей болган. Ооң семис, улуг-чаагайы-даа кончуг.

Ол өндүүнче уткуштур базыпкан. Ийи, кончуг адиг-хайыракан дег, кижи хол тутчуп мендилешкен-даа чүве чок. Ийи бодун куспактажыпкаш, ошкаждып, чыттажып эгелээн. Чүгле ооң соонда хол тутчуп, мендилешкеннер. Оларның чанынга халып келген Байлаң-оол болгаш ооң өөрү бичии оолдар кайгап-ла ханмааннар. Чүгле каттыржырынга өйлешкеннер. Орус, тыва ийи ашактың ынчаар ошкаждып, куспактажып турганын кажан-даа көрбээннер. Ам-на ийи кижиниң аразында чугаа эгелээн...

...Узун коңзагар хаайлыг, кызыл арынныг орус кижиңинң тывалаарын бичии оолдар кайгап шаанга кирген. Оларның карактары чүгле ында.

— Че, Михаил Иванович! Бажыңче кирер-ле болгай.

Ак аңчы биле Матвей аյжын-чемин ижип, аяк шайын аартап, хөлчөк-ла хөөрөшкөннөр. Олар барык бир чыл иштинде көрүшпээннөр. Матвей Каа-Хемде чурттап туар. Адар-оол – Чыргакыда. Чер аразы ырак. Ажыл-агыйлыг улус чай-шөлээн чок болур.

Ак аңчының шын ады Адар-оол чүве-дир. Ургулчү-ле аңмечни кадагалап, төтчеглекчилерден камгалап чоруур кижи боорга, ону чаңгыс чер-чурттуглары ынчаар шолалап алган. Құзұн дииңнеп, алды-киш аңнап турда, шынап-ла, аңаа чедер кижи чок.

Матвей әжиниң арнынчे хұлұмзұруп көрүп оргаш, оожум чугаалаан:

— Сенәэ тулған белекти эккелдим, тала. Эрткен чылын чагаа бижән ийик сен чоп. Утпадың ыйнаан?

Матвей дашкаар үнүпкен. Дедир кирип келзе-ле, бичии ыт оғлу тудуп алғаш кирип келген.

«Ол чұнұ чагаан кижи боор мен» деп, аайын тыппайн орган Ак аңчы алғырып үнген:

— Ха-а! Хөөкүй әжимни, Михаил Ивановичини! Құжұр Матвейни, эресчувени!..

— Мен сенәэ ыяап-ла тыпкаш, чедирер мен деп харыылаан ийик мен. Ам бо-дур.

Кедергей-даа чарап, чаптанчыг ыт оғлу. Бөрү дег көк, кулактары сұвүр-сұвүр. Ам ол мырыңай ырбыска чаш. Карактары чаа-ла ажыттынган. Чүгле сыйлаарынга өй.

— Улуу-бile четтиридим, Михаил Иванович! Ыт дәэрge кижиңинң бир дугаар шынчы өңнүү-дүр.

— Моң иези кончуг аңчы ыт. Ол улуг-чаагай-даа. Оон чүгүрүүн шуут кижи кайгаар. Мону чүгле эки өөредип алыр херек. Чиг этт чиртип болбас. Оон башка чазыйлай бәэр...

— Моң ады бар бе, Михаил Иванович?

— Чок, Адар-оол Саадакович. Ону Эзир деп адап алышар. Чараш ат-тыр.

«Эзир, Эзир» дишкеш, ийи өңүк хөлчөк-ла каттырышканнар.

Ийиги эгэ

Байлан-оол чайны өттүр Эзирни өөредип келген. Оон бажыңында ытты канчап чугаа билир кылдыр өөредириинىң дугайында улуг-биче номнар эндерилиген. Оон кадында Байлан-оолдуң ачазы база арга-сүмени айтып берип турган. Чамдык хүннерде ол боду эникти өөреткеш туруптар.

Эзир, шынап-ла, угааныыг эник болган. Ону «Чыт!» дээрge, чыдып алыр. Кандыг-бир чүвени ырадыр октапкаш, «Экkel! Тып!» дээрge, халып чоруткаш, ону ээзинге эккеп бээр.

Бир-ле хүн Байлан-оол Эзирни чедип алгаш алаак кирген. База-ла ону өөредири ол.

Олар Чыргакы хемниң эриинге келгеннер. Ийи-уш хонукта ак чаястап турган болгаш, хемниң суу боралгак өңүг, улгадып чыдар. Ынчалза-даа ол коргунчуг эвес. Оон саарыглап чыдар чери-бile кижи сүзүп кеже берип болур.

Эзир моон мурнунда ол хире хемни көрүп-даа көрбээн. Ол бир кезек ыңдай-бээр шыптыраңнадыр көргүлээн. Ында коргар хевир черле чок. Харын-даа хемниң ол чарында сайды өрүкүду чемнеп халып турган сайлыкче кайгагылаар...

...Байлан-оол калбак даш кырынга баскаш, тая берген. Сүгже шупту боду кирген. Оон кепка бөргү шагда-ла уштунуп чаштаан. Чалгыглар ону салдадып алгаш бадыпкан. Оол дүрген-не эрикче үнерин бодаан. «Бөрт кай баарыл, адаккы саарыгдан барып дозуп-ла алгай мен» деп бодал оон сагыжынга кирген. Ынчангаш эрикче дүрген-не далажыпкан.

Ол эриккө үнүп келирге, Эзир чок болган. Куду алзы көрген. Эник эрик кырын куду дуу-ла ыдып бар чыткан. Ээзиниң сүгга кирген бөргүн оон сүрүп бар чытканы ол...

«Үйдым сүгга дүжүп өлүүрү ол-дур» деп, оол сести берген. Эник ээрэмден шымнып үнүп келгеш, бажын силгилени

каапкаш, шокар кепканы сургеш чыдыпкан. Ол аразы үр-даа болбаан. Ону ызырты барып четкеш, дедир эштип үнүп келген.

Эзир эрикке кәэп силгилени каапкаш, ээзинин бөргүн ооңчанынга эккеп салып каан.

— Хөөкүй Эзиirimни, эрес ыдымны! — деп, оол эниин чассы-дып, ооң бажын сүйбап, хөлчок болган...

...Ийи өңнүк хүнгө дөгеленип чыдыпкан.



1. Чогаалды чүге “Эзир” деп адап кааныл?

2. Доорбаштар чара шаап турган маадыр кымыл, ооң овурхевири, аажы-чаңы кандыгыл, чогаал сөзүглели-бile бадыткап харылацаар.

3. Часкы бойдус чурумалын аянныг номчуңар, ук үзүндүге немей боттарыңарның бойдуска хамаарышкан эскериглерицерни бижиңер.

4. Матвей деп кымыл? “Эр кижи эткен сөзүнгө ээ болур” дээрзин чогаалдың утказын барымдаалап шынзыдыңар.

5. Бирги эгениң планын тургузуңар.

6. Бирги эгениң баштайгы абазында үзүндүнүң дылының уран-чеченин сайгарыңар.

7. “Бир-ле катап Чыргакы хем эриинге” деп аас-бile эдертиг-чугаадан кылыңар.

8. Орус-тыва иийи эжишкиниң найыралын көргүсken одуругларны бижип алыңар. Найырал дугайында үлегер домактан тып бижиңер.

9. “Кыжын тергезин, чайын шанаан септээр” деп үлегер домактың утказын тайылбырлап бижип алыңар.

10. Ак аңчының портредин чуурур.

11. Ыттар дугайында кандыг чогаалдар, кинолар билир сiler?



Үшкүз эгө

Чай-даа келген. Арга-арыг-даа хөлбегер ногаан. Алаак-шынаа-даа өң-баазын чечек-чимистер-бile каастанган. Кижи оларны кайгап, чарашсынып-ла ханмас.

Чай-бile кады Ак аңчы аалынга-даа орбастаан. Тайгасыннаар, алаак-шынаалар кезип чоруп берген. Ол үеде хамык аң-

мен, улуг-биче күштэр төрүп, хензиг бичи оолдарын доруктур азырап туар.

Инспектор кижи ынчан оларны араатан аңнардан, ылаңгыя, «ийи буттуг коккаарактардан» — кээргээр сеткил чок төтчеглекчилерден камгалаар ужурлуг.

Ак аңчы бо удаада Узун-Арга бажында шарланнарлыг өзөнгө кылаштап чораан. Үргүлчү-ле чингистиг, малгаштыг өзөн иштин ол-бо кеже халыгылап, аң болгаш кижи истерин кескилээн. Ооң аңчы дуржулгазы улуг. Сыыннар, мыйгактар аңаа кажан чораанын база эндевээн, оон бээр үш хире хонук эртпээн. Аңаа мырыңдай дүүн чаа ийи элик халчып чораан.

Аңнар чүге өзөн иштинче кирип турганнарыл? Ол база-ла билдингир. Элээн каш хонуктарда чада чагбаан, ынчангаш өзөн иштиниң суун ижип алгаш чоруп туар.

Ак аңчы өзөнниң ортаа үезинге келгеш, мал изи көрүп каан. Ол аңаа чораандан бээр он шаа хона берген хире. Их элээн эргижирей берген. Альттың изи өзөн иштиниң оруу-билие өрү чоктаваан. Сезиктиг чүве ол. Даңгаар-ла шыргай ишти кирип, аңнар кокпазынга кирип каап чораан. «Бо-даа ылап төтчеглекчи-дир — деп, Ак аңчы сестрип каан. — Чазый кулугур өзөнч кирип туар аң кокпаларынга дузак салып туар-дыр. Черле мээн холумга киргей сен аан!...».

Ак аңчы өртегде альдын муна каапкан. Ол альт изин истеп, шыргай эзим иштинче хүнзедир чортуп келген. Хоочун аңчы чувениң хөлүн кайын чазар ийик. Төтчеглекчиниң элик кокпазынга салган беш сывырындак дузаан тыпкан. Ооң хыы ханып чораан. Ынчалза-даа өөрүүрү элек. Даг көрбейн эдээн азынмас. Ол кончуг «ийи буттуг коккаарак» ам та чеже хире дузакты салган.

Ол ам кадыг-каралар аразынга чортуп келген. Төтчеглекчи альдын аңаа бир шарлан доорзунга баглап каан. Альт аңаа үр турган. Холу-били черни касканнап каапкан. Шарланниң чөвүрээзин хемирип чип шаанга кирген.

Ак аңчы альдын баглап кааш, база-ла чадаг халаан. Ол-бо кертилектерже ашкан аң кокпаларын кескилээн. База-ла

куруг үнмээн. Үш дузакты сөп алган. Адак соонда эң үстүкү баалыктың кертилээнге барган...

...Ак аңчы караанга шуут бүзүревээн. Ооң кылаштап орган кокпазының ужуунда бир элик тепкиленип чыткан. Ол аңаа дүрген-не халып четкен. Эликтин чүгле ийи караа дозураңнаар. Хөөкүйнүң кээргенчин канчаар! Ол дузакка бо эртен кирген хевирлиг. Үш каът кылдыр катай өрээн сывырындак дузак эликтин хөрээ-бile холун шавылдыр кире берген. Девидээн аң аай-баш чок чүткээш-даа, адырлып чадашкан. Дузакты будунга база ораай шурап алган. Ынчангаш ойта кээп дүшкен. Хөөкүйнүң чүгле быкты догдаңнаар. Дузак ооң мойнунче кирген болза, ол ам чок. Хейде-ле девидеп шурааш, моңнуп каар турган.

Ак аңчы ону дүрген-не адырып эгелээн. Элик, сугда ыяш дег, сиринейнип чыткан. Чизиредир тепкиленип, тура халырын-даа оралдашкан.

— Кончуг маңгысты!.. — деп, ол иштинде чугааланган.

«Оран-делегейниң аңын мынчаар канчап хилинчектеп өлүрер боор. Сен кончуг төтчеглекчиниң аяаң черле доллар. Мээн холумга кирер хүнүң турар» деп бодангылаан.

Элик амы-тынын үзүлгүже чедир тепкиленип чыткан. Ол хензиг-ле ковайып турар болза, карак-кулак чок шураарынга белен. Харын-даа кижиже удур шоглаза-даа хөңнү.

Элик тепкиленирге, ооң эмиинден хоюг ак сүт төктүп чыткан.

— Хөөкүйнү көрөм, бичии эзирии иезин манап, аштап чыдыр болгай аан!..

Ак аңчы эликтин ийи холун, ийи будун чиңге баг-бile бөле хүлүп алган. Чүгле ооң соонда демир дузакты адырып чешкен. Адак соонда хулүг чиңге бааның белен ужун чеже шелипкен.

Элик тура халып келген. Ол дезер-даа харык чок. Баштай хөкпее берген, амы-тынының алыкчызынчे узе кайгап турган. Ооң соонда дужунда чаш шеттер аразынчे кылаштапкан. Шеттер иштинчे ажытталып кирип бар чыда, тура дүшкеш, сөөлгү катап хая көрүнген.

— Халы-халы, элик! Оран-таңдың оъдун оъттап, кылаң кара сууң ижип чор! — деп, Ақ аңчы алгырган. Ооң алгызы әзим-арганы бир кылдыр чаңгыланып чоруй барган.

Дөрткүй эгө

Үш хондур чагган. Хензиг-даа үзүктелбээн. Дүнэ-даа саарып-ла турган, хүндүс-даа саарып-ла турган. Чүгле дөрткүй хүннүң даң бажында аясан. Хемнер унундан, алаак-шынаалар кырындан көдүрлүп үнген көгжегер көк туманнар бедик-бедик даглар баштарынче союп үнүп тургулаан.

Долгандыр туар бүгү-ле чүве чаъс суунга арыг тас кылдыр чунуп каапкан. Үнүш-бойдусту көөрге, чараш. Долгандыр-ла хөлбөгөр ногаан.

Улуг-биче хемнер аскымнап-ла үнген. Оларның өңү кызыл божа. Савазынга, хап бадып чыдар уннарынга сыймайн, кырлаң-кырлаң дүргек чалгыглары-бile әриктерин чүлгүй шаап, чире моннап, дааш-шимээнни-бile үерлеп баткылаан. Часкы хар, меңги-дош эрип баткан эвес, үерлээшкүн үш хонуктан эртпээн. Хемнер суу тыртылып эгелээн. Оларның боралгак өңү чоортула кылайып келген.

Аң-меңниң төтчеглекчиizi Чазыйбан бүдүү иштинде дүвүреп орган. Ооң сагыжынга тайга-таңды кирер. Ол-бо өзеннерде аң кокпаларында салып каан дузактары караанга көстүп келгилээр. Сактырга-ла, элик азы хүлбүс туттуна берген чыткан ышкаш болгулаар. «Бо кудайның чүзү дешти бээри ол! Оон башка дузактарымны каш хонук бурунгаар-ла эргий кезип кааптар турган мен. Ам суг болза чаагай аң эъдин үске хооруп чип орбас мен бе...» деп, ол бодангылааш, хөлчокка-ла эзегилээн. Аң эъдин сактып кээрge, ооң өзү каарып, шөйүндүлери саргып, чөм чиксээри дендей берген. «Чонаада-ла соглур чедип дырыңайып чыдар бо хемнерниң кызыл божаландыр үерлеп та канчаары ол ийик! Менээ моондаан-на таварыштырдылар — деп, ол иштинде шугулдаан. Хейде-ле хапыгыр арнын ийи холу-бile дурбүй туткулаан. — Ам-на караңгы имир дүжүп орда, тайгаже арлы бергей мен аан».

Чазыйбан дүйште удуп чыткаш, коргунчуг дүш дүжээн. Ол элик кокпазынга салып каан дузаан кезип чоруур. Бир баалык кырынга салган дузаанга келирге, кончуг-даа хүлбүс туттуна берген чыткан. Кулугуруң амырай-ла берген. Өлүг хүлбүстү адырар деп чыдырда, кончуг улуг даг-иргек олче шурап-ла келген. Дезер-даа харык чок, адыг ону чыпшыр база-ла берген. Чазыйбан алгырып-даа, шимчеп-даа чадап каан.

-  1. Чазыйбанның үүлгедиглерин тодарадыңар. Ол кандыг де-риг-херекследерлиг чоруп турганыл? Аңаа дөмей кижилиер амы-дышалда бар деп бодаар силер бе?
-  2. Арга даамалы Ак аңчының ажылынга хамаарылгазын сөзүг-лелде чижектер-бile бадыткаңар.
-  3. “Даг көрбейн эдээн азынмас” деп үлегер домактың утказын тайылбырлаңар.
-  4. Дузакче кире берген эликтин байдалын илереткен одуруг-ларны номчуңар. Сагыш-сеткилиңер доюолду бе?
-  5. “Долгандыр турар бүгүл-ле чүве чаңс суунга арыг тас-кылдыр чунуп каапкан. Үнүш-байдусту көөргө, чарааш. Долгандыр-ла хөлбөгөр ногаан” деп үзүндүде кандыг бодал илереттингенил? Аас-бile делгеренгей харыылаңар.
-  6. Чазыйбанның дүжү чүнү оштаан деп бодаар силер?
-  7. Үзүндүнүң дылының уран-чечен аргаларын сайгарыңар. Бойдус чурумалын чуруурун шененецер.
- “Улуг-биче хемнер аскымнап-ла үнген. Оларның өңү кызыл божа. Савазынга, хап бадып чыдар уннарынга сыңмайн, кырлан-кырлаң дүргек чалгыглары-бile эриктегин чүлгүй шаап, чире мөңнап, дааш-шишмээнни-бile церлеп баткылаан. Часкы хар, меңги-дош эрип баткан эвес, церлээшикин үш хонуктан эртпээн. Хемнер суу тыртылып эгелээн. Оларның боралгак өңү чоорту-ла кылайып келген”.
-  8. “Егерь кижииниң бир хүн ажылы” деп темага төлевилелден кылышыңар.
-  9. Ылгай демдеглээн сөстерге синонимдерден тывар, сөс кат-жыышкыннарының утказын тайылбырлаңар:
- Кижи истерин кескилээр, кадыг-каралар, баалык, сеп, шоглаар, хемнер аскымнаар, иий буттуг коккаарактар хөлцин кайын чазар, аяң черле долар, хыы ханар.

10. “Халы-халы, элик! Оран-таңдың оъдун оъттап, кылаң кара сууң ижип чор!” — дээн Ак аңчының йөрээлиниң утказын чугаалап көрүцерем. Кандыг бодал илередип турар-дыр?

Алдыгы эгэ

Караңғы имир дүшкен. Чазыйбан Узун-Арга кайы сен дээш хапкан. Аң кокпаларында салып каан дузактарын кезиири ол. Даң чаа-ла хаяалап орда, ол Узун-Арганың үстүү өзенинге чортуп келген. «Удавас чер чырыыр. Улуг дыка далашкан ажыы чок. Бир дугаар дузак салган баалым моон ырак эвес. Бөгүн черле олчалыг болур болгай мен аан. Сагыжым чүве энdevес кижи мен» дээн бодалы-бile ол бодун оожургаттынган.

Чер-даа чыраан. Чазыйбан баштайгы дузак салган черинге келген. Кокпалап аңнар халып эртип тургулаан. Ынчаарга кызаа чирикке салып каан дузаа чок. Кижи адырып аппарган.

Чазыйбан чоорту-ла хамык дузактар салган черин эргилдир кезип чорупкан. «Ам-на бирээ туттуна берген чыдыр боор” деп кордавышаан чедип келирге, салган дузаа чок болур.

Төтчеглекчи Чазыйбан:

— Халак, халаң! Кончуг ара-соора туттурганны! Чүү адам куурумчу маңгыс боор, чазыйлаан чувени, холу сынганны! — деп химириенип, кончуттунуп шаанга кирген.

Кыры чиңгистелчек ирик чудук кырынга куду көрүп алгаш, бир кезек орган. “Адыр-адыр! Ам эң сөөлгү дузак салган черим бар, бо кончуг шулбус ону черле тыппаан боор. Ында чугаажок бирээ туттунган” деп бодап келирге, дузакка туттунган өлүг хүлбүс ооң караанга көстүп келген. Сактырга-ла, улуг-чаагай аппарган, дартая берген чыткан ышкаш.

Ол шак ынчаар боданып олурда, үстүү талазында эзим иштинде кускун эткен. Төтчеглекчи тура-ла халаан. Мурнуунда чыткан агбагар дазылдыг будукту көрбээн. Аңаа тепкеш, ийи тырыкыланып кээп дүшкен. Оон чолдаш-чолдаш тура халааш:

— Өршээзинем, ээр тандым эй көрген-дир — деп, катап-катап чугааланмышаан, дөш өрү халып-ла каан.

Чазыйбан дузак салган черинче чоокшуулап ора, улуг бижээн ушта соп алган. Ол боо черле атпас. Улус дыңнап каарындан коргар. “Канчап билир, дузакка кирген аң дириг-даа болуру чадавас” – деп, ол чараазын сыйртынып боданган. Оон база катап холунда сарыг, мыйыс сыйптыг, улуг бижээнче ынаныштыг көргеш: «Бо хөөкүй-бile та чеже аңны өттур шашпадым дээрил аан. Бүзүрелдиг эт болгай аан» – деп, ол боданган. Ында бирле дартагар чүве көстүп чыткан. Ону чиңгис-бile хөмгеш, кырындан будуктар-бile базырып каан.

Чазыйбан тура дүшкен. “Адыг-дыр! Ол мээн дузакта туттунган ацымны чыдырып базырып алганы ол-дур» деп бодал ооң сагыжынга кирген. Ынчан ооң арны изиш дээн. Ооргазын куду алзы шагар-ээрэмчик ыдып бады барган ышкаш апарган. Ол үеде ооң арнын көрген болза, калчан турган боор оң. Чандыгыс черде көжүй берген. Чазыйбан элээн болгаш орталанып келген. Ам харын ыңдай-бээр сезиктии-бile көрген. Чүктеп алган дүүргезин ам-на октап, адарынга белеткеп алган. Ооң соонда ол-бо дээриглей кылаштап, дааш үндүрүп, ыяш-даа соктагылаан. Чүвэ-ле шимээн чок. «Бо кончуг мажаалай чоокта чок-тур. Чазый чүве өзеннер кезип, улчуп чор болгай аан» деп, төтчеглекчи оожургап боданган. Ынчангаш сести аарак базыпкан. Будуктар адаанда ылап-ла бир чүвени базырып каан. «Мажаалай чоокта чаа ынчап турган хире-дир. Дузакка туттунган аңың эъди чыдырып хире болбаан» деп, Чазыйбан өөрүшкүлүг боданган.

Чазыйбан баскылаштыр каап каан будуктуң бирээзин ап октап чыткан. Ол үеде ооң артында пөш будуунга орган кээрген кыпсынчылы-бile алгырып дүжүрген:

– Кэ-эрк! Кэ-эрк!

Чазыйбан атпаш кынган. Адыг алгырган ышкаш болган. Ооң чүрээ боскунга келген. Ол карак-кулак чок халып-ла каан. Кээрген база катап эткен. Ам-на Чазыйбан тура дүшкен. Ооң сөөгү сирилевишаан. Холунда дүүргези чок. Куруг боду ыдып бар чыткан. Бир эвес адыг, ылап-ла, келген болза, ону анаа-ла мандаңнап каар. Ол хейде-ле арны-бажының дерин чоттунган.

Төтчеглекчи бир кезек сирийнин орган. Оон арай деп оожургап алгаш, демги будук овааланган черинче корга-корга кылаштапкан. Аңа чоокшулат келгеш, тура дүшкен. Ыңай-бээр дыңнаалаан. Шимээн билдинмээн. Оон соонда ол халывышаан баргаш, дүрген-не дытта чөлөп каан дүүргезин сегирип алган. Оон база ыңай-бээр дыңнаалагылаан. Долгандыр ыржым. Чүгле оон дужунда чоон чодур дытта көк-хөкпеш чыйтыладыр эдип, чөмнеп халып турган.

Чазыйбан хамык будукту ап октап эгелээн. Адак соонда улуг куу дазыл ушта соп алган. Хөөкүйнүүц аң деп кордаан чүвэзи ол ышкажыл. Оон өдү частыр часкан.

Ак аңчы черле сагынгыр. Ол дузакка туттунган эликтүү салыпкаш, оон орнунга куу дазылды будуктар-билие базырып каан. Чазыйбаны ол ынчаар база чөм эреткен.

Чазыйбан ам адыгдан эвес, а кижиден коргуп эгелээн. Сактырга, оон дузактарын сөөп чоруп турага кижи дуу-ла ыяштар аразында кедеп чыдар ышкажыл. Ол ынчангаш дедир келген уунче ыңай-ла болган. Халып-халып-ла, дедир хая көрнүр. Сактыргала, аңныр инспектору ону ызырты-ла сүрүп орган ышкажыл болур.

65 1. Чазыйбаның сагыш-сеткилиниң иштики байдалын барымдаалап сюжеттүүг чуруктардан чуруңар.

2. 6-гү эгениң планын цитаталап тургузуңар.

3. Дараазында айтырыгларга харыыланар:

“Кончуг ара-соора туттүрганны! Чүү адам куурумчу маңыс боор, чазыйлаан үзүнүү, холу сынганны!..” деп химириенин, кончуттунун шаанга кирген.

“...Кыры чиңгистелчек ирик чудук кырынга күдү көрүп алгаш бир кезек орган. “Адыр-адыр! Ам эң сөөлгү дузак салган черим бар, бо кончуг шулбус ону черле тыппаан боор. Ында чугаажок бирээ туттунган” деп бодап келирге, дузакка туттунган өлүг хүлбүс оон караанга көстүп келген” деп үзүндүде Чазыйбаның чугаазында чүнү эскердиңер? Кым-бир кижиңиң чугаа домаандан оон аажы-чаңын илередип болур бе? Чугаа культуразы деп чүл?

Чедиги эгө

Чаа өөредилге чылынга чедир санныг-ла хонуктар арткан. Байлаң-оол ам сөөлгү катап тайга үнүп, киш-кулаа чырынга белеткени берген. Ол чааскаан кайын чоруур ийик. Ачазын эдерер. Эниин база эдертип алыр. Ынчангаш Байлаң-оол хөлчокла өөрүп турган.

Адашкылар Эзириктиг-Өзенге кээп доктааганнар. Ак аңчы улуг-ла чоон пөштүң доорзунга оглун эдертип эккелген. Байлаң-оол ону көөргө, эрги одаг чер болган. Үш борбак ожук дажы бар. Оол пөштүң будуктарын адаандан өрү алзы көрген. Чатпагар будуктарлыг пөш ацаа чадыр-өг-бile дөмөй сагындырган. Эң адаккы будукта солунда орааган ийи кезек чүве халацайнып турган. Ачазы от салып, шай тиге бээр аразында оларны дүжүрүп алгаш, сонуургап көрген. Оларның бирээзинде хоюдур соктап каан кызыл-дус, бирээзинде сарыг шай бар болган. Оол кайгай-ла берген.

— Бо шай, дусту кым азып кааны ол, ачай? — деп, ол айтырган.

Ак аңчы далаш чок таакпылап каап ора, чугаалаан:

— Бо одагның ээлериниң шай, дузу-дур, оглум. Буянныг сеткилдиг эки кижилер ындыг чоор. Чүгле хүнүн бодавас. Хөөкүйлер боттарының соонда бо одагга кээп доктаар улуска арттырып кааннары ол-дур. Оларны дедир азып каг, оглум. Бистин шай, дузувус бар ышкаждыгай. Сөөлүнде маңаа келген ёске улуска херек апаар чадавас.

— Дыка-ла эки кижилер-дир але, ачай?

— Дуу ол кургаг будуктарны көрбес сен бе, Байлаң — дээш, Ак аңчы дужунда чыткан хос куу чудуктуң адаанче айыткан.

— Ёзулуг кижилер ол-дур. Угааның эрлер-дир он! Олар шуут шыыладыр бодап турганнар-дыр.

Байлаң-оол ачазының айыткан хос чудуунче көрген. Ында кургаг агбаннар, будуктар эңмежок болган. Оларга өл-чаъс белен дегбес.

Сески эгэ

Эзир ол элдептиг ацнаарны кажан-даа көрбээн. Үнчангаш оларга, ыяап-ла, чедер дээш сүрүп орган. Бар-ла шаабиле халаан. Ол ак-ак кондаалайларлыг, чингэ узун-узун даваннарлыг амытаннар ацаа бараан-даа бербейн барган. Эник оларның соондан бараадап, чыт сүрүп, бир кезек халаан. Чоорту чыт база читкен. Эник бир-ле эзим ишти черге халып келген. Хенертен ооң мурнунда доора чудук адаандан бир-ле хөхпегер бора амытан база тура халаан. Астыгыр узун кулактарлыг, майтак буттарлыг ол аңчыгаш база-ла шыргай иштинче шимеш дээн. Кайы-даа угже барганы билдинмейн барган.

Эзир бир кезек ээрип халаан. Ооң ээреринден черге чемнеп чораан дииңнер ыяштарже дезип үнүп турган.

Эник ам-на ээлерин сактып келген. Келген уун бодап, бир кокпа орук-бile дедир ыдып-ла орган. Ол кызаа шырыш аразыбиле эрткен. Ооң мойнуунче кирген бир-ле чуве ону салбайн барган. Чүткүүрге-даа, салбас. Харын-даа боой согар деп баар. Багга өөренген болгаш, олуруп алган.

Хөөкүй эник туттунган дузаанга бир хонгаш, бир хүнзээн. Ооң аштаары кончуг. Хейде-ле кезек-кезек болгаш, каңзып улугулаар. Ол чазык-чаагай, эвилен-ээлдек, улуг-биче ийи ээзин сактып кээр. Ол туткуланып ээрерге безин, кым-даа харыылавас. Чүгле ында-мында кээргеннер эткени, торгалар ыяш соктааны дыңналыр.

Эник туттунган дузаанга база бир хонган. Ооң-бile ийи хонук эрткени ол. Хөөкүйнүң аштаар-суксаары-даа дендээн. Шимчээр-даа харыы чок апар чыткан. Удуй бээр. Дораан-на дүжеп эгелээр. Бичий ээзи Байлаң-оол ацаа тавакта быдаазын кудуп берип чедип кээр. Ону ижер дээргэ, изии кончуг, аасты, дылды чиптер. Эник ынчаар-ла улаарап, даван-даяа дырбацайнып чыткаш, оттуп келир. Бичий ээзи-даа, быдаазыдаа чок боор.

Эзир муңгарап чыткан. Ооң карааның чаштары борбак-борбак бадып турган.

Эник бир-ле дааш дыңнап каан. Ооң үстүү талазында будук дырс кынган. Ээлерим боор дээш, эник тура халаан. Ылап-ла кижи даажы.

Чазыйбан шырыш аразындан үнүп келгеш, дузаанда туттуна берген бөрзек дег көк эникти бир кезек кайгап турган.

Эзир танывазы кижи чанынга чедип келирге, чыда дүшкен. Ол кижиниң арны хапыгыр, дүрзүнчүү кончуг болган. Сыптыгыр карактары артында дош дег соок.

«Кончуг дора өлген эрлик боор. Барып-барып кижиниң аңга салган дузаанга туттуна бээр. Сен чыдыг эрликтى канчаар эвес мен!» дээн бодалы-бile ол эникче дап берген. Эзир ырланып каан. Ол танывазы кижиниң каржы-дерзизизин билген.

Чазыйбан шывык тудуп алгаш, эникти соп-ла эгелээн. Эник алгырып, ол-бо былдай дүжүп, шурап-ла турган. Оон монунп эгелээн.

— Ол-дур, эрлик! Ам таптыг өлүр сен — деп, Чазыйбан хыы ханып хыйланган.

Байлаң-оол ачазы-бile эниин олут орбайн дилеп келген. Ам олар энииниң алгызын ырактан дыңнап кааш, олче халчып-ла кааннар.

— Эзир, Эзир! — деп, Байлаң-оол алгырган.

Ак аңчы дүүргези-бile агаарже бир аткан. Чүге дээрge ол каразып каан. Эник ыт анаа-ла ынчаар алгырбас. Ону бир-ле каржы амытан соп турар дээрзин өттүр билген.

Чазыйбан атпаш кынган. Улустуң шимээни ырак эвесте дыңналган. Төтчеглекчи кортканындан сирийейнип, дүрген-не эзим иштинче шимеш кынган.

Байлаң-оол ачазының мурнунга халып орган. Ол эниин ырактан-на көрүп каан. Бичи оол халывышаан келгеш, моннур четкен эниин демир дузактан адырып алган.

Эзир ынчаар амы-тынныг үнген.

Ак аңчы демир дузакты кайгап ора, чугаалаан:

— Бо мындаагы-ла төтчеглекчиниң дузааның өөрү-дүр. Артында үш каът. Чаңгыс ол-ла кижи-дир.

— Кулугурну тудуп алыр чувевисти але, ачай?

— Кончуг төтчеглекчи Эзирни соп турган көрдүң бе. Шыкпышыжы база бо чыдыр — дәэш, Ак аңчы шетчигештиң чиңге бажы шывыкты андара-дүндере туткулаан. Ында Эзирниң дүктери безин бар болган. — Ону мен черле тудар мен. Төтчеглекчиниң аяя долар хүнү келир.

Байлан-оол каттырып каан. Эзир бичии ээзиниң берген эъдин чип чыткан.

Тоску эгө

Кыш дүшкен. Тайганың хар-чамы-даа улгаткан. Кижи кылаштаарга, дискек караан эртип турар. Хар улгаткан тудум-на аң-мендеге улам берге апар чыткан. Чиир чем белен тывылбастаан. Олар чүгле кокпа оруктар эдерип шуужар.

Кыш дүшкени-бile кады Ак аңчы аалынга-даа орбастаан. Тайга-сыннар кезип чоруп бәэр. Чамдықта чартык ай суг болгаш чанып келгиләэр. Аңныыр инспектору кижиның ажылы ындыг. Кыжын аң-менниң амы-тынынга айыылдыг чүвелер көвүдәэр. Ийи-чаңгыс арын-нүүр чок төтчеглекчилер какпа, дузаан база салгаш чоруп бәэр. Аштаңгы бөрүлөр база көвүдәэр. Олар аңнарны хемнер кыдышынче, булук-доштарже чыгай сывырып тургаш, тудуп чип эгеләэр.

Кыштың соогунга, улуг харга, араатаннарга кызаттырган элик-хүлбүстү, сыйн-мыйгакты, буур-буланны, черлик хаваннарны чүгле чаагай сеткилдиг кижилер камгалап болур.

Бо удаада Ак аңчы Узун-Арганың эрээн-шокар эзимнерин хаактыг кезип чораан. Ол оглун база эдертип алган. Байлан-оолдуң ынчан кышкы дыштанылгазы турган. Ээлеринден Эзир база чыдыр калбаан.

Ак аңчы күзүн дииңнээрде ыдын эдертип чораан. Күзен, киш, дииң истеп тыварынга ону өөредип каан. Ол, шынап-ла, эрестиг ыт бооп өзүп орган. Ээзиниң аайындан черле эртпес, ушкан күш сүрүп, дескен аң-даа сывырып чоруп бербес. Чүгле ээзиниң арнынче көөр. Ооң ыдалааны-бile болур.

Ак аңчы чайын өзеннер ишти эргип, хөй-ле черлерге сиғен кескен. Оозун долгааш, дыт будуктарынга кургадыр азып



каап турган. Ам ол сиғеннерниң ажыглаттынар үези келген. Ыңчангаш оларны дүжүрүп, аңнар кокпаларының бажынга чавызыздыр халайтыр азып каап чораан.

— Эликтөр хөлчөк-ла амыраар боор аа, ачай? — деп, Байлан-оол айтырган.

— Ыңчанмайн, оглум. Мындыг чаагай ногаан сиғенни олар ам кайынын-даа тыппастар...

...Кышкы хүн дуртуу кыска. Ол шала кыйгая берген кудулап бар чыткан. Ачаشкылар өзенни куду алзы хаактыг бадып органнар. Оларның мурнуунга чадаг кижи изи таваржып келген. Эзир ол исти чыдырыргап көргеш, сирбее-ле берген.

— Бо кижи мырыңдай чаа өзенни куду баткан-дыр. Хар эриг, доңмаан — деп, Ак аңчы оглунга чугаалаан. — Бо ыт ол исти чыдырыргааш, чүге шугулдалп турар чоор?..

Эзир чадаг кижииниң изи-бile ырланып, чыдырыргап чоруй, ыңдай-ла болган.

— Эзир! Эзир! — деп, Ак аңчы ону кыйгырып-даа чадаан.

Ачашкылар ыдының соондан далажыпканнар.

Эзир чадаг кижииниң изи-бile ыдып-ла орган. Чыт улам киткээн. Кижи ам ырак эвес. Ыт ырланмышаан, халып орган.

Эзир халывышаан келгеш, ооргазында аар чүктешкилиг кижиини ойттур тыртып алган. Хапыгыр арынныг, дош ышкаш

соок, сыпсыгыр карактыг чайгы кижи ол. Ынчан ол Эзирни соп, теп шаанга кирген. Харын-даа бооп өлүрер часкан. Үт төтчеглекчиниң хөрээнден ийи холдап базып алган турган.

Чазыйбан угаан-кудун оскунар чыгыры чыткан. Ол баштай ытты бөрү деп бодаан. Чоорту угааны орталанып, ону ыт ойттур базып алганын билип каан.

— Сок! — деп, ол алгырган.

Бөрү ышкаш көк Эзир сүртөнчии-бile ырланган. Оон тыныжы Чазыйбанның арнынга изиг-изиг билдириген.

Чазыйбан kortkanындan сириңейнип чыткан. «Чайын мээн дузаамга кирген эник бо-дур» деп бодал оон сагыжынга коргунчуу-бile кире хонган.

Ол аразында ачашкылар чедип келген.

— Эзир, бээр кел, чыт! — деп, Ак аңчы дужааган.

Үт ээзиниң аайынга киргеш, Байлан-оолдуң чанынга барып чыдып алган.

Чазыйбан сириңейнип туруп келген. Ак аңчы ону танып каан.

— Адырам, эш Чазыйбан — деп, Ак аңчы шыңгыры чугаалаан:

— Тооргуну каяя какпалап алдыңар? Ам черде салган какпаларыңар хөй бе?

Чазыйбан черде чыткан доң тооргузунче көрген. Какпа оон будунда чыпшындыр донуп калган чыткан. «Соок боорга, какпаны кончуг-ла адыrbайн бардым. Бажымче хан кудуп алганым ол-дур ийин» деп, ол коргуп боданган.

— Черден тып алдым — деп, Чазыйбан будулдурган.

Ак аңчы Чазыйбанның хар кырында чыткан шоодайын тө силгипкен. Оон ийи улуг какпа, долгап каан сывырындак дузактар кээп дүшкүллээн.

— Көрдүң бе, Чазыйбан! Аң-меңни мынчаар хилинчектеп өлүрүп туар-дыр сен. Бо тооргу какпага киргеш, донуп, дора өлген. Ол кайы хире хилинчек-тири!

Чазыйбан хөлүйүп-ле калган. Ол ачашкылардан караан дестиргеш, билбейн, Эзирже көре берген. Үт коргунчуу-бile сирбейип, азыг диштерин көзүлдүр ырланып каан. «Аяам

долган-дыр!» деп, ол коргунчуу-бile боданган.

— Үүлгедип турган херектерицерни ам харыылаар үенер келген, Чазыйбан! — деп, Ак аңчы шыңгыы чугаалаан. — Силерни чайдан тура истеп, хынап келген мен.

Чазыйбан чүгле идиктериниң баштарынчe көрген.

Ачашкылар Эзирниң дузазы-бile төтчеглекчи Чазыйбанны мынчаар тутканнар.



1. “Эзирниң аргага эскериглери” деп дыңнадыгдан бижиңер.

2. Кижилерниң аң-менгэ хамаарылгазын сайгарып чугаалажыңар.

3. Чогаалдың темазын болгаш идеязын илередиңер.



4. Егерь кижиның кышкы үеде ажылын бижип алышар. Арга даамалы болуксаар сiler бе?

5. Чурттап турага чериндерниң бойдус байлаан хумагалап камнаар дээш, чуну-чуну кылып турага сiler?



6. Эзирниң мурнундан “Төтчеглекчиниң дузаанга” деп кыска чогаадыгдан бижиңер.



7. “Эзир болгаш Чазыйбан” деп темага мультфильм үндуреринге таарыштыр чуруктардан чурунар.

8. “Арганың амытаннары” деп темага шинчилел ажылындан кылыңар.

9. «Ыт – кижиның өңнүү» деп бодалды чогаалда болуушкуннар болгаш амыдыралда чижектер-бile бадыткап чугаалаңар.

Шаңғыр-оол СУВАН

Азыранды

Эрте частың бир чыллыг хүнүнде бажың чанынга бичии эник көстүп келген. Сүүр-сүүр кулактарлыг, угаанныг, эрес карактарлыг, а кежи кап-кара, чүгле быктында мең ышкаш ак чөр бар. Оолдар-бile ойнап, ыңай-бээр маңнаарга, кежи хүнгө кылаш кыннып турага. Оолдарның сеткилинге эң таарышкан чүве – чамдык ыттар дег кортук, чашпаачы эвес болганы. Кый дивээн кижиже чоокшулавас. Кый дептер болза, дораан-на маңнап кээп, оюн эреп долгандыр маңнагылап, ийи холунун

кырынга чыда дүшкүлээр. Эргеледип суйбаарга, кулактарын сүвүретипкен, дөрт будун хере тепкен, арай-ла тоомча чок, чоргаарзымаары сүргей турар. Эргеледиишкинге харыылап чассый бербес. Чүгле кудуруун чайып каар.

Кымның ыды боор деп оолдар бот-боттарындан айтырышкан. Ээзи тывылбаан.

— Ындыг болза, эник мээн ыдым болзун — деп, Аяс чугаалаан.

— Чок. Мен азырап алыр мен — деп, Мерген удурланган.

— Чүге сilerниң ыдыңар болур чүвел?! — деп, Сылдыс чаржалашкан.

— Чүге дээрge эниктиң ээзи чок — деп, Аяс үзе кирген.

— А мен база эникти ыт кылып алышап тур мен — деп, Сылдыс уламчылаан.

Кижи бүрүзү эникти азырап алышап, оолдар аразында маргыжып үнгеннер. Кезек болганда маргылдаа шошче шилчиир чыгап, оолдар аразында ыймактажып эгелээннер. Ону эник оюн деп бодап, долгандыр маңнап, ээрип, оолдарның балдырларындан ызыргаш, тырта кагылап турган. Изирниккен оолдар эниктиң оларны балдырлап турганын көнгүс эскербээннер.

— Эй, кайгалдар! — дээн дыңзыг чоон үнден оолдар ыймактажырын соксадып, хая көрнүп келгеннер.

Оларның мурнунда Соктай акый карактарын имирертипкен, кажарзымаар хұлұмзұруп алган турган.

— Чүү мындыг улуг, доозуну дээрge шаштыккан чогуш-содаа үнүп турар чүвел, кайгалдар? — деп, оолдарны Соктай эргий көрген.

— Эникти мен азырап алыр дээrimгэ, оолдар хунаажырдыр — деп, оолдарның эң-не бичизи Мерген хоптанган аянныг чугаалаан.

— Мен бир дугаарында чугааладым чоп — деп, Аяс удурланган.

Оолдар база катап шимәэргеп-ле үнгеннер.

— Адыр, адыр — деп, Соктай оолдарны оожуктурган. — Эниицер кайыл ынчаш?

— Дүү-дүр — деп, Соктай же сезиктии сүргей кайгап алган турган эникче оолдарның бирээзи айыткан.

Соктай чүкүрерге, эник кулактарын сүүреш кылган. Ону тудуп алыр дээрge, дескилээш, холунга кирбээн.

— Оо, эки-дир oo — деп, Соктай эникти магадап, карактары чазыйланып, кыптыга берген. — Каям, тудуп берицер, кайгалдар — дээрge, оолдарның бирээзи эникти тудуп эккеп берген.

Соктай эниктиң дүгүн дедир суйбап, топтап көргүлээн.

— Силерниң чаргыңарны чарып берейн, кайгалдар — деп, ол чугаалаан. — Бо эник бистиң шуптувустуң ыдывыс болзун.

Оолдар чугааның аайын тыппайн удур-дедир көрүшкеннер.

— Ийе, шуптувустуң ыдывыс болур — деп, Соктай уламчылаан.

— Бир-тээ, кижи бүрүзү азырап алыхсан турар чүве болганда, бис шуптувус бо эниктиң ээлери болур бис... Мен база...

Оолдар ыыт чок.

— Ужурун билбейн тур сiler бе, кайгалдар? — деп, Соктай оолдарны эргий көрген. — Эникке удуур-чыдар үгекти бир эптиг черге кылып бээр бис. Бир-тээ, үгек кым-бир кижиниң бажыңынга эвес, а даштыгаа турар чүве болганда, кижи бүрүзү эникти чемгерер, ажаап-карактаар, ооң-бile ойнап болур. Чаңгыс сөс-бile чугаалаарга, кижи бүрүзү эниктиң ээзи болур.

Соктайның сүмези оолдарның сеткилингэ аажок таарышкан.

— Ура-а-а! — деп деңге алгырыпканнар.

Эрткен-дүшкен кижилерниң караандан ажыт черге үгекти эникке тудуп бергеннер. Эник үгекке дүрген ижигип, ацаа чыдар апарган. Бир тывызык кижи эникти Азыранды деп шолалап каан. Бажыңын чурттакчылары ону “Азыранды” деп кийгырар апарғаннар. Эник ол шоланы атсына берген. Дыңнап кааш, дораан-на маңнап кээр. Азыранды ол чоок-кавыда бажың-нарда оолдар, уругларның ыннак ыды апарган.

Азырандыны ашкaryп-чемгерерингэ, ажаап-карактаарынга арга-сүмени оолдарга Соктай акый берип турган. Чижээлээрge, «Эникти өйлей чемгериндер. Хөлүн эрттири чемгерер болза, семирээш, чазый ыт бооп өзөр». «Үт-бile дыка ойнавас. Чу-

дааш, дүгү баксырай бээр». «Үтти үргүлчү сугга эжиндирип, дүгүн дыраар херек. Ооң кежи арыг, шынары эки боор».

Соктайның ындыг янзылыг сүмелериниң айы-бile Азырандыны оолдар чайны өттүр ажаап-карактап келгеннер. Құске чедир Азыранды шилгедек бедик дурт-сынныг ыт бооп өзүп келген. Чайладыр оолдар-бile ыңай-бээр маңнап, ойнап өскен болгаш, мага-боду құштұг, кашпагай, чаңы әптиг-әэлдек.

Кыштың башкы айы дүжүп, башкы хар чаапкан. Сооксұмаары кончуг. Азырандыны қыжын каяа тургузуп қаарын оолдар чугаалажып, ол дугайында сүмени Соктайдан айттырганнар-даа.

— Көдәэ ыттар канчап даштыгаа кыштаар-дыр. Үт дәэрge чер чүректиг, дүктүг кештиг амытан-дыр. Каяа доңарыл ол. Бажыңчे киирер болза, даштыгаа қыжын үне албас, донуучал апаар. Чылыгга кежи база баксыраар болгай — деп, демгизи чугаалаан. — Үгээн бичии чылыглап бээр, ол-ла-дыр.

Ооң сүмезин ёзуғаар Азырандының үгээн оолдар чылыглап бергеннер.

Амыдыралында баштайғы кышты Азыранды өөрүшкү-бile уткуп алган. Қыжын оолдар, уруглар-бile ойнаарга, аңаа дықа солун болган. Шанактыг, хаактыг уругларны хала чокка сөөртүп, чунғуну куду оларның-бile шивеңнедир чаржып бадып, харга таалал-бile аңдаштанып, мага хандыр Азыранды ойнап турған.

Оолдарның кыйгызынга бир эртен Азыранды харылаваан. Үгекти бакылап көөрге, ында база чок. Үттың хоорай кезип маңнаар чаңчылы чок турған. Ооң чиде бергенин улуг кижилер безин эскерип кааннар.

Оларның бирәэзи:

— Улгаткаш, тояап чоруп кааны ол-дур — деп, Азырандыны чемеләэн. — Баг чокта, ыт черле ындыг.

Ооң чугаазынга бүзүревезе-даа, оолдар ыдын дилеп, хоорайны каш хүн кезип, барбаан-чорбаан чери-даа чок. Азырандының изи, сураа кайда-даа чок болган.

Азыранды чокта, бажыңнар чоогу ээнзиргей, куруг ышкаш апарған. Мурнуку хүннерде ышкаш, уругларның каткы-хөглүг,

өткүт үннери даштыгаа шоолуг дыңалбастаан. Кудумчуже үнүп ойнаар уруглар каш-ла санныг. Азыранды чокта, кудумчуга ойнаарга, улам-на соок ышкаш сагындырар. Оларны каапкаш, ыды тояап чоруй барган деп чүвеге кым-даа бүзүревээн. Чанып келген ирги бе дээш, эртеннин-не үгекти бакылап көрүп турганнаар. Ыт ол-ла хевээр келбээн. Үгээ ээнзиргэй, хос апарган турган. Чоорту Азырандыны уруглар манавастай бергеннер.

Соок кыштың чылыш дээн хүннериниц бирээзинде уруглар чунгуга чыглып кээп, ону куду киискиди бадып турганнаар. Оларның чаны-бile Соктай эртип чыткан. Душ бооп чунгулап баткан уруглар ону таварыпканнаар. Атпацайнып чоруй, Соктай кээп ужарга, оон бөргү уругларның аразынче уштуунуп барып дүшкен.

Уругларның бирээзи Соктайның бөргүн ап бээр дээш, ону тудуп алгаш:

— Азыранды! — деп алгыра каапкаш, бөртту черже дедир октапкан.

Чунгулап турган оолдар, уруглар шупту бөртту долгандыр үглеп келгеннер. Бөрттүң тейинде Азырандының ак мөчин танып кааш, аңгадай бергеннер.

Соктай бөртту сегирип алгаш, уругларны тарады идипкеш, Азырандының мөци агаараңаан кылагар кара ыт кежи бөртту хөрээнгэ чыпшыр тудуп, бажыңынче дедирлени аарак маңрапкан.

Уругларның ынак ыды Азыранды кайнаар-даа чорбаан-даа, оларны кагбаан-даа болган.

-
-  1. Чогаалдың планын тургузунар, эгэ бүрүзүнгэ аттан берицер.
 - 2. Чогаалда кол бодал кайы абзацта, кайы домактарда кирген деп бодап тур сiler? Чүге ынчаар бодап турагыңарны бадыткааар.
 - 3. Азырандының адынга сilerниң хамаарылгаңар кандыгыл?
 - 4. Азыранды уруглар аразынга турда база ол чокта бичии уругларга кандыг бооп турагын, таблицага көргүзүнцер.

Азыранды уруглар аразынга турда	Азыранды уруглар аразында чок турда



5. Соктайның овур-хевириң, аажы-чаңың, ооң шимчээшкіннерин илереткен домактарны, сөс каттыжышқыннарын ушта бижиңер, оларның Соктайның портредин чуруурунга ужур-дүзазын илередиңер.



6. “Азыранды бистиң аравыста” деп темага чогаадыгдан бижиңер.

V кезээ. ТӨРЭЭН ЧУРТУМ ДЕЛГЕМНЕРИ

Степан САРЫГ-ООЛ

Күс

Калбак ногаан аргалардан
Хадың, шарлан алдыннанып, каттыржып кээр.
Бүрү, сиғен онуп бышкаш,
Бүгү чуртка хүрең-кызыл шырай киирер.

Алгыг-делгем ховуларны
Алдын өңнүг арбай-тараа каастап чыдар.
Кадыыр, дырбааш ырлап үнер:
Кажаа-шаңнар сыңышпастап, долуп келир.

Үндә-мында хайнып турар
Үрлүг-хөглүг шаңнар чаны одарларда
Өөр-өнер малдар сүрүү
Өрү-куду чылбас кылдыр чалгып чоруур.

Дистинчиңкен түмен күштар
Диңмиттелдир ырлашпышаан, хөлдер долган.
Аалдап үнер кыстар ышкаш,
Аяннанган, дөгеринген хөлзеп турар.

Сарыг торгу олбук чаткан
Садтар ишти оймактарга чоруксаам кээр.

Чаап дүшкен бүрүлөрни,
Чаштар ышкаш, дозуп-сүрүп ойнаксаам кээр.

Долгандыр-ла көрүцерем!
Дооза чуве өңгүр-чараш, чазык-чаагай,
Долбаннанган кызыл-хүрең
Тодуг-омак шырай кирген, магаданчыны!



1. “Күс” деп шүлүктүү чуге бойдус лириказынга хамаарыштырар бис? Шүлүкте чогаалчы күстүң кандыг демдектерин чуруп бижээн-дир?

2. Шүлүктүң кайы одуругларында күскү ажыл-иш, өөрүшкүү хөглүг амыдырал чуруттунган-дыр, тайылбырлацар.

3. Шүлүкчүнүң хереглээн метафораларын, деңнелгелерин, эпитеттерин болгаш диригжиidlгелерин тывыңдар.

4. Шүлүктүү аянныг, ыыткыр номчуп тургаш, шээжилеп алышар.



5. Кадыыр, дырбааш, шаңнар, малдар сүрүү, түмен, олбук, оймактар деп сөстерниң тайылбырын кылышар.

6. «Алдын күс» деп темага чогаадыгдан бижицер.

7. Чер-чуртуңарда күстүң чурумалын хайгаарал көрүп, чогаалчының шүлүүнде чуруп бижэени күс-бile деңненер.

Монгуш ДОРЖУ

Экии, Тывам

Экии, Тывам, каас черим,
Ээп өскен ынак авам.
Хөлбөгер көк эзимнериң
Элеп-чуксуг чыды безин
Хөлчок ынак оглуң меңээ
Эм-таң ышкаш чытталып чор.

Шынаа-шыкта чапты берген,
Чадып кагган ааржы дег хой,
Чыраа-саяа девип самнаан

Шаттар сана чылгылар-даа
Кадыр кашпал сыннар ажыр
Караам орта көстүп кээр-дир.

Хөөмей биле каргыраага
Хөңнүн сөглеп, чадаганнаар
Омак-хөглүг мээн чонум
Адар даңны уткуй ырлап,
Оран-чуртуң алдаржыдар
Ажыл-иште чаржып турага.

Бүрү тырткан чаш хаак ышкаш,
Оглуң ырын хүлээп ап көр.
Оттүг чүрээм сээн-били
Бүргег, каанды кады чоруп,
Чүү-даа бергээ торулбайн
Шүглүп чорууйн, ынак Тывам!



1. Бо шүлүкте Тыва биле аваны дөмейлээний канчаар хүлээп ап, тайылбырлап болур силер?

2. Тываның кандыг онзагай чурумалдарын автор көргүскен-дир, ону бодуңарның билирицер аайы-били немеп чугаалацаар.

3. Төрээн Тывавыс болгаш ооң каас-чаражының дугайында ёске кандыг шүлүктер билир силер, оларның бо шүлүктөн ылгалының болгаш дөмейлешкек чүүлдериниң дугайында бодалдарыңар илередип, тайылбырлап чугаалацаар.

4. Төрээн черицерге, бүгү Тывага азы ёсken кожуунуңар, сууруңар, бичиицерден билир черлерицерге ынакшылыңар болгаш чоргааралыңарны илереткен улуг эвес чогаадыг-чурумалдан бижиндер.

5. Автор төрээн чериниң кижиини сорук киирер ачы-күжүн кандыг одуругларда көргүскен-дир, тып номчааш, тайылбырдан кылышаар.

6. *Хөлбөгөр, хөңнүң, адар даң, торулбайн* деп сөстерниң утказын тодарадып, ол сөстерни ажыглап, чаа домактардан чогаадыңар.

Александр ДАРЖАЙ

Өгге йөрээл

Ачамга

Карак четпес,
тараалаң бай
ховуларның,
Калчаа күштүг,
чагырга чок
дажыг хемниң,
Сылдыстарда
сүвүр бажы
үзүп алган
Шыпшыктарның
бүзүрелдиг ээзи боор дээш,
Чырык
били
ынакшылдың чылышы синген,
Канчаар аажок
улуг делгем
өртемчайже
Кааң хүндүс сенден үндүм,
Өгбемниң өө!
Ол дээш сенээ күдүк базып сөгүрдүм!
Ак-көк хемниң
агымнары
дедир акпас,
Аалынче
өлген улус
дедир чанмас.
Ынчалза-даа
чылдан чылче
дуруялар

Ынак, эргим
тулаа-шыгын эргип келир.
База ол дег,
өгбелерим оду кыпкан,
Башкы кышкым
ханазында
сицип калган
Бөдөй өөм,
сени утпайн,
эргип чор мен.
Бөргүм уштуп, черге чедир мөгейдим.
Дириг чорааш,
диттип чадап,
канчап чоруур,
Динмит-бile,
ыры-бile
кады чурттай!

Хүнче уткуй
эзир оглу
чалгын херер —
Күжүр оглун
база ол дег,
шуурган-хатка
Бастыrbайн
чоруп олур.
Дөлем черде
Кезек алдар аразындан,
Өгбемниң өө,
Кезээ мөңге
сорук кирип
туарың дээш,
Базым сана йөрээп чор мен, четтиридим!
Чурттар сана,
диптер сана
дүжүлгеге

Чуртталганы
мөнгө шагда
олуртур дээн
Тайбынчылар одуруунга
чыскаалыр дээш,
Дүргектелген
ужарлыг хем сагындырар,
Дүймеп хөлзээн,
дүвүренчиг
чээрби векте
Даглар бажы
сарыг-шокар
тураг шакта
Бозагацны
артап үндүм.
Ол дээш сеңээ,
Болчумчалыг Өгбемниң өө, четтиридим!
Эргииштелип,
хайнып хөлзээн
чуртталганың
Эрэминчэ
чай чок эштий
чорзумза-даа,
Эки-бакты
ылгай сургаан
эртемицни
Эгийреде
сагызыын дег
ыдык сагып,
Ынакшылды,
ажыл-ишти
сүзүк кылгаш,
Ырлап чор мен,
йөрээп чор мен,
Өгбемниң өө!

Чонум алгаар

үннү мөңээ

шаңнааның дээш,

Чолдуг чүрээм, четтиргеним сөглөп тур мен!

 1. Шүлүктүң маадырынга төрээн өө чүгэ эргимили? Ол ацаа чүү дээш өөрүп четтирип чоруурул?

2. *Өгбемниң өө деп сөстерниң ханы утказын тайылбырлацар.*

3. Тыва өгнүң тургузуун, өг иштиниң эдилелдерин билир силер бе? Ава-ачаацар азы кырган-аваацар, кырган-ачаацар өгге өсken болза, оларның тайылбырын дыңнап, билип алган чүүлдерицерни кичээлгэ тайылбырлап чугаалацар.

4. Шүлүкте метафораларны тып, ооң чогаалга ужур-дузазын тайылбырлацар.

5. *Өг деп сөс силерниң сеткил-сагыжыңарага кандыг бодалдарны оттуруп кээр-дир?* Өгнүң тыва кижиге ужур-утказын, төөгүлүг үнезин болгаш амгы үеде ону канчаар хүлээп көрзө чогуурун тайылбырлацар.

 6. «Өг — тыва кижиниң ыдык оран-савазы» деп чогаадыгдан бижинер.

7. *Бөдөй өг, шыпшыктар, өгбө, диптер, дүргектелген, ээргишиштедир* деп сөстерниң утказын тайылбырлацар.

8. *Өгге тураскааткан өске чогаалдарны, ооң иштинде А.Даржайның «Тыва өглер»* деп шүлүүн, номнардан тып номчуңар.

Салчак МОЛДУРГА

Амытаннар чылы

(*Улусчу аян, хөөн-бile*)

Уругларга хөк,
соот болдурдум.

1. Күске чылы

Күске төве мөгенингэ чаштып алгаш,
Хүннү мурнай эскерип каан үеден бээр,
Амытаннар бичези бол, кайгал чүвөң

Алтарада эт-сеп ээлээш, чылга кирген.
КҮСКЕ ЧЫЛДА төрүттүнген кижи болгаш,
Хүннү баштай мөгежеден көрүп каан мен:
Өөвүс эжии, билип кээрден, Хүнче углуг,
Өргөзи соңгаар аайллыг турар чораан...

2. Инек чылы

Үгер сылдыс черге турда, инек ону
Үстүү оран үндүрбес дээш базар орта,
Изиг чалбыыш муңгаш дуюун чара чиген —
Инек — черде, Үгер — дээрде болу берген...
Ийи адыр дуюглуг мал — ИНЕК ЧЫЛ кээр —
Итпик эдип, итпек-хойтпак савазыраар!
Инек, сарлык малдаан кижи оон бээр-ле
Ишти тодуг, дашты силиг болган иргин.

3. Пар чылы

Пар ыяштың хөөлүүн улус одааш, билген,
Бак кижиниң балалыын чон көргеш, сураан.
Баскактанган дөрдэ эр ээ шыдал-демдээ —
ПАР ЧЫЛ келир, дошкун-даа бол, өршээлдиг-дир.
Парның ыткан төлээлери — ирбиш, чекпе,
Маны, диис-даа Тывавыста чурттап-ла чор.
Мый-ыт аалга ижиксе-даа, аймаан сактыр,
Мынчангаштың бодалы даг бажында-дыр.

4. Тоолай чылы

Тавак долбас этьдин-ханын мактангылаар,
Далчыр, майтаан, кортуун бо-ла сураткылаар,
Хондур-дүндүр алгангылаан, хамнаан чоруур
Койгун күжүр канчап чылга кире берген?
Орун адаа, үлгүүр баары, сава-санга,
От, паш ээлээн агай кижээ мөзүлештири
Шыдал чоктар аразынга ону киирген,
Шынында-ла, ТООЛАЙ ЧЫЛЫ — чыллыг, чымчак!

5. Улу чылы

Улу Хүннү сыйрыптарга, чарып аар дээш,
Угу чаңгыс эрни эккеп, кускуннадыр,

Кызыл өшкү ужу-бажын долгагылап,
Кыдат паш-даа улдап этсир сүзүк — чоннуу.
Улу — ажык, сеткили ак Күчүтен деп,
Угундан бээр кижи төре санап келген,
Өйү кээрге, УЛУ ЧЫЛЫ эртер-ле-дир,
Өртемчей, Хүн догуннап-ла тураг боор-дур.

6. Чылан чылы

Чылып чорда, шокары ооң — даштында деп,
Чылан шагар, шакпастыг деп, кым-даа билир.
Союп, бүдүү чылбырткылаан кижи багын —
Шокарын — чон иштинде деп чиге сөглээн.
«Чыл-даа бажы бээрледи!» — деп курай салып,
«Чылан кежи союлду!» — деп шагаалаар бис.
Чектесе-даа, ЧЫЛАН ЧЫЛЫ ээлчээн эргип,
Чечен-мерген чарапш-каастың ожу бооп чор.

7. Аът чылы

АЪТ ЧЫЛ санга кирип турда, кижилер ооң
Аваангыр, чиик, кашпагайын онзалап каан.
Хары кижээ холга кирзе, аътта эш чок,
Кажар арга, дөскел чок чаң — чылдың демдээ.
Ээзинге бердинген аът оорну тудар:
Эзер, чүген алгаш келзе, оруу муңгаш!..
Аът өлүр — баглааш черге туруп калыр,
Ада өлүр — оглу херээн салгап артар!

8. Хой чылы

Аргардан хой азырал мал болгандан бээр
Аал өдээн, одарларны ээнзиретпээн.
Коданга ак хураганнаар элбек турза,
Кошкул өзүп, байырывыс херечизи.
Кижи тыптып, өгленгенде, өлгенде-даа,
Кирер, үнер аалчыга хой — хүндүлүг дой.
«Хойлуг кижи каас» дээри ылап шын ийин.
ХОЙ ЧЫЛ арай шүшпен-даа бол, эки-ле чыл!

9. Мечи чылы

Изиг оран бодаралы — мечи шаанды

Ийи буттүг кижи угун чаяап тура,
Сарыылдыглар кавызынга ону кииргеш,
Саарзык мээлиг, дөрт-даяк бооп, шыргай ээлээн.
МЕЧИ ЧЫЛЫ ынчангаштың карышкактыг,
Мерген угаан, мугулай-даа сурушкектиг.
Меге-нүгүл кижилдерден чайлап чорзун,
Мези тудуп, аас-дыл-ла кылбайн чоруул!

10. Дагаа чылы

Дагаа барда, чокта-даа-ла даңны атсып,
Тараа бар-даа, чок-даа болза, эyt чип өстүм.
Башта чинзе, одагалыг, хуулгаазын күш
Баажызын улус мынчаар тывызыктаан:
ДАГАА ЧЫЛЫ — төлгүр-дөскүр, чалыы, чараш,
Талаар-бардам, содаачы-даа дижир ийик.
Акшааннарга — узун назын, кадыкшылды,
Аныякка — кежик-чолду ол чыл берзин.

11. Ыт чылы

Бөрзек шиинден ытты кижи өөретке-ле,
Бөгүнгө дээр кодан кагбаан, ээзин утпаан.
Тенекпейни эдерткеним ыдым дээр бе,
Дергилээним көгээржиим бе, эжим дээр бе?
ЫТ ЧЫЛЫ — шынчы, шиитпирлиг, буян-чолдуг,
Ында-хаая чүве тоовас — өжеш, шог-даа,
Ийи ыттың аразынче сөөк-ле кагба,
Ийи кижи аразынче сөс-даа этпе.

12. Хаван чылы

Иргек-бile болчажырда, черлик хаван
Илиг хире кести дытка шыйып эртер...
Азыын — мөңгүн даянгызыны оорладыпкаш,
Аштап-түреп, тоолга кирген кайызы ийик?
Кагай азыын оттук, бижек биле курга
Кады астып, олчалыг-даа аңнап келдим.
ХАВАН ЧЫЛЫ — чудараңгай, эрбенниг бол,
Хамчык-даа чок, эзен-менди, тайбың-на-дыр!

-
-  1. Чөөн чүк улузунуң, ооң иштінде тыва чоннуң, чыл санаашкынының онзагай талалары бо шүлүкте канчаар илерәэн-дир? Болынчылардың санаашкының дүгайында оон ыңай чүнү билир сiler?
2. Чылдарны адаан амытаннарның тус-тузунда аажы-чаңының онзагайын, тускай шынарларын авторнұң уран-чечени-бile ажытканың номчааш, тайылбырлап чугаалаңдар.
3. Бодуңарның чылыңарны билип алгаш, шүлүкте ол чылды адаан амытанның аажы-чаңы-бile кайы хире тааржырын тодардыңдар.
4. Өг-бүлеңдерде улустуң чылдарын тодараткаш, Шагаа хұнұнде бичиң көргүзүгден кылышын шенеп көруңдер.
5. Чылда кирген амытаннардан кандыг дириг амытаннар амғы үеде Тывада чурттавайн туарыл?
6. *Улу* деп дириг амытан дүгайында чүнү билир, дыңнаан сiler? Ооң овур-хевириң диргизип, чуруурун шенеп көруңдер.
-  7. *Үстүң оран, дуюглуг мал, мый-ыт, далчыр, төре, чинзе, одага, кошкул, көгээржик, эрбенниң* деп сөстерниң утказын билип алгаш, тайылбырланаңдар.
-

Проза болгаш шүлүк чогаалының ылгавырлыг талалары

Степан Сарыг-оолдуң «Ол-ла Маскаждық» база «Күс» деп чогаалдарын номчааш, сайгардывыс. Бо чогаалдар ийи яңы хевириң чогаалдары болур: бирәэзи – проза, а өскези – шүлүк (поэзия). Проза биле шүлүк уран-чечен чугааны организастаарының ийи кол хевири болур.

Олар чогум чүнүң-бile ылгалып туарыл?

«Ол-ла Маскаждық» деп чогаалда «Кижиниң угааны база чиктиг-ле болур чүве: чамдық дықа-ла улуг таварылгалар соргак-даа чок уттундурган чоруур» деп домакты «Күс» деп шүлүктүң дараазында одуруглары (строфазы)-бile деңнеп көрәелиңер:

Калбак ногаан аргалардан
Хадың шарлан алдыннанып каттыржып кээр.

Бұру, сиғен оңуп бышқаш,
Бұғу чуртка хүрең-кызыл шырай киирер.

Строфанды номчууруувуска, бир-ле дугаарында «калбак» деп сөс-бile «хадың» деп сөстүң база «бұру» деп сөс-бile «бұғу» деп сөстүң баштайғы үннери аяннажып, тааржып турар. Строфандың одуругларында үн доктаашкыннары база бар бооп турар: иий дугаар одуругда «хадың, шарлан», «алдыннанып»; үш дугаар одуругда «бұру, сиғен» «оңуп бышқаш»; дөрт дугаар одуругда «бұғу чуртка», «хүрең-кызыл» деп сөстерниң сөөлүнгө үн дөмей-дөмей хемчәэлдиг доктаай хона бәэр. Ынчаарга иий болгаш дөрт дугаар одуругларның эң сөөлүнгө үн демгизинден-даа шала үр доктаар. Оон аңғыда бирги болгаш үшкү одуругда сес-сес, а ийиги болгаш дөрткү одуругда он иий-он иий слогтар бар. Баштайғы домакты номчуп турувуста, строфада ышқаш, ындығ аяннажылгалыг болгаш хемчәэлдиг үн доктаашкыннары база дең санныг слогтар чок. Ынчангаш оларның кол ылгалы шүлүк чогаалында тускай ритмниң бар болуунда.

Мынчангаш баштайғы домак чугаага хереглеттинер. Ынчаар бижиттинген чогаалды *проза*, ынчаарга ийиги хевирлиин *шүлүк* чогаалы дәэр.

Шүлүк чогаалы одуруглар болгаш строфаларга хувааттынар.

Чамдық үлегер домактарны, тывызыктарны болгаш улустүң ырларын чугаалаарга азы номчуурга, аяннажылга чүгле әгезинге эвес, харын сөөлүнгө-даа таваржып болур.

-
1. Проза биле шүлүк чогаалының ылгалын тайылбырлаңар.
 2. Александр Даржайның «Өтге йәрәэл» деп шүлүүндөн бир строфанды шилип алгаш, аяннажылгаларны болгаш үн доктаашкыннарын сайгарыңар.
 3. Чечен менде,
Чечек черде –
деп үлегер домакта аяннажылгаларны тывыңар.
-

VI кезээ. КӨЖЕГЕ-ДАА АЖЫТТЫНДЫ...

Виктор КӨК-ООЛ

Чаргы

«Бир шагда херек-даа апаар чадавас.
Октаас силер, уругларым».

*Авторнүүр архивинден.
1965 чылдың февраль 4.*

КИРЖИКЧИЛЕРИ:

Кижи

Ча

Согун

Үяш аразында одаг чанында Ча биле Согун аразында маргышкан олуарлар.

Ч а. Бо чыткан торлааның улуг кезиин мен алыр ужурлуг мен!

Согун. Чок, мен алыр мен. Чүге дээргэ, мен барып дээп каан мен?

Ч а. Ынчаарга сени мен ынаар ыдыпкан мен. Оон башка ацаа чедер харының бар эвес?

Адыр, бо кижи бээр кел чор. Ол бистиң чаргывысты үзүүп бээр чадавас, бээр кел деп алгаш, чугаалажып көөр чүве-дир.

Согун. Хей боор, чүге дээргэ ол артык эйт чиир-ле болгай.

Ч а. Бис ийи бо торлааны үлжип чадап кагдывыс ышкаждыл.

Согун. Ол чөп-түр, эжим. Бээр кыйгыр.

Ч а (*тура халааш, бар-ла үн-биле*). Э-ээй, бээр, бээр! Маңаа келгеш барып көрүңер! Ол-дур ам, бээр кел чор.

Кижи кирип келир.

К и ж и . Аңчылар, ужа!

С о г у н . Төш!

Ч а. Ужадан мырыңай сөөк кыры бооп бар чор бис.

К и ж и. Чүге? Мындыг семис торлаа чыдырда, чүге кыры ышкаш ара бээр силер?

С о г у н. Торлаа бар болза-даа чиртимес-тири.

Ч а. Боостааже ашпас.

К и ж и. Че, дүрген чугаалацар, мен ажылчэ далажып бар чор мен. Чүге чиртимес апарган эът чүвел? Азы чыдый берген чүве бе?

Ч а. Бис ийиниң кайызы улуг кезиин чири билдинмес, чүге дээрge мен хөйнү кылган, мен хөйнү кылган мен дээш маргыжар улус-тур бис.

С о г у н. Ындыг харын. Мен хөйнү кылган мен. Ынчангаш бо торлааның улуг кезиин мен чиир мен!

К и ж и. Ынчаарга кым хөйнү кылганын санап көрбээн улус силер бе?

Ч а. Аа. Чок, ол дээрge берге херек!

К и ж и. Чүге бергедээр чүвел?

Ч а. Мээн кылганымны кижи болган санап четпес хөй.

С о г у н. Мээнин база.

К и ж и. Че ындыг-дыр, ам дораан санаптар бис. Мен дээрge сан санаарда эреге бэзин тутпас кижи боор мен.

Ч а. Силерден улуу-бile дилээр-дир бис, бо маргылдааны үзе шиидип берип көрүнчөр, шацнаар бис.

С о г у н. Ындыг харын, бо торлаа эъдинден-даа алгай силер!

К и ж и. Шацналдың херээ чүү боор, эштерниң чаргызын-на чарып берзэ.

С о г у н. Мени Согун дээр ийин. Эжимниң ады – Ча.

К и ж и. Кончуг эки-дир, бирээндер Ча, бирээндер Согун. Че, ам сенден эгелээли, Согун, кылган ажылыңны чаңгысты-даа кагбайн чугаала. Ча, сен база бо Согундан чыдып калбайн, кылган ажылыңны соон дарый чугаалаар сен. Че, эгеле, Согун!

С о г у н. Бо чыткан торлаага мен барып дээп каан мен, улуг кезиин чиир мен!

Ч а. Бо чыткан торлааже согунну мен салыпкан мен, улуг кезиин мен чиир мен.

С о г у н. Өлген торлааны мен барып эккелген мен, мен шуптузун алыр мен.

Ч а. Торлааның дүгүн мен чулган мен, мен шуптузун чиир мен.

С о г у н. Торлааны мен буза кескен мен, мен шуптузун сыйтар мен.

Ч а. Одаар ыяшты мен эккелген мен, мен шуптузун ажырыптар мен.

С о г у н. Сугну мен эккелген мен, мен чиир мен.

Ч а. Мен от кывыскан мен, мен чиир мен.

С о г у н. Пашты ожукка мен тиккен мен, мен чиир мен.

Ч а. Пашче сугну мен куткан мен, мен чиир мен.

С о г у н. Пашче торлааны мен суккан мен, мен чиир мен.

Ч а. От көзээн мен көзээн мен, мен чиир мен.

С о г у н. Пашта эйтти мен андарган мен, мен чиир мен.

Ч а. Эйтти мен үлеген мен, мен чиир мен.

Согун. Торлаа мүнүн мен аякка куткан мен, мен ижер мен.

Ч а. Мен хөй дер үндүрген мен, мен чиир мен.

С о г у н. Мен база хөй дер үндүрген мен, мен чиир мен.

Ч а. Парыыл-туткууш чок, изиг паш эзер дээш холдарым хаарып алдым.

С о г у н. Мен база. Салааларым сугланы берди.

К и ж и. Ынчаарга кайыңдар-даа ажылга эп чок-тур сiler.

Чыткан сиғен-бile көвеглеп алган болзуңарза.

Ч а. Харын aan!

С о г у н. Шынап-ла!

К и ж и. Че, ам санай кааптаалы. Согун шак мындыг ажылдар кылган-дыр. Торлааны өлүрген, торлааны эккелген, торлааны буза кескен, суг эккелген, паш тиккен, пашче эйт суккан, эйт андарган, паш эсken, торлаа мүнүн аяктарга үлей куткан. Бирээ, ийи, үш, дөрт, беш, алды, чеди, сес, тос! Шупту тос болган-на-дыр! Шын-дыр бе?

С о г у н. Шын-шын! Мээции хөй.

К и ж и. Ам чаның ажылын санаалы. Торлааны салыпкан, дүгүн чулган, ыяш эккелген, от кывыскан, пашче суг куткан, от көзээн, паштан эйт эсken... Адыр-адыр база-ла тос болган-дыр.

Ч а. Канчап ындыг болган чоор, мен бодаарымга мээции хёй болган ышкаш чүве. Ам база эгезинден санаар бис бе?

С о г у н. Ынчаар-дыр. Мээн кылган ажылым черле хёй чүве.

К и ж и. Чок! Мээн чайым чок, кадарган малым ырай берди. Ам мынчаар-дыр.

Ч а. Канчаар?

С о г у н. Сүмележир харын. Дүлүп каан турзун. Ужуп чоруй баар эвес, манап чыдар болгай.

К и ж и. Силер маргыжар дээш могап-турупкан-дыр силер. Амдышызында бичии удуп, дыштанып алышар. Мен дагда хоюм бажын дозуп кааш келгеш, ынчан чаргындарны чарып берейн.

Ч а. Шын-дыр.

С о г у н. Ол чөп-түр.

Кижи үнүп чоруй баар.

Ч а. Ол кижи бистиц кылган ажылывысты дең кылдыр санады. Азы торлаавысты деңге үлжип чип алыр бис бе, Согун.

С о г у н. Чок, Ча. Мен-не хёйнү кылган мен, мен хёй кезиин чиир мен.

Ч а. Ынчаарга демги кижини манаар бооп тур бис ийин.

С о г у н. Манаар бис харын. Мен ыяап-ла улуг кезиии ап үнер мен.

Ча биле Согун удумзурай бээрлер. Оон база катай ковайып кээрлер.

С о г у н (*эзээш*). Чоп кончуг аштанчыг чоор, Ча. Иштим кыңгырткайнып тур. Сээн чугааң, шынаап-ла, шын ышкаш-тыр. Та келир кижи, та келбес кижи, торлаавысты деңге үлжип чип алышылам.

Ч а (*өжежип*). Мен хёйнү кылган мен, мен хёй кезиин чиир мен.

С о г у н (*база дедирленип*). Мен сенден дора мен бе?

Ча биле Согун эзеп-эзеп, хая көрнүп чыдып алгаш, удуй бээрлер.

Кижи кирип кээр.

К и ж и (*торлаа эъдин цзе соккулааш, чүк-чүкче октагылааш*). Эп-найырал чок, ажап-чиксек, ажыл-иш билбес чүве-

лерниң олчазын оран-делегейниң курт-кымысқаяа, ыт-кужу амырап чизиннер!

Хадың тозунда бижип каан бижикти одаг қыдынынга тургузур шанчып кааш, Кижи чоруй баар. Ча билем Согун оттуп келгеш, ол-бо көр-гүләш, торлаазы чок боорга, мөгүдеп эгеләэрлер.

Ч а (*дүңгүреп*). Согун, Согун, торлаавыс кайыл?

С о г у н. Демги ол кажар кижи деп амытанга мегеледип алганывыс ол-дур, Ча.

Ч а. Бисти мегелеп удуңар дәэш, боду сыйрыпкаш барганы ол-дур.

С о г у н. Кижилерге кым чарғы үстүрүп чораан, сәэн буруун.

Ч а. Сәэн хайың. Сен эвес болза кижини кым кыйгыра бәэр.

С о г у н. Ой, аштаар деп чүвемни.

Ч а. Мәэн база өзүм караңайнып тур.

Иеләэ узадыр эзээрлер.

С о г у н (*тоста бижикти көрүп кааш*). Бо чүү боор, Ча?

Ч а. Каям, бижик-ле-дир. Номчуп көрәэли.

И е л ә ә (*кончуг аяар номчуур*). «Найыралдыг чоруңар!»

С о г у н. Ол чүү дәэни ол, Ча?

Ч а. Найыралдыг чоруңар деп биске чагып кааны ол-дур, Согун.

С о г у н. Ол-даа шын бодал-дыр. Сен чогуңга мен-даа, мен чогумда сен-даа чурттап шыдавас-тыр бис. Кылыш ажылывыс база дең. Ынчаарга ам хей черге маргышкан херәэвис чул?

Ч а (*бодангаш*). Чырык чер кырында кижиден угаанныг амытан чок-тур!

С о г у н. Кижиниң чугаазын дыңнаал. Бис-даа болза, кижи чокта, ча, согун болуп шыдавас бис.

Ч а. Кижиге алдар!

С о г у н. Кижиге мактал!

Иеләэ ча, согун хевирилиг кылдыр туарлар.

КӨЖЕГЕ ХААР.

-
-  1. Чогаалда кандыг чугула бодал илереттинген-дир? Ук бодалды илереткен домакты чогаалдан тыпкаш, бижип алыңар.
-  2. “Аңчылар, ужа!” дәэн домак тыва улустуң кандыг чаагай чаңчылының дугайында чугаалап турарыл? Улуг улустан айтырып алыңар.
-  3. Белүктөрge хуваажып алгаш, шиини мультфильм хевирлиг кылдыр чуруп ажылдаңар.
-  4. Ча болгаш Согуннуң овур-хевириңге тыва улустуң кандыг үлегер домаан таарыштырып болур силер? Ук үлегер домакты чүгө кииргениңерни тайылбырланар.
-  5. “Чарғы” деп шииде көдүртүңген айтырыг эгे класска өөренип эрткен чогаалдарыңарның кайызынга дөмөйлөжир-дир? Орус литературада бо шииге дөмөй кандыг чогаалдар барыл, деңнеңер.
-  6. Торлаа күштуң дугайында шинчилел ажылышынан кылыңар.
-  7. “Кижи — угаанның амытан” деп чогаадыгдан бижиңер.
-  8. Дараазында сөстерниң уткаларын тайылбырлап бижип алыңар: *эреге, көзээр, парыыл, көвөглээр, ая, чөлбииш, туралык, даамыл.*
-

Екатерина ТАНОВА

Илбилиг согун

(Фантастиктиг чугаа)

КИРЖИКЧИЛЕРИ:

Мерген

Чеченмаа

Орлан Ондарович — башкы, ол ышкаш илбичи база келир үениң улуг кадарчызы.

Бичии кадарчы — база келир үениң школачызы.

Даш-Чалаң — тыва чогаалчы Салчак Токаның тоожузундан феодал.

Күү-Хам — хам.

Семис-Бай — чиижен садыгжы.

Таңныыл

Эпизодтарда: ыраажы, танцычы кыстар, чалчалар, экранда хөрөөжен.

Бирги көжеге

Бирги көргүзүг

Класс. Парталар. Класста Мерген биле Чеченмаа. Башкы оларны кичээл сөөлүнде арттырып каан. Чеченмаа кызып номчуттуунуп орар. Мерген ацаа шаптыктап, бодунуң кылып алган бумерангызын ыңдай-бээр октап, шенеп халып турар. Чеченмаа орта шыдашпайн, ону сывыртап, ооң бумерангызын ушта тыртып алыр дээш, кызып турар.

Чеченмаа. Чүге меңээ шаптыктап тур сен, Мерген, ол ыргак ыяжың бээр эккел, сый тудуп кааптайн!

Мерген (*өттүңүп*). Ыргак ыяш де! Бодуң ыргак ыяш сен ыйнаан. А бо дээргэ ыргак ыяш эвес, бумеранг деп чуведир. Арта-ла илбилиг дивес сен бе. Мону туралаан чериңче октапкаш, ооң соондан кайнаар-даа аян-чорук кылып болур сен. Эрткен-даа, келир-даа үеже бо сени чедирип болур.

Чеченмаа (*сонуурган*). Илбилиг бумеранг?.. Мен ындыг номну база номчаан мен. Бумерангыны база билир мен. Қаям, көргүс!

Мерген (*оожурган*). Че, көр даан. Дөмей-дир бе ынчаш?

Чеченмаа (*түдүп алгаш, топтан көрүп турар*). Бичии дөмей-ле хире-дир. Чүгле мону ам-даа бичии ээптер болза. Арай чедир кылбаан ышкаш-тыр сен.

Мерген. Чедир кылбаан деп че. Боду бумерангылап шаг болган-даа чүве дег. Чок! Бумерангым дыка шын кылдынган. Бо кайнаар-даа ужугуп болур! (*Оозун чайып маңнап, Чеченмаа ону сывыртап турар.*)

Башкы кирип кээр. Уруглар ону эскербес.

Башкы (*залче*). Көрүңер даан боларны. Бажыңга кичээл өөрөнмес боорга, класска өөренип алзыннар дээш, кичээл соонда арттырып кагдым. А олар кайы хире өөренип турарлар-дыр! (*Уругларга чеде бээр. Олары башкызын көрүп кааш, парталарынга олургуулап алыр.*) Че, кайы хире өөренип алдыңар?

Мерген (*бир номну бумерангызы-бile катай партаже чажырыпкаш, өске ном уштуп алыр*). Номчуп-ла ор бис, башкы.

Башкы (*Мергенге чеде бээр*). Каям, номуң көргүзем... Ол эвес аан. Парта иштинде номуң... (*Мерген оозун туражо-ок уштуп бээр*.) “Илбилиг бумеранг” – солун ном чүве харын. Мен база фантастикага ынак мен.

Мерген (*кайган*). Кай, силер база фантастикага ынак силер бе, башкы? Дыңнадың бе, Чеченмаа, башкы база фантастикага ынак-тыр!

Башкы. Ийе, ынак мен. Фантастика кижиинىң угаан-бодалын сайзырадырынга дыка ажыктыг. Бир чогаалчы «Фантазия чок кижи чалгыны чок күш-бите дөмей» деп чугаалаан-на болгай. Ынчалза-даа амдызызында бо номуңну шыгжап алгаш, кичээлиң кылзыңца эки боор. (*Чеченмаага*) Сен кайы хире өөренип алдың, Чеченмаа?

Чеченмаа (*хомуудаан цн-бите*). Номчуп-ла ор мен, башкы. Ынчалза-даа...

Башкы. Кандыг-дыр?..

Чеченмаа. Мен чанайн бе, башкы? Мени манап турлар боор...

Башкы. Мени база-ла манап турлар.

Чеченмаа биле **Мерген**. Силерни кым манап тур, башкы?

Башкы (*каттыргаш*). Силерниң кыдырааштарыңар-ла ыйнаан.

Чеченмаа (*чөгөнгөн дег*). Кыдырааштар бе... А мени эжим манап турага. Кино көөр дээн улус бис.

Башкы. Кинолаай-ла силер харын. Кичээлиң кылыш алгаш аан. “Ийи” демдектиг кинолаарга, кино кайын солун болур деп. Амдызызында кичээнгейлиг өөреницер. Тоожуда байларның овур-хевирин база байлар биле ядыыларның ылгалын тодарадып көрүцер. Эрткен үеде чон канчаар чурттап турган-дыр. А сен, Чеченмаа, ол тоожуда бичии кадарчы биле бодуңнуң мурнакчы кадарчы орден-хавыялалыг кырган-ачаңы деңнеп көр даан.

Мерген. Башкы, ол эрткен үени өөрөнгөш чоор боор. Ол феодалдар, байлар бодуңнуң үезинге артып-ла калгай, биске оларның хөрөө чүү боор?

Башкы. Хамык ужур чүгле оларда эвес чүве-дир ийин. Чүгле эрткен үезин билип албайн чыткаш, келир үеже буруңгаарлаары берге апаар. Ол дугайын бодаар чүве-дир ийин. Ам-даа өөреницер. Келгеш айтырар мен. (*Чоруптар.*)

Мерген. Хы, эрткен үе эрте-ле берди ыйнаан. Ону өөрөнгөш чоор боор. Ол үениң амыдыралындан биске ажыктыг чүнү кижи билип алыр боор. Хей чүве-дир ол! Хамык ужур сенде болду, Чеченмаажык! Бир эвес сен харыылап каан болзуңза, башкы мени тургуспас-даа ийик. Сәәң ужуңдан мен кичәэл соонда артып калганым ол-дур. Оон башка бөмбүк теп турбас мен бе.

Чечена. Доруунун моон! Сен кичәэлге таптыг харыылап каан болзуңза, башкы мени чааскаандырзымын арттырып қаар эвес. Мен харын сәәң ужуңда артканым ол-дур. Бөмбүк сүрүп, соңға бузуп турбайн, чүгө өөренип албаан сен. Сәәң бурууң-били кичәэл соонда артып, мында кичәэлдеп ораг...

Мерген. Өөрен харын, моон соңгаар “багай” албас сен!

Чечена. Бодуң өөрен! (*Холун чаңгааш, хая көрнүп олуруп алыр.*)

Мерген. Мен өөренип бе? Ч-о-о-к! Мен оон орнуунга музыка дыңнаайн.

Сумказындан бичии магнитофон уштуп келгеш, оозун ажылдадып, Чеченмааны электевишаан, танцылап турар.

Чечена (*музыкага алзып*). Кичәэл соонда уругларны арттырып қаары харын ёзулуг дарлал эвес чүве бе бо. Дашиб-Чалан-даа болза, кайыын уругларны мынчаар дарлап чораан деп! (*Тура халааш база танцылай бээр.*)

Мерген (*билииргөп*). Ийе, биеэде уругларны албадап өөрет-пес турган чүве-дир. Бодуунук туразы билир. Мәәң кырган-авам чугаалаан чүве, шаанда бис хире уруглар өөренип-ааранып-даа турбас, хой кадарып чоруур дээр чүве.

Чечена. Магалыын көрбес сен бе. Чайгы дыштанылгада кырган-ачам сүгга магалыг чүве чоржук. Хүнзедир хой чанынга хостуг ойнап чоруур. Рюкзак долдур аъш-чем, конфет-чиғир суп алыр, магнитофон азы приёмник дыңнаап орбас чүве бе.

М е р г е н. Чүү ындыг ажыл чувел ол. Хүнзедир хой эдерип, мелегей хураган эвес. (*Номун чайып.*) Менәэ бо номда ышкаш илбилиг бумеранг турган болза, туралаан-на черимче аян чорук кылып чоруптар мен.

Ч е ч е н м а а . Менәэ-ле сәэн ол илбилиг бумерангың турган болза, борта номчуттунуп, хилинчектенип орбайн, демги ол даш-чалаңнарга бодум чеде бергеш, караам-бile көрүп албас мен бе. Оон класска келгеш, ол хайлыг “ийини” эдип албас чүве ийикпе. Ол черле номчуттунарындан солун турган боор.

М е р г е н. Хайлыг-ла чүве-дир ам. Бистиң бо үеде чүге тоол шагда ышкаш илбичилер, магтар, джиннер чок чүве ыйнаан. Бир эвес мацаа илбичи чедип келгеш, илбилиг бумерангыны тутсупкан болза...

Ч е ч е н м а а . Оо, харын дедаан. Тоол шагның илбичизи көстүп келген болза. (*Кайызы-даа шимәэн чок бодангаш олуруптарлар. Тааланчыг музыка дыңналы бәэрge, ооң фонунда башкының циңгеге дәмей стереофониктиг цн дыңналып келир.*)

Ү н . Бистиң хүннерде база илбичилер бар болдур ийин. Силер чүнү күзеп тур силер, дәэрги үреннер?

Ч е ч е н м а а (отту чаштап келген ышкаш). Ой, бистиң башкывыс-даа чугаалаан ышкаш.

М е р г е н. Башкының эвес, илбичиниң үнү-дүр! Оо, буянныг илбичи, биске көстүп келем!

Кызыл торгу тоннуг, сүүр бөрттүг илбичи көстүп келир.

Ч е ч е н м а а . Ой, илбичи бо бе? Бистиң башкывыска дәмейин!

И л б и ч и . Силерни дыңнап тур мен, дәэрги үреннер.

М е р г е н. Буянныг илбичи, биске дузалап көр. Бо номда ышкаш илбилиг бумерангыдан биске берип көр.

Ч е ч е н м а а . Бис ооң дузазы-бile эрткен үеге четкеш келили. Ол үени бодувус караавыс-бile көрүп алыхсан тур бис.

И л б и ч и . Илбилиг бумеранг менде чок ийин. Ол Австралияда бар бооп чадавас. Силерниң бурунгуларыңар бумеранг ажыглавайн чораан. Харын илбилиг согун оларга турган. Ындыг согунну силерге берип болур мен, дәэрги үреннер.

Чеченмаа. Илбилиг согун! Ол мырыңай тулган-дыр!

Илбичи (*холдары-бile янзы-бүрц шимчээшкүн кылбышаан, кандыг-бир билдинмес сөстерни химиренген соонда, оон чеңинден кылагар согун көстүп келир*). Бо-дур, дээрги үреннер. Бо сilerни эрткен үеже чедире бээр.

Мерген. Чүгле эрткен үеже боор. Бис келир үеже чоруксап тур бис.

Чеченмаа (*Мергенниң чеңинден тыртып, аяар сымыраныр*). Канчап бардың, Мергешка! Баштай четтиридивис деп чугаалаалы. (*Деңге.*) Четтиридивис, буянныг илбичи! Ам кайгамчык согунувус-бile эрткен үеже чоруптаалы!

Мерген. Эрткен үеде кандыг солун чүве тураг чүвел. Ынаар баргаш чоор...

Чеченмаа. Чок, чүгле даш-чалаңнарже!

Илбичи. Ындыг-дыр. Эрткен үеге четкеш келиңер. Менди-чаагай! (*Чиде бээр.*)

Мерген (*согунну тудуп алган*). Чаражын көрем моон. Арта-ла эзир чүү-бile чүглөп каан. Ам моон-бile ужугуп ораал. Кайнаар-даа болза хамаан ийикпе. Харын сээн ол эрткен үенни барып көрээли, Чечен. Че-ве! (*Согунну салып үндүрерге, оозу ол-ла черинге кээн дүжер. База катап салырга, ол база-ла кээн дүжер.*) Бо кандаай чүвел?

Чеченмаа. Че, согунчугаш, ужугуптаалы че! (*Согунну салырга-ла, ол черге кээн дүжер.*)

Мерген. Илбичи бисти кыжыраан бе? Каям, иеләэн деңге чугаалаалы. Илбилиг согун! Бисти даш-чалаңнар чуртунче аппар! (*Согун шимчевес.*) Бо кандаай чүвел, буянныг илбичи?

Илбичиниң үнү (*каттырып тураг.*) Силер эрткен үеже дедир чоруп тур ышкаждың чүл. Ынчангаш согунга дедир-домактап айыткаар ужурлуг силер, дээрги үреннер. Мынча деп аан. Таптыг сактып алышар: «Билигил гунсо! Тибис чалаңдаш зинчеүе парап!» Бо илбилиг сөстерни сактып алышар. Билдинер бе?

Чеченмаа, Мерген. Ийе, билип алдывыс, буянныг Илбичи!



И л б и ч и . Ынчаарга ам, менди-чаагай!

У р у г л а р . Четтиридивис! Менди-чаагай!

М е р г е н (*согунну бедик көдүргеш*). Че, Чеченмаашка,
мээн-бile деңгэ чугаала!

Ч е ч е н м а а б и л е М е р г е н (*деңгэ оожум чугаалаар*).
Билигил гунсо! Тибис чалаңдаш зинчеүе парап!

Музыка. Мигалка. Сыылаан хат даажы.

Сумкаларын туткан уруглар согун соондан ужугуптар.



1. Башкы уругларны кичәэл соонда чүге класска арттырып
кааныл?

2. Башкының фантастиктиг чогаалдар номчуурунга сундулуг
болганы Мергенге чүге солун болган деп бодаар сiler? Кижиниң
сайзыраарынга фантазияның ажыктыын илереткен сөстерни
чогаалдан ушта бижип алыңар.

3. Илбилиг бумерангылыг болуксаар сiler бе? Чүгө?

 4. “Эрткен үезин билип албайн чыткаш, келир үеже бурунгаарлаары берге” дээн бодалды канчаар билип турар сiler? Ол дугайында чогаал сөзүглелин ажыглап тургаш, делгеренгей бижип харыылаңар

 5. Өске чоннарның хуулгаазыннаар бар тоолдарын азы көрген киноцарны, мультфильмнерицерни сактып көрүцөр. Кыска утказын бижип алыңар.

 6. Дараазында сөстерниң утказын словарьлар ажыглап тургаш, бижиңер: *бумеранг, фантастика, цреннер*.

Ийиги көргүзүг

Музыка («Адам каккан дүжүмет»). Хараганнарлыг хову. Ыракта өглер көстүп турар, өске талада кодан хой оъттап чоруур. Чеченмаа биле Мерген согунун тудуп алган көстүп келир.

Чеченмаа. Эрткен үе деп чүве бо ирги бе?

Мерген. Бо бооп чадавас.

Чеченмаа. Ээнзиргей деп чүвэзин аа. Шимээн-дааш-даа чок. Изиг деп чүвэзин. Суксаар деп чүвемни. Мороженое азы газировка болза. Бо чоокта киоскилер хамаанчок, хоорай, суурлар-даа чок чүве бе? Чүгле дөө ол кезек өглер турар чүведир.

Мерген. Бо уруглар деп амытаннарның мелегейин аар. Сээн бο эрткен үенге газировка азы мороженое турган деп бодаар сен бе?

Чеченмаа. Ындыг-даа ыйнаан але. Көрем, ойт, дөө хойну! Ооң чанында бичии оол кылаштап чор.

Мерген. Шынап-ла але. Ол оол-бile чугаалажып көрээлем. (*Кыйыгар.*) Эй, оол, бәэр келем! Бә-эр! Бәэ-р!

Бичии оолдуң үнү. Ынаар чүгө баар кижи мен. Мени канчаарыңар ол?

Чеченмаа. Бәэр кел даан. Сен кортпа. Сээн-бile анаа чугаалажырывыс ол-дур ийин. Бәэр кел даан.

Бичии самдар оол кирип келир. Ооң арнында корткан хевир бар-даа болза, уругларже элдепсинип кайгап турар.

Чеченмаа. Экии! (Ээлдек көрүп турар.)

Бичии кадарчы. Мендээ! (Холун тейлей туткаш, дискеек кырынга олуруп алыр.)

Мерген. Бо канчап тейлей бердиң? Бис бурганнар эвес-тир бис. Сен ышкаш уруглар-дыр бис.

Чеченмаа. Хөөкүйнү ай. Бистен кортпа даан.

Мерген. Сен эрткен үениң оглу-дур сен. Ындыг бе?

Бичии кадарчы. Та. Билбес мен. Сiler кайын келдицер? Дээрден дүжүп келдицер бе?

Мерген. Дыңнадың бе, Чеченмаа, бисти дээрден дүжүп келген деп бодап турар-дыр. Космостан aan. Бис дээрден дүшпээн, бо черниң уруглары-дыр бис ийин. Бо үениң aan. А сен эрткен үениң оглу ылап-тыр сен. А бо сээн кодан хоюң бе? Хөйүн аа...

Бичии кадарчы. Чок-чок. Бо байның хойлары-дыр. Мен ооң кадарчызы-дыр мен.

Мерген. Билдингир-дир. Сен дарлаткан пролетарий-дир сен. Че, ажырбас, өңүк, бис сени удавас хостап аар бис.

Бичии кадарчы (*коргуп*). Чок, чок! Мени хоставайн көрүцер, мен хой кадарып чорууйн, ол дээш кожайым мени чемгерип турар болгай. Мени хоставайн көрүцер, мен хойларымче барайн, кожайым билип кагза ажына бээр.

Чеченмаа. Хөөкүйнү. Кортпайн көрем. (*Оолду черден тургуза тыртып турар.*) Туруп көрем, бистен кортпа, сенээ бис дузалаар бис.

Бичии кадарчы. Дузалаар силер бе? (*Өөрүп.*) Мээн-бile кады хой кадаржыр силер бе?

Мерген. Кадаржып-даа болур бис. Чүнү-даа кылчып болур бис.

Бичии кадарчы (*өөрүп*). Ой, экизин! Амырадым.

Бинаар-ла бир черден конгуулурларның кыңгырашкан үнү, кударанчыг аялга дыңналып кел чыдар. Шупту ол талаже топтап көре бээр.

Мерген. Көрүцерем, тевелер дистинчиликен чоруп ор. Демги орук-ла-дыр але. Солунун, кинода-даа ышкаш. Бо база сээн кожайынның тевелери бе?

Би чи и кадарчы. Чок, бо қыдат садыгжының-дыр, талы-тырда Бээжин хоорайынче чанып бар чыдары ол-дур. Ол чылдың-на бо оруктап эртер, бистиң кожайывыска доктаар, орта найырлап дойлааш чанар кижи. Ам база кел чыдары ол-дур.

Мерген. Тевелерниң чүткүнүң аарын, чүнү чұдуруп каан ирги?

Би чи и кадарчы. Чүү чок дәэр сiler: аң, өлүк, алдын-мөңгүн дәэш чок-ла чүве чок дәэр чүве.

Мерген. Аттыг-ла бай кижи-дир аа. А ол бүгүнү қайыын тып алганы ол?

Би чи и кадарчы. Шай, таакпы, даалымба-бile араттардан орнап алган барааны-дыр ийин. Улус ынча дәэр чүве.

Чеченмаа. Магалыг-ла чүве-дир. (*Каттыrap*.) Бир хап сигарета-бile авамга бөрт кылыр киши орнап ап болур ышкожыл. Ой, көрүңдерем, тевелер соонда бичии оол асқаңайып кылаштап чор.

Би чи и кадарчы. Өскүс оол-дур. Мен ону билир мен. Байның тeve сүрер кижизи-дир ийин. Идиин үзе базып алганы ол ыйнаан. Идиктиг турған болзумза, хөөкүйге уштуп бәэр ийик мен.

Чеченмаа. Ындыг бичии кижиғе канчап тeve сүрдүрер чүвел. Улуг улустан хөлезилеп алза.

Би чи и кадарчы. Улуг кижиғе хәй хөлези төләэр апаар болгай. Ол оол аңаа халас ажылдаپ бәэр. Кончуг кажар садыгжы деп чугаалажыр чүве.

Мерген. Пекин чедир чадаг кылаштап деп чүү кончуг чүве. (*Буттарынче көргеш*.) Бажында чаа кроссовкаларымны маңаа кедирип кагза. Ол дыка быжыг идиктер-ле болгай. Ох... (*Хаваан түттүнар. Кайда турарын сактып келген*.) А бо тевелериң кайыл ынчаш?

Би чи и кадарчы. Дөө сөөлгү тевениң кырында улуг майғынны көрүңдер даан. Ында удуур орну безин бар. Көрдүңдер бе, тевелер аал чанында доктаай берди.

Чеченмаа. Ой, көрүңдер даан, тeve кырында майғындан кижи дүжүп кел чор. Қандыг кончуг чоон кижи боор.

Би чии кадарчы. Ол-дур, тевелерниң әэзи бай садыгжы. Көрбес силер бе, ол ам бистиң кожайның өөнчө бар чыдыр.

Чеченмаа. Каас деп чүвезин але. Ол чүнү аксынче киир каап чорууру ол, тоорук ирги бе?

Би чии кадарчы. Үзүм-чиギр-дир ийин. Ол черле ындыг кижи чораан, даады-ла аксынче үзүм-чигири киир каап, дайна-нып чоруур. Ол үзүмнүң чаагайы та чүү хире чүве, чыдының суг чаагайын. Мен ол үзүм деп кат-чигири амзап-даа көрбээн мен.

Чеченмаа. Кай, сен ол изюм дээр кат-чигири амзап көрбээн сен бе? Ынчаарга бис сеңээ ону ол садыгжыдан садып берээл, менде акша бар, авам эртен хуужуур садып чиир сен дээш берип каан чүве...

Мерген (*карманын үженеп*). Менде база акша бар. Барып садып берээл.

Би чии кадарчы. Ой, ой, херекчок! Садыгжы кожайга чугаалаптар. Ол менин ат кылыш.

Чеченмаа (*элдепсинеп*). Чүү дээш ат кылыш чүвэл? Бис сеңээ сартыктаарывыс ол ышкаждыл.

Би чии кадарчы. Хоржок, хоржок, ынаар барбаңар...

Чеченмаа. А мен суксап тур мен.

Би чии кадарчы. Суксап тур силер бе, дөө ол бистиң өглеривиске баргаш, хымыстан ижип алышар. Соок хымысдыка эки болур чүве. А мен хоюмче чоруптайн. (*Чоруптар.*)

Чеченмаа. Байырлыг, би чии кадарчы!

Мерген. Ужурашкы же, өңнүк! (*Чеченмаага.*) Ам дөө өглерже бараалам. (*Уне бээрлер.*)

Үшкү көргүзүг

Байның өө. Каас-шиник өгде хевистер, алдынналчак эт-сеп. Дөрдеширээ артында Дашиб-Чалаң биле кыдат садыгжы арагалап, чөмненген. Аныяк каас кыстар оларга бараалгап, өгнүң бир талазында хөгжүмчүлөр аян туткан. Кыстар аяар ырлашпышаан, аъш-чемни эккеп салып турар. Өгнүң бир талакы адаккызын сериин болзун дээш өрү көдүрүп

каан. Оортан өг чанынга чедип келген Мерген биле Чеченмаа өгде чүү болуп турарын кайгап көрүп турарлар.

Чеченмаа (*аяар*). Кандыг кончуг каас өг боор! А ол кыстарның чараштарын! Артистер-ле-дир. Музыканың тааланчының көрем. Демги тевелерниң ээзи садыгжы база дөө олур ышкаждыл.

Мерген. Оожум. Дыңнап кааптар. Чүнү канчап турар эвес, таптыг көрээли.

Даш-Чалаң (*садыгжы же аяан сунмушаан*). Чооглаңар, дээрги, чооглаңар. Даш-Чалаңның бажын ашкан малы, эктин ашкан эди турда, Силер ышкаш дээргилер чооглаарының магазы-бile чооглас, хүндүледирииниң магазы-бile хүндүледип турбайн канчаар, чооглаңар. А бо мээн албатыларым кыстарны көрбес сен бе, кайы хире-дир! Силерге бараан болуп тур, көрүнчөр даан!

Чеченмаа. Дыңнадың бе, Даш-Чалаң мен дидир (*портфелин ажыткаш, оон номун ап номчуй бээр*). Ол-дур. Шынап-ла, Даш-Чалаң-дыр!

Мерген. Оожум! Чүгэ алгыра бердиң? Көрбээн чүвең көрүп каан дег. Таптыг көрээли...

Даш-Чалаң. Бажым ашкан малдыг мен, эктим ашкан эттиг мен. Болаа-кавыда менээ чедер бай кижи чок! Чалчаларым, хөлечиктерим-даа эндерик! Эй, ядараан хөлечиктер! Дүүн мээн анайымны кым бөрүгө тудуп берипти? Мээн бажын ашкан малымдан чаңгыс кодур анай-даа хоравас ужурулуг! Анайымны кым бөрүгө сартыктапты? Ону доп-дораан бээр эккелицер! Дүрген дидир мен! Ол кулугурну канчаар эвес мен!

Уругларның ужурашканы Бичии кадарчыны чалчалар өгже киир сөөртүп келир. Бичии оол коргуп-сүртээн, байның мурнуунга тейлеп чыдыптар.

Аа, сен сен бе, кончуг хоютку! Ол мээн багай анайымны бөрүгө өжегээр тудуп бердиң бе аа? Ол көк бөрүнүң сартынын амзаар дээш ынчалдың бе? Уу, кончуг хоюткуну канчаар эвес мен! (*Хана доразындан савааш алгаш, база ханадан кымчы алгаш, бичии оолду кымчылай бээр. Чалча кыстар коргуп, оолду*

өршээрин дилеп, чаннып турар. Даши-Чалаң оларже дүрзүн-циг көргеш, кымчызын арнып каарга, олар өгден сывырлып үнебээр.)

Бичии кадарчы. Ой, ой, күжүр кожай, өршээп көрүңер! Кайын өжегээр тудуп бээр ийик мен. Ол көк бөрү мени хоютку шаанга-даа бодавады. Алгырып-кышкырып турумда-ла, мени ужур базып каар часкаш, анайны чуктепкеш, шимеш диди. Ой, ой, өршээп көрүңер! А-ва-ай!

Даш-Чалаң (*кымчылавышаан*). Кончуг хоютку! Хоютку шаа-даа четпес чүве! Ол көк бөрү сени аппарган болза, харын амыраар ийик мен! (*Улам-на эттей бээр. Бичии кадарчы ушта цүктүп, дуза дилеп турар. Мерген биле Чеченмаа шыдашпайн өгже кире халчыр.*)

Чеченмаа. Ой, кончуг фашистер! Ол бичии кижини чүгэ дарлап тур сiler?! Доп-дораан соксаңар, ам дораан шагдаа долгаар бис!

Мерген. Кончуг маңгыстар! Сilerни анаа салбас бис! Көрүп тур сiler бе, бо мээн биледимни! (*Карманындан билет уштуп көргүзөр.*) “Шагдааның аныяк өңүү” деп биледим бо-дур! Ам дораан шагдаа машиназы долгаар бис! (*Кожайлар сербээдеп, чүнүң-даа аайын тыппайн баарлар. Бичии кадарчы хана доразынче сиңны бээр.*)

Даш-Чалаң (*девидеп*). Хайырааты! Бо чүү болду? Чүү мындыг азалар өгде кирип келди? Чүнү чулчуруп турарлары ол, сөс-домаа-даа орта билдинмес. Чүнү долгаар деп турарлары ол, кулак бе, кудурук бе?...Бо кымнаар дээр сiler? Ол холдарында калбак кара чулери ирги, бирээзиниң холунда согун хевирлиг чүве-даа бар...

Чеченмаа. Көрем, Мерген, бистиң сумкаларывысты калбак кара чүвелер дидир. Ону безин билбес улус бе. Ол магнитофонун ужулгаш, ажылдадывыйт, болар дыңназын!

Мерген. Шынап-ла. (*Магнитофонун ужулгаш, ажылда-дылтар.*)

Өг иштинге музыка динмиттели бээргэ, дээргилер коргуп, девидеп, орун-дөжек адаанче баштарын чажырып чоруй, музыка адаа-бile

танцылап турган Мерген биле Чеченмааны көрүп кааш, оларның әзининге алзып, боттары база сырбаңайчып танцылап, чалча қыстар болгаш өске-даа улус шупту “твиштеп” туруп бээрлер.

Даш-Чалаң. Оммани патни хом! Оммани патни хом! Ёо, ўёо, бажым оорлур четти! Бо азаларны өгден ырадып көрүңер! Кую-Хам, Кую-Хам! Кую-Хамны қыйгырыңар! Кую-Хам! Бо азаларны аал өдээнден ырадып көр!

Дериг-дүңгүрүн кеткен хам алғырып, дүңгүрүн хап кирип кээр. Ол дүңгүрүн уругларның баштарының қырынга хап, уруглар ону хөк бодап, ооң дүңгүрүн барабаннай кагылап турар.

Күү-Хам (*дүңгүрүн какпышаан алганып турар*):

Аалда келген, оой, амытаннар
Аза-четкер, оой, эвес-тирлер.
Черден үнмээн, оой, дээрден дүшпээн,
Черле бо чер, оой, төлдери-дир.
Кожай, байлар, оой, коргуткулаан,
Кончуг тенек, оой, үреннерил,
Хайжоктарны, оой, опчоктарны
Канчаптарыл, оой, сүмеленцер!

Садыг жы. Дыңнадың бе, кожай, хам боду бистен аргасуме айтырып тур ышкаждыл. Бо амытаннарны канчаар деп бодай-дыр сен?

Даш-Чалаң. Оларны бис канчаптар бис. Хам кижи бодула билгей. Моең хам болган херээ чүл. Кую-Хам, бо азаларың дүрген аал өдээнден ырат!

Күү-Хам (*дүңгүрүн какпышаан*):

Дээрже үнер, оой, черже кирер,
Дедир чоруур, оой, оруу чок-тур.
Хайжок тенек, оой, үреннерни
Канчаптар мен, оой, чооптар мен...

Мерген. Чеченмаа, туттун! Бис чалчалар болбас бис! Бис өске үениң уруглары-дыр бис. (*Самбо, каратэниң бүгү-ле аргалары-бile демисежип турар.*)

Чеченмаа. Мерген, бодувус үевисче дүрген чоруптаал, со-гунга чугаала!.. (*Чеченмааны үндүр сөөртүү бээрлер.*)

Дөрткү көргүзүгнүң кыска утказы

Бичии кадарчы уругларны хостап алыр дээш, таңныылга уйгу-сиген чулуу ижириптер. Уруглар хананы узун курусук ыяш-бile өryу быралапкаш, үne бээрлер. Мерген бичии кадарчыга “Ам бистиң-бile кады чорувут, бис сени интернатка тургузуп каар бис... Бисте дарлакчылар чок болгай. Канчап черле бо эрткен үеге чурттаар боор” деп сүмелээрge, ол ынавас”. Мээн кожайым ат кылыш, авамны база каап шыдавас мен. Силер та кайнаар баар улус силер, коргар мен” дээр. Чеченмаа биле Мерген дедир бодунуң үезинче чоруур дээрge, илбилиг согуну чок боор. Ону бичии кадарчы билбейн кожай ону “ырадыр октавыт” дээрge, ынаар, шыргай, теннинг хараганнаар аразынче шывадапкан боор. Уруглар ону дүрген тып алыр дээш, үne бээрлер. Таңныыл оттуп келгеш: “Э-эй! Э-эй! Дүрген бээр келиңер! Аза төлдери дезе берген-дир. Бээр! Бээр!...” деп алгырып тураг.

Авансцена. Мерген, Чеченмаа, Бичии кадарчы кирип келирлер. Караңгылаашын.

Мерген (*хомудааны аажок*). Ол бистиң согунувусту кайнаар октапканың ол ирги? Теннинг хараган аразынче чүткүп кирер дээш, хол-будум-даа артпады. Бисти ат кылганың ол-дур ийин.

Бичии кадарчы. Таптыг дилээр болза, тыпты бээр-дир ийин.

Чеченмаа. Катап барып дилээлицерем, Мерген.

Мерген. Ам ону дилээр чай чок-тур. Бисти сүрүп кел чыдырлар, дыңнавайн-дыр силер бе? (*Ыракта сүрүкчүлөрниң шимээни дыңналып кел чыдар.*)

Чеченмаа. Ат-ла болду! Чүнү канчаарыл? (*Номун кончуг дүрген ашкылааш, номчуй бээр.*)

Мерген. Номчуттунуп алган мону-даа. Сүрүкчүлөр мыядада кел чорлар. Ам чүгле тулчур болган-дыр бис.

Чеченмаа. Ийе, бо номда ынча дээн-дир! Партизаннаар тулчуп кирипкен-дир! Ах, кайыын чепсек тып алышыл?

Мерген. Ах, боо-чепсек турган болза... О, Буянныг илбичи! Дузалап көр! Бергедей бердивис!

Илбичиниң стереофониктиг үнү дыңналыр.

Үн: Кундустугнуң баарында, Дерзигниң эриинде кончуг аyttar девиржип, каң селемелер кыңгырткайнып тур!

Чеченмаа. Ой, бистиң башкывыс чугаалап тур!

Мерген. Илбичи-дир! Дүрген! Ол аyttарны барып мунуптаалы!

Бичиң кадарчы. Дүргедендер, сүрүкчүлөр чоокшулап ор!
Чеченмаа. А сен?

Бичиң кадарчы. Мен артып қалыйн. Кожай ажына бәэр.

Чеченмаа. Бистиң-бile баар ужурлуг сен. Бо номда ынчап бижәэн-дир.

Мерген. Кортпа. Бис партизаннар-бile сени хостап алыр бис.

Бичиң кадарчы. Чок, чок, мени хоставайн көрүңер!

Чеченмаа. А бо номда бичиң кадарчы партизаннарга дузалажып турган-дыр. Ынчангаш сен база бистиң-бile кады дайылдажыр ужурлуг сен, дүрген чоруулуңар!

Мерген биле Чеченмаа Бичиң кадарчыны алгаш чоруптарлар.

Бешки көргүзүг

Уругларның баштай келгени хараганннарлыг ээн хову. Хараганнар аразы-бile Даң-Чалаң, Садыгжы, Куу-Хам болгаш өскелер-даа ажынган, хорадаан чоруп орарлар.

Даш-Чалаң. Дезипкеннери ол-дур! Мәэң кадарчымны база эдертип алганнары ол-дур, хой ээн оъттап чор.

Садыгжы. Чаа чалчаларым дезе берген. Шуут-ла думчук адаандан дезе берген. Чалчаларым...

Куу-Хам. Дээргилер, оожургаңар, харын-даа ол ужу-бажы билдинмес амытаннар арлы бергени ол-дур. Оон башка канчап билир, чүү болурун. Самдар кадарчыны аппарган-дыр, багай-дыр, баргай аан, оон хайыраатының ара-албатызы дудай бәэр эвес. Ажырбас он, хайыраатылар. (*Дүңгүрнү хан, алганып турар.*)

Аайы-бажы, оой, билдинмester
Аалыңардан, оой, ырай берзин!

Ажынмаңар, ой, дарынмаңар,
Аалыңарже, ой, чаңгылаңар!

Музыка, аyttар даванының даажы, чүген-суглук, селеме кыңгырааны дыңналып келир. Сүрүкчүлер аайын тыппайн кайгап турда, будёновка бөрттерлиг, селемелер туткулаан Мерген, Чеченмаа, Бичии кадарчы кире маңнажып келир.

М е р г е н. Ура-а! Бурунгаар! Тулчууушкунче! (*Шупту тулчуп кириптер: Мерген Даш-Чалаң-бile, Бичии кадарчы Садыгжы-бile, Чеченмаа хам-бile — танцы-сам азы каратэ, бокс хевирлиг тулчуп турап.*)

Д а ш-Ч а л а ң. Аyttарым! Аyttарым! Олар мээн аyttарым мунгулап алганнар-дыр!

С а д ы г ж ы. Тевелерим! Тевелерим! Алдын-мөңгүнүм кайда барды! Ой, чалчаларым, соксап көрүцерем!

К у у-Х а м. Ой, аза-буктар, арлып көргер! (*Чеченмаа оон дүңгүрцин барабаннай каap, хам дүңгүрци-бile щит ышкаш камгаланып турап.*)

Д аш - Ч а л а ң, С а д ы г ж ы, К у у - Х а м дезиптерлер. Уруглар оларның соондан кезек сывыртааш, сценаның еске талазындан үнүп келирлер.

М е р г е н (*чоргаар*). Че, ол-дур, дарлакчыларны тиилеп кааптывыс. Ам тиилээн соонда, бурунгаарлаар, ол-ла! Аян-чорукту ам-даа уламчылаарынга белен мен!

Ч е ч е н м а а (*арай бодамчалыг*). Ам кичээливис кылзывысса!

М е р г е н. Хы, ам кәэп кичээл сактып. Ол чүзүл мооң. Хей чуве!

Ч е ч е н м а а. Канчап хей боор чувел?

М е р г е н. Хей! Ол кичээл кылыр дээш, мынчаар кызып, дайылдажып турган улус бис бе? Чо-ок! Номчуттунуп, шээжилеп орбайн, оон ыңай бурунгаарлаар, ол-ла. Башкы чүү дээн ийик, “Эрткен үени билип албайн чыткаш, келир үеже бурунгаарлаары берге” дээн ышкаждыгай. А бис эрткен үени билип алдывыс. Ынчангаш ам чүгле бурунгаар — келир үеже!

Ч е ч е н м а а. А “багайларны” этпес болза, дөмей-ле хоржок!

Мерген. Сагыш човава! Ол келир үеде бисти “Багайларыңар бар бе, чок бе?” деп, кым-даа айтырбас ужурлуг. База бисти туралааны-бile кылыр, хереглээни-бile алыр дээр чораан. Азы сенээ ол үе багай-дыр бе?

Чеченмаа. Чүге багай боор ийик аан ...

Мерген. Ынчаарга ол-ла, келир үеже!

Чеченмаа. Че, келир үеже болза, келир үеже-ле ыйнаан. Чүгле илбилиг согунувус чок ышкаждыгай, канчап чоруур бис?

Мерген (*хаваан часканып*). Шынап-ла. Уттуukan-дыр мен. Ам канчаар улус боор бис. Оо, Буянныг илбичи! Кайда сен, чүну канчаар бис, дузалап көр!

Илбичи башкының чаңгыланчак үнү дыңналып кээр.

Үн: Илбилиг согунуңар тып алыңар! Илбилиг согунуңар тып алыңар!

Чеченмаа. Оо, бистиң Буянныг илбичивис!

Мерген. Буянныг илбичи! Согун дилеп турар чайывыс чогул. Бис келир үеже далажып тур бис. Оон аңғыда ол тоол шагның илбилиг согуну келир үеге таарышпас боор. Чaa чүведен тып, дузалап көр!

Буянныг илбичиниң үнү: Че, сilerний-бile болгай аан, дээрги үреннер!

Илбичи боду көстүп келир. Ол холунда чуга ак-көк шывыг-плаштар тудуп алган.

Илбичи. Мону эштип алыңар!

Мерген. Ой, бо дээрge “Илбилиг бумеранг” деп номда шахо деп антигравитациялыг плаштар эвес бе, Буянныг илбичи?

Буянныг илбичи. Ийе, ол плаштар-дыр.

Мерген. Четтиридивис, Буянныг илбичивис! Чеченмаа, ам-на бо шахоларывыс-бile чоруптаал! (*Плаштарны кеткилеп аар.*) Ам ол келир үеге таптыг селгүүстеп чорбас бе. Ында бисти кым-даа кичээл өөреницер деп албадавас. Дүрген ужуптаалы!

(Илбичи залда көрүкчүлөрже көргеш, караан базып, хүлүмзүүрүп каар.)

Чеченмаа (*азыгда сыңны берген турган бичии кадарчыны көргеш*). А Бичии кадарчыга плащ чок ышкаждыл, ам канчаалыл? Ону маңаа кааптарызыска хоржок болгай.

Илбичи. Бо чалгаа эвес хире оол-дур. Ол илбилиг согуннұтып аптар боор. Кандыгыл, тып ап шыдаар сен бе, Бичии кадарчы?

Бичии кадарчы. Ыяап тып алыр мен. Ынчангаш карак чивеш аразында силерге чеде бәэр мен.

Илбичи. Эр хей, Бичии кадарчы! (*Көзүлбейн баар.*)

Мерген. Че, ам байырлажып алышыл, өңнүк! (*Холун сунуп турар.*)

Чеченмаа. Байырлыг! Артып калғаның харааданчыг-дыр.

Бичии кадарчы. Байырлыг! Сагыш човаваңар, силерниң согунаңарны тып алыр мен! (*Мерген биле Чеченмаа чоруптар. Бичии кадарчы холун чайып туруп каар.*)

Караңгылаашқын.



1. Чечен биле Мергенниң әрткен үеже аян-чоруу кандыг болған деп бодаар силер?



2. Чогаалда хамнарны канчаар көргүзүп каан-дыр? Лама, хамнар дугайында силерниң бодалдарыңар кандыгыл?



3. Фантастика темазынга бижиттинген кандыг шиилер, кинолар билир силер?



4. “Твист” деп самның кандыг болурун улуг улустан айтырып алгаш, тайылбырлаңар. Оон еске кандыг сам билир силер?



5. З-кү әгеге аттан чогааткаш, ооң кол бодалы кирген домакты айтыңдар.



6. “Әрткен үениң бичии кадарчызы” деп темалыг қыска чогаадыгдан амғы үе-бile деңнеп турғаш, бижиңер?



7. Бәэжин хоорай дугайында чүнү билир силер?



8. “Чеченмаа биле Мерген әрткен үеде” деп презентациядан кылгаш, камгаланаңар.



9. Шииде улустуң аас чогаалынга хамааржыр чижектерни ушта бижәеш, кайы аймакка хамааржырын бадыткап бижиңер.



10. “Шииден сонуургаан әгем” деп шилилгелиг аас чугаадан кылышыңар. Планын тургузуп алышыңар.

 11. Дараазында сөстерниң уткаларын бижиңер: *чооглаар, көгээржик, агбай, сартык, хөөгөт, хоютку, чөлбииш, тұрамық, даамыл.*

12. Кайы үениң киңизинге дөмей болуксаар силер? Чүгे?

13. Чаа үениң уруглары биле кадарчы оолдуң аразында кан-
дығ ылгалды эскердиңер? Харыларыңарны қыдыраашка бижип
алыңдар.

НОМДА КИРГЕН АВТОРЛАР ДУГАЙЫНДА НЕМЕЛДЕ ТАЙЫЛБЫР

Салчак Калбакхөрекович ТОКА — тыва литератураның үн-дезилекчилериниң бирээзи. Ооң “Араттың сезү” деп чогаалы үш номдан тургустунган. Ол делегейде сурагжаан тыва чечен чогаал. Делегейниң 21 дылдарында очулдурутунган болгаш тыва чоннуң амыдырал-чуртталгазын, төөгүзүн өске чоннарга таныштырып чоруур.

Бо өөредилге номунда бирги номнуң «Тос чадырда» деп ке-зээниң «Мерген», «Тас-Баштыг», «Шаагай» деп эгелерин база ийиги номнуң “Аас-кежии кайдал” деп кезээниң “Чаа ужу-ражжышкыннар” деп эгени киирген. Чогаал-бile ханы та-ныжылгацар улуг класстарга болур.

Светлана Владимировна КОЗЛОВА 1933 чылдың февраль 21-де Москвага төрүттүнген. Москванды М.Ломоносов аттыг Құруне универсидединиң журналистика факультетин дооскан. Шүлүкчү, очулдурукчу, журналист. Аңғы-аңғы чылдарда үнген 8 номнарның автору. С.Сарыг-оолдуң, С.Пюрбюнүң, М.Кенин-Лопсанның, Ю.Кюнзегештиң, К.Кудажының, Е.Танованың, А.Даржайның болгаш өске-даа тыва чогаалчыларның шүлүктөриң орус дылче очулдурган. С.В. Козлова ССРЭ-ниң “Иениң алдары” ордениниң эдилекчиizi, хөй уругларның иези, Тыванды Комсомол шаңналының лауреады, Тыва АССР-ниң культуразының алдарлыг ажылдақчызы.

С.В. Козлова 1997 чылда мөчәэн.

Салим Сазыгович СҮРҮҢ-ООЛ 1924 чылдың апрель 15-те Барын-Хемчик кожууннуң Акка төрүттүнген. Қызылдың күрүнениң педагогика институтун дооскан. Шүлүкчү, прозачы, очулдурукчу.

Чогаал ажылын 1946 чылда эгеләэн. Чәэрби ажыг номнарның автору. Ооң чогаалдары ССРЭ-ниң улустарының дылдарынче очулдурутунган.

А.Пушкинниң, М.Лермонтовтуң, П.Ершовтуң болгаш өскелер-ниң-даа чогаалдарын тыва дылче очулдурган.

Салим Сазыгович Сүрүн-оол Тыва АССР-ниң алдарлыг чо-гаалчызы, Тываның Комсомол шаңналының лауреады, ССРЭ-ниң Чогаалчылар эвилелиниң кежигүнү, Тываның улустуң чогаалчызы.

С. С. Сүрүн-оол 1996 чылдың апрель 10-да мөчээн.

Михаил Монгушович Дуюнгар 1952 чылдың апрель 2-де Барын-Хемчик кожууннуң Акка төрүттүнген. Кызылдың эмчи училищезин дооскан, Москвада М. Горький аттыг литература институдун дооскан. Шүлүкчү, прозачы, очулдурукучү, журналист. Чогаал ажылын 1980 чылдарда эгелээн. “Бөрү дүнү” (1991), “Харда чечектер” (1993), “Хөлөгелер” (1996) “Карактарда чаштар” (2012). Чогаалдары орус дылче очулдуртунган.

М. Дуюнгар Россияның Чогаалчылар база Россияның журналистер эвилелдериниң кежигүнү.

1996 чылдың июнь 21-де мөчээн.

Хөвөңмөй Монгушович Ойдан-оол 1938 чылдың октябрь 25-те Чөөн-Хемчик кожууннуң Дағыр-Шемиге төрүттүнген. Кызылдың күрүнениң педагогика институдун дооскан, Москвага журналистерниң дээди курсарынга өөренип чораан. Прозачы, очулдурукучү, журналист. Орус, алтай, моол чогаалчыларның чогаалдарын тыва дылче очулдурган.

Х.М. Ойдан-оол ССРЭ-ниң Журналистер эвилелиниң болгаш Тываның чогаалчылар эвилелиниң кежигүнү.

2010 чылда мөчээн.

Монгуш Баянович Доржу 1939 чылдың ноябрь 10-да Өвүр кожууннуң Солчурга төрүттүнген. Москвада М.Горький аттыг литература институдун дооскан. Шүлүкчү, прозачы, очулдурукучү.

Чогаал ажылынч 1958 чылда кирген. “Сында оттар” (1965), “Ынакшыл” (1968), “Хөрлээ” (1972), “Суг-чинчилер” (1989), “Өшпес кезек оттут чечек” (2009) деп шүлүктер чынындыларының база “Сыргалар” деп новеллалар чынындызының автору.

Сергей Пюрбю аттыг литература шаңналының лауреады.

Д.Б. Монгуш 1992 чылдың апрель 9-та мөчээн.

Александр Александрович Даржай 1944 чылдың ноябрь 3-те Сүт-Хөл кожууннуң Суг-Аксынга төрүттүнген. Шүлүкчү, прозачы, драматург, очулдурукучү.

Чогаал ажылын 1964 чылда эгелээн. Ооң бижээни үжен ажыг шүлүк болгаш проза номнары тыва, орус, алтай дылдарда үнген. А.Пушкинниң, А.Грибоедовтуң, М.Лермонтовтуң, Т.Шевченконуң, С.Есенинниң, А.Адаровтуң болгаш өскелерниң-даа чогаалдарын очулдурган. Түрк дылдыг чоннарның эрте-бурунгу чогаал эртинези болур “Күл-Тегинге тураскааткан Улуг, Биче бижимелдер” болгаш Тываның девискәэринден тывылган көжәэлдерде бижиктерниң тыва дылче уран-чечен очулгаларын кылган.

А.А. Даржай — Тываның улустуң чогаалчызы.

Салчак Бүрүшкекович МОЛДУРГА 1936 чылдың декабрь 12-де Мөңгүн-Тайга кожууннуң Мугурга төрүттүнген. Кызылдың күрүнениң педагогика институтудун дооскан. Шүлүкчү.

Чогаал ажылын 1953 чылда эгелээн. Он ажыг номнарның автору.

Тываның Чогаалчылар эвилелиниң кежигүнү, Тыва АССР-ниң культуразының алдарлыг ажылдақчызы.

М.Б. Салчак 2012 чылда мөчәэн.

Екатерина Туктүг-оолвна ТАНОВА 1930 чылдың март 27-де Сүт-Хөл кожууннуң Кара-Чыраага төрүттүнген. Абаканның башкы, Кызылдың педагогика институттарын дооскан. Москва-га Партияның Дээди школазының журналистика факультедин дооскан. Төөгү эртемнериниң кандидады. Журналист, шүлүкчү, прозачы, драматург.

30 хире шүлүк болгаш проза номнарның автору. Е.Танова Тыва Республиканың Құрұне шаңналының лауреады, Тываның Улустуң чогаалчызы.

Иван Андреевич КРЫЛОВ 1769 чылда төрүттүнген. Улуг орус чогаалчы, басня бижикчи, очулдурукчу. 1809–1843 чылдарда 200 ажыг чечен-мерген, шоодуглуг, шүгүмчүлекчи уткаларлыг басняларны чогааткан. Ук басняларда нийтилелдиң четпестерин болгаш кижилерниң аажы-чаңының, мөзү-шынарының төлөп чок талаларын кочулап, шооткан.

И.Крыловтуң баснялары тыва дылче очулдурутунган.

И.Крылов 1844 чылда мөчәэн.

Шээжилээр чогаалдар

- 1.“Тооруктуг долгай таңдым”.
2. Шилилге-бile бир ыры.
3. Оран-таңдыга чалбарыг.
4. С.Сарыг-оол “Күс”.
5. С.Тока “Араттың сөзү” (“Мерген” деп эгеден үзүндү).
6. К-Э.Кудажы “Маргылдаа”.
7. М.Доржу “Экии, Тывам!”.

Немелде номчулгага хереглээр чогаалдар

Улустуң аас чогаалындан:

Делегейде (Тывада, Моолда, Кыдатта) чурттап чоруур тываларның улустуң ырлары “Конгурай”, “Дошпuluурум”.

“Кыс-Халыыр” (шилип номчуур).

Авторлуг тоолдар: С. Сарыг-оол «Чырык-Мерген Маадыр», Л. Чадамба «Азас дугайында чугаалар», С. Сүрүң-оол «Оорну кым тутканыл?», М. Эргеп «Алдыртпас Агына». Н. Куулар «Дөрт тыныныг Алдай-Чечен дугайында ыр».

Тыва литературадан:

С.Сарыг-оол “Аңгыр-оолдуң тоожузу” (бирги номдан эгелер), Л.Чадамба «Ак-көк хемнер», М. Кенин-Лопсан «Авамның өө», С. Козлова «Авам сүгга чораанымны», Ю. Кюнзегеш “Бөрү биле кускун”, К. Оргу “Алышкылар”, Ю. Кюнзегеш “Хек биле Көгээзин”, А.Үержaa “Силер-бile хиним тудуш”.

Орус болгаш өске национал литературадан:

О.Оралбаев «Тыва черге мөгейиг» (очулга).

А.С.Пушкин “Балыкчы болгаш балык дугайында тоол”.

Даштыкы аас чогаалы болгаш литературадан:

Д. Дефо “Робинзон Крузонуң ужууралдары”.

Гrimm алышкылар “Ак чылан”.

Аас чогаалы болгаш литература теориязындан допчу билиглер

Тоолчургу чугаа дээрge улустуң октаргай болгаш делегей дугайында бурунгу бодалдарынга үндезилеттинген биче хемчээлдиг чечен чугаа болур. Оларда херек кырында төөгүде болган

барымдаалыг чүүлдер барык-ла чок. Тоолчургу чугааларны *хей-чугаалар, торулгалар, бурун-чугаалар* деп база адап тураг.

Төөгү чугаалар — херек кырында болган онза болуушкуннардан база чонга сурагжаан кижилерниң амыдыралындан укталган, бижиттинмээн-даа болза, амыдыралга болганы чигзиниг чок, биче хемчээлдиг чогаалдар болур.

Бир кижиниң сеткил-хөңүн илереткен, шүлүк тургузуглуг, аялга-бile ырлаарынга таарыштыр чогааттынган улустуң аас чогаалының бир хевири.

Кожамык дээрge чоннуң амыдыралындан чогааттынган, аялгазы, сөстери аңгы-аңгы вариантыларлыг шоодуглуг, кочулалдыг, баштак уткалыг улустуң аас чогаалының бир хевири.

Тыва тоолчургу болгаш төөгү чугааларны шинчилеп келгени

Тыва улустуң тоолчургу болгаш төөгү чугааларын чыып бижиирин болгаш шинчилээрин XIX вектиң ийиги чартында Тывага шинчилел ажылы кылыш чораан эртемденнер эгелээн. Оларга В.В. Радлов, Г.Н. Потанин, Г.Е. Грумм-Гржимайло, Н.Ф. Катанов болгаш өскелер-даа хамааржыр.

Тыва эртемденнер тоолчургу болгаш төөгү чугааларын чыып бижиирин уламчылаан. «Кыс-Халысыр» (Д.С. Куулар, Ч.Ч. Куулар), «Тыва улустуң мифтери болгаш тоолчургу чугаалары» (А.Д. Арапчор), «Чылбыга Айны канчап сыйрыпканыл?» (З.Б. Самдан) деп төөгү болгаш тоолчургу чугаалар чыындыларын үндүрген.

Алгыш-йөрээлдер

Алгыш-йөрээлдер чоннуң амыдыралы-бile холбаалыг делегейде өндүр улуг болгаш өске-даа сүзүктүг чүүлдергө тураскааткан шүлүк тургузуглуг аас чогаалының биче хевиринге хамааржыр уран сөс болур. Улустуң чаагай күзелдери кыска, уран-чечен одуруглар-бile илереттинер.

Алгыш-йөрээлдер аразында дараазында бөлүктөргө чарлып тураг: алгыштар, чалбарыглар, макталдар.

Хам алгыштары

Хам алгыштары — тыва улустуң аас чогаалында эрте-бурунгу үеден бээр туруп келген тыва алгыш-йөрээлдерниң шажынчы хевири болур.

Хам алгыштары шүлүк тургузулугу, бурунгу шүлүк чогаалының үлөгерлери болур. Салым-чаяанның, тускай ук-дөстүг хам кижилир укталган черинден (дээр уктуг, даш көжээ уктуг, ызыгуур салгаан, чер, суг ээзинден укталган дээш оон-даа өске) алганыр.

Гипербола болгаш литота дугайында билиг

Маадырларның күш-шыдалын, чүвелерниң азы болууш-куннарның онзагай шынарларын чуруп көргүзерде, хөлүн эрттири хөөредир, улгаттырар уран арганы калбаа-бile ажыглап турар. Біндиг арганы гипербола (хөөредири, артықшылдыы дәэн уткалыг грек сөстен укталган) дээр. Аас чогаалында, ылаңгыя тоолдарда, олар хөй ажыглаттынып турар.

Басня дугайында билиг

Шүлүктээн азы калбак чогаал хевиинге бижитtingен шоодуглуг, өөредиглиг болгаш кижизидикчи уткалыг, кыска сюжеттиг литературлуг чогаалды *басня* дээр.

Ооң маадырлары колдуунда дириг амытаннаар, үнүштер болгаш кандыг-ла бир чүвелер болгулаар. Оларны кижилир ышкаш аас-дылдыг, сагыш-сеткилдиг, оптуг-кажар кылдыр чураан боор. Чижээ: дилги — кажар-оптуг, авыяастыг; бөрү — чазыйчилби, хоптак, ажырымчы; кас — мелегей, мугулай; үгү — угаансарылдыг; айт — ажылчын, ээзинге бердинген, шынчы, кедилиг дээш оон-даа өске.

Чогаал маадырның дугайында билиг

Литератураның аймактарының айы-бile чогаалда чуруттунган маадырларны аңғылай адаар. Оларны маадырлар, киржикчилир азы персонажтар дээр. Шүлүк чогаалынга *лириктиг маадыр*, шии чогаалынга — *персонаж*, прозага бир эвес чогаалчы боду маадыр кылдыр чуруттунган болза тоожукчу маадыр дээр.

Проза болгаш шүлүк чогаалдарының ылгавырлыг талалары

Проза бile шүлүк уран-чечен чугааны организастаарының иий кол хевири болур. Домак чугаага бижитtingен чогаалды *проза* дээр. Шүлүк чогаалы одуруглар болгаш строфаларга хувааттынар. Шүлүк чогаалында тускай ритм бар болур.

ДОПЧУЗУ

Литература — сөстүң уран чүүлү.....	3
I кезээ. Эгээртимес эртине-байлак – аас чогаалы.	4
Тоолчургу болгаш төөгү чугаалар.....	4
Ай, Хүн.....	6
Чеди-Хаан сыйдыс.....	6
Үгер канчап дээрже үне бергенил?.....	6
Кижи канчап эн-не күштүг амытан болганыл?.....	7
Күскениң чылга киргени.....	8
Үттүг-Хая дугайында тоолчургу чугаа.....	9
Хайыракан.....	13
Теве-Адар.....	17
Амыр-Санаа дугайында төөгү чугаа.....	17
Кыры сөөгү.....	21
Хөөмейллээр Бүдүүкпен.....	22
Тыва тоолчургу болгаш төөгү чугааларны шинчилеп келгени.....	24
Тыва улустуң ырылары.....	26
Кадарчы.....	26
Ала караан дешкен болза.....	26
Межегей.....	27
Самагалдай.....	28
Хандагайты.....	28
Очалаңдан кедилерин.....	29
Тооруктуг долгай Таңдым.....	29
Өдүген-Тайга.....	30
Чашпы-Хемим.....	30
Алды баштыг Кара-Дагны.....	31
Дөгө-Баары.....	31
Ыр, кожамык дугайында билиг.....	32
Алгыш-йөрээлдер.....	34
Өг-буле туткан аныктарга йөрээл.....	35
Аңчының чалбары.....	35
Хам алгыштары.....	37
Күжүгет Серен хамның чаштарны алганганы.....	38
Хамның Шагааны алганган алгышы.....	38
Авторлуг тоолдар.....	40
<i>C. Сарыг-оол. Агар-Сандан ыяш.....</i>	40
Гипербола болгаш литота дугайында билиг.....	43
<i>C. Козлова. Аъттыг-шеригжи кыс.....</i>	43
II кезээ. Ойнай-сылдай сойгалажыр	48
<i>K.-Э.Кудажы. Маргылдаа</i>	48
<i>C.Сүрүн-оол. Аът биле оор.....</i>	50
<i>И.Крылов. Шиижек биле Көгө-буга</i>	51

Басня дугайында билиг.....	52
III көзээ. Элээдилерниң эрээн-шокар делегейи.....	54
<i>С.Тока “Араттың сөзү”. Мерген.....</i>	54
Тас-Баштыг.....	56
База кыш.....	61
Шаагай.....	67
<i>C. Сарыг-оол. Ол-ла Маскаждык.....</i>	73
Чогаал маадырының дугайында билиг.....	80
<i>O. Сувакпим. Буянның сергези.....</i>	84
<i>M. Дуюнгар. Хлеб.....</i>	89
<i>Ш. Суваң. Кижи-бүрүс (тоожудан үзүндүлдер)</i>	96
IV көзээ. Ыт – шынчы өңүнүк.....	109
<i>X. Ойдан-оол. Эзир.....</i>	109
<i>Ш. Суваң. Азыранды</i>	127
V көзээ. Төрээн чуртум делгемнери.....	132
<i>C. Сарыг-оол. Күс.....</i>	132
<i>M.Доржу. Экии, Тывам.....</i>	133
<i>A.Даржай. Өгтөйерээл.....</i>	135
<i>C. Молдурга. Амытаннар чылсы.....</i>	138
Проза болгаш шулук чогаалының ылгавырлыг талалары	142
VI көзээ. Көжеге-даа ажыттынды.....	144
<i>B. Көк-оол. Чаргы.....</i>	144
<i>E. Танова. Илбилиг согун.....</i>	149
Номда кирген авторлар дугайында немелде тайылбыр.....	169
Шээжилээр чогаалдар.....	172
Немелде номчулгага хереглээр чогаалдар.....	172
Аас чогаалы болгаш литература теориязындан допчу билиглер.....	172

Учебное издание

ООРЖАК Лидия Хорагаевна, КУЖУГЕТ Мария Амын-ооловна,
ЧАМЗЫРЫН Екатерина Тамбыевна, КУУЛАР Николай Шагдыр-оолович,

ШААЛЫ Алевтина Сугдурновна

РОДНАЯ ЛИТЕРАТУРА

6 класс

Учебник для общеобразовательных организаций

Издание второе

На тувинском языке

Редактор *O. M. Баир.* Художник *B.U. Донгак.* Дизайн обложки *M.Ч. Чоодуу.*

Компьютерная верстка и дизайн *Л.А. Ооржак.* Корректор *B.Ш. Чамьян.*

Подписано в печать 12.08.16. Формат 70 × 90 $\frac{1}{16}$. Бумага офсетная. Печать офсетная. Гарнитура TTSchoolBook.
Физ.печ л. 11,0. Тираж 1528 экз. Заказ № .

Оригинал-макет подготовлен ГБНУ Министерства образования и науки Республики Тыва “Институт развития национальной школы”, 667011, г. Кызыл, ул. Калинина, 16.

Отпечатано в ОАО “ПИК “Офсет”, 660075, г. Красноярск, ул. Республики, 51.